

## ASO GAFUA, 23 IUNI 2014

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**FOFOGA FETALAI:** I le agaga faaaloalo ou te faatalofa atu ma faafeiloai atu i le paia maualuga o le tatou Maota Fono i leni foi taeao fou. E talitonu le agaga ma le faamoemoe ua vaai i sulu o le tino lo tatou alafai mai i faguga lelei i leni aso, i le paia ma le mamalu maualuga o le tatou Maota i ona tulaga faalupelupe. Ia malo le soifua ma le lagi e mama. Sa tatou taumavae i le faaiuga o leni vaiaso, ia sa tatou le iloa pe tua ma ni a faamoemoega o mea uma sa tatou faanaunautai i ai, peitai o le alofa ma le agalelei o lo tatou Tapaau Sili i le lagi, ua mafai ai ona tatou toe faatasi i leni aso. Malo le soifua manuia, malo le onosai, malo foi le faamalolosi mai i le tauaveina o le tatou galuega i leni taeao fou.

E fia faaaogaina foi leni avanoa taua, le paia ma le mamalu o le tatou Maota, e fai ai lou leo e fai ma fofoga taumolimoli o le paia o le itumalo tupu ma ona ee le Gagaifomauga Nu. 1, ia o le paia lava lea aua Sao e Fa, Aiga Sa Umalau, le Pouniu ma le Faasau, ma le fetalai ia Lavea o le Aalii o le Itu o le Tootoo o Finao, e momoli atu ai le agaga faafetai tele i lau Afioga i le Taitai o le Malo aemaise le paia o le aiga Kapeneta, lau Afioga i le Taitai o le Itu Agai ma sui usufono mamalu uma o le Palemene sa tatou toe faatasi i toe saafiafiga ma le falelauasiga mulimuli o le Tofa Tuiloa Anitelea.

Faafetai le talaa atu ua maualuga le aso, aemaise o le afio atu foi o le Afioga i le Sui o le Fono a Sui Tofia, le Afioga i le Tama Aiga Tuiaana Tuimalealiifano, e manatu ua atoa tagi ai paia o le tatou Malo i ona tulaga faalupea ma ona tulaga aloaia. Faafetai i lo outou manatu i se tautua faale-'au'au ma se tautua faalelava a le sui usufono o le itumalo o Gagaifomauga Nu. 1, ia o mamalu ua tino tauao i Finao, e talitonu e tele aso e le lau aso. Ae ona o le finagalo o le Atua e le o se loto, ia ua amia ai le auauna ua le iu ai le tautua aua leni Paeaiga. E momoli atu le agaga faafetai tele i le paia ma le mamalu o le tatou Palemene nei, i lau Afioga i le Taitai o le Malo ma lau Kapeneta, aemaise i lea tala na atoa i lau Afioga i le Taitai o le Itu Agai ma le paia ma le mamalu maualuga o le Palemene. O le a foi se fai fua ma se taumafai a le itumalo, ia malu ave i fale lo outou finagalo.

Le paia o lo tatou itumalo, faafetai mo mea uma, e silafia e le Atua lo outou tautua Malo aemaise le alofaiva i le faamaloulou atu ma le afio atu ma tala atu o aao o le Palemene o Samoa aemaise Samoa ua potopoto.

**TULAFONO TAU FAAOFI O LE FAAMASINOGA MO MATAUPU  
FAATATAU I AIGA 2013 – iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o Mataupu Tau Faamasinoga, Leoleo & Falepuipui ma Faamasinoga o Fanua & Suafa.

**Tofa TUISA TASI PATEA (Taitaifono o le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa):**

Ia ua faamalo atu i lau Afioga i le Fofoga Fetalai, e talitonu o lea ua uma ona e sii le atu o le taeao ia ua e momoli foi lapapala o Malo i Fogavaa e tusa ai ma le vatapuia ma le Tapaau i le lagi, ua uma foi ona e ulufanua paepaeina paia o le Maota lenei, o le a le toe oo foi la i ai se faamatalaga, ae faasili ia le viiga o le Atua i lenei aso.

Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, ina ia faagasolo le Tulafono Tau Faaofi o le Faamasinoga mo Mataupu Faatatau i Aiga 2013 faatasi ma Teuteuga ma Faasaoga.*

*Faaluaina e se tasi o sui usufono mo Vaimauga Sisifo, Tofa Lenatai Victor Faafoi Tamapua ma le sui usufono mo Palauli.*

*Na faamaonia le lafo.*

**FOFOGA FETALAI:** Ou te faasilasila atu ua faamaonia nei e le Fono Aoao le Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le Tulafono Tau Faaofi o le Faamasinoga mo Mataupu Faatatau i Aiga 2013.

O le a sagai atu le Fono Aoao i le Iloiloga Auiliili o le Tulafono Tau Faaofi o le Faamasinoga mo Mataupu Faatatau i Aiga 2013.

E tusa ai ma le Tulafono Tumau 102, e amata le iloiloga o le Tulafono Tau Faaofi i lona Fuaiupu 2.

**FUAIUPU 2: Faamatalaina o uiga o upu.**

**FOFOGA FETALAI:** O lo o i ai le Teuteuga a le Komiti i le Fuaiupu 2 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

**Tofa TUISA TASI PATEA:** Lau Afioga i le Fofoga Fetalai ou te faatu le Teuteuga i le Fuaiupu 2 e faapea:

**“TEUTEUGA:**

*Ia faaofi le faamatalaga mo le “Faufautua faatagaina” i le Fuaiupu 2 e faapea:*

**“Faufautua faatagaina”** o lona uiga o se faalapotopotoga, sosaiete, faalapotopotoga ua tuufaatasia faaletulafono, tagata po o se vaega o tagata po o se lala sooupu – ua tofia i lalo o le fuaiupu 17.”

*Faamaonia le Teuteuga.*

*Faamaonia le Fuaiupu 2 e pei ona Teuteuina.*

**FUAIUPU 3: Tulafono e noatia ai le Malo.**

*Faamaonia.*

**FUAIUPU 4: Faamasinoga mo Mataupu Faatatau i Aiga.**

*Faamaonia.*

**FUAIUPU 5: Tofiaina o Faamasino o le Faamasinoga mo Mataupu Faatatau i Aiga.**

*Faamaonia.*

**FUAIUPU 6: Faaleleiga.**

*Faamaonia.*

**FUAIUPU 7: Isi iuga a le faamasinoga e foia ai ni feeseeseaiga.**

*Faamaonia.*

**FUAIUPU 8: Puleaga faa-faamasinoga.**

*Faamaonia.*

**FUAIUPU 9: Tauaofiaga a le faamasinoga.**

*Faamaonia.*

**FUAIUPU 10: Auai i le fofogaina o taualumaga.**

*Faamaonia.*

**FUAIUPU 11: Lomiga faasalalau o lipoti o taualumaga.**

*Faamaonia.*

**FUAIUPU 12: E ao ona faatulai mai taualumaga ma tagofia i lalo o Tulafono Faafae o le Faamasinoga mo Mataupu Faatatau i Aiga.**

*Faamaonia.*

**FUAIUPU 13: Mataupu e faatulai atu i le Faamasinoga Sili.**

*Faamaonia.*

**FUAIUPU 14: Faasee atu o taualumaga i le Faamasinoga Sili.**

*Faamaonia.*

**FUAIUPU 15: Faaaogāina o le Tulafono o Faamasinoga Faaitumalo 1969.**

*Faamaonia.*

**FUAIUPU 16: Tagata e Faafocina Mataupu o le Faamasinoga mo Mataupu Faatatau i Aiga.**

**FOFOGA FETALAI:** O lo o i ai le Teuteuga a le Komiti i le Fuaiupu 16 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono.

**Tofa TUISA TASI PATEA:** Lau Afioga i le Fofoga Fetalai ou te faatu le Teuteuga i le Fuaiupu 16(1), (2) & (3) e faapea:-

**“TEUTEUGA:**

*Ia aveese le faasinomaga i le “Tagata e Faafocina Mataupu o le Faamasinoga mo Mataupu Faatatau i Aiga”, ma faitauina ai e faapea:-*

(1) E ao i le Resitara o le Faamasinoga Faaitumalo ona tuufaatasia galuega faufautua ma auaunaga e fesootai i ai o manaomia mo le faagaoioia lelei o le Faamasinoga mo Mataupu Faatatau i Aiga.

(2) E mafai e le Resitara ona faamatuu atu le tiute i lalo o le faafuaiupu (1) i so o se tagata ofisa po o se tagata faigaluega o le Matagaluega o Faamasinoga ma Pulega Tau Faamasinoga.

16(3) Ia soloia le faafuaiupu (3) ona o lo o i ai i le taimi nei i totonu o le faafuaiupu (1) e avea o se galuega tauave a le Resitara.”

*Faamaonia le Teuteuga.*

*Faamaonia le Fuaiupu 16 e pei ona Teuteuina.*

#### **FUAIUPU 17: Faufautua.**

**FOFOGA FETALAI:** O lo o i ai le Teuteuga a le Komiti i le Fuaiupu 17 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

**Tofa TUISA TASI PATEA:** Lau Afioga i le Fofoga Fetalai ou te faatu le Teuteuga i le Fuaiupu 17 e faapea:

**“TEUTEUGA:**

*Ia aveese le faasinomaga i le “Tagata e Faafocina Mataupu o le Faamasinoga mo Mataupu Faatatau i Aiga” ma faitauina ai le Fuaiupu 17 e faapea:*

17. Faufautua – E mafai e le Resitara ona tofia Faufautua Faatagaina i luga o ia aiaiga ma tuutuuga e pei

**ona aiaia e Tulafono Faafoe o le Faamasinoga mo Mataupu Faatatau i Aiga.”**

*Faamaonia le Teuteuga.*

*Faamaonia le Fuaiupu 17 e pei ona Teuteuina.*

**FUAIUPU 18: Tulafono Faafoe o le Faamasinoga mo Mataupu Faatatau i Aiga.**

*Faamaonia.*

**FUAIUPU 19: Tulafono Faatonutonu.**

*Faamaonia.*

**FUAIUPU 20: Aiaiga tau soloaiga ma aiaiga faasaoina.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono o le Faamasinoga mo Mataupu Faatatau i Aiga 2013.**

**FOFOGA FETALAI:** O lo o i ai le Faasaoga a le Komiti i le Fuaiupu 1 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

**Tofa TUISA TASI PATEA:** Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

*Ia aveese le fuainumera “2013” ma suia i le fuainumera “2014” ma faitauina ai le Igoa o le Tulafono Tau Faaofi e faapea:*

**TULAFONO O LE FAAMASINOGA MO MATAUPU FAATATAU I AIGA 2014.”**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o le Faamasinoga mo Mataupu Faatatau i Aiga 2014 faatasi ma Teuteuga ma le Faasaoga.*

#### **LAFO MO LE FAATAATIA ESE O LE TULAFONO TUMAU 107(4)**

**FOFOGA FETALAI:** Tulai mai lau Afioga i le Palemia mo le lafo.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia):** Lau Afioga i le Fofoga Fetalai ou te tulai atu ma le agaga faaaloalo e faatu le lafo, *Ina ia faataatia ese Tulafono Tumu 107(4) e avanoa ai le faitauga faatolu o le Tulafono Tau Faaofi o le Faamasinoga mo Mataupu Faatatau i Aiga 2014 i le Aso Fono leni.*

*Faaluaina e le Sui Palemia, Minisita mo Faamasinoga ma Mataupu Tau Faamasinoga, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma tulai ai Tulafono Tumu 107(4) ua faataatia ese.*

#### **TULAFONO TAU FAAOFI O LE FAAMASINOFA MO MATAUPU FAATATAU I AIGA 2014 – faitauga faatolu**

**FOFOGA FETALAI:** Tulai mai lau Afioga i le Minisita mo Faamasinoga ma Mataupu Tau Faamasinoga.

**Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga):** Ua maleifua mai le Maota i faguga lelei i leni taeao fou. E faatalofa atu i lau Afioga i le Fofoga Fetalai ma matou piiama i lou sa folau i leni taeao, aemaise le siitia o le faafetai ona o le alofa ma le agalelei o le Atua ua taitaiina mai lou soifua ma le tatou ola i le amataga o leni vaiaso ma le tatou galuega.

Lau Afioga ae ou te le i faatuina le lafo, e fia fai sina au faamatalaga puupuu e uiga i le Tamaitai Faamasino, Susuga Ida Malosi, o se Tamaitai Faamasino mai le Faamasinoga a Niu Sila. Ma e talu mai le amataga o le tausaga nei, o lo o galue le Tamaitai Faamasino ia Ida Malosi i totonu o le tatou Faamasinoga, ma o ia lea sa lagolago malos i le Afioga i le Faamasino Sili i le tapenaina o leni Tulafono Tau Faaofi. Ma o le faaiuga o le masina nei e faaiuina ai le auunaga a le Susuga Ida Malosi mo le tatou Faamasinoga, ae i lau Afioga i le Fofoga Fetalai i lau faatagaga ou te fia amanaia aloaia le

tautua a lenei Tamaitai Faamasino e ala i lana galuega i le tatou Faamasinoga ma faamauina ai le faafetai a le Matagaluega o Faamasinoga ma Mataupu Tau Faamasinoga mo lea galuega tele sa feagai ma ia.

**FOFOGA FETALAI:** Saunoa lau Afioga i le Minisita.

**Afioga Hon FIAME NAOMI MATAAFA:** E le gata i le lio lava ia o galuega faatino a Alii ma Tamaitai Faamasino, ae faapea foi lana fesoasoani i le auunaga tau Faamasinoga. E pei o le itu lea lau Afioga e tau ina ou faamauina aloaia i totonu o Faamaumauga a le tatou Palemene lea foi tautua a se tasi o alo o Samoa na soifua mai i Niu Sila, a ua mafai i le va lelei ma le fesoasoani mai a le Malo o Niu Sila ona auina mai tatou te galulue faatasi i le ono masina talu mai le amataga o le tausaga nei.

Lau Afioga i le Fofoga Fetalai, ou te fiafia tele e faatu le lafo, *Ina ia faitauina nei le Tulafono Tau Faaofi o Faamasinoga mo Mataupu Faatatau i Aiga 2014 i lona faitauga faatolu.*

*Faaluaina e le Sui Palemia, Minisita mo Tupe Maua, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioaga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.*

#### **LAFO MO LE FAATAATIA ESE O LE TULAFONO TUMAU 100(1)**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faataatia ese Tulafono Tumau 100(1) e avanoa ai le faitauga faalua o le Tulafono Tau Faaofi o Teuteuga o le Faavae (Nu.2) 2014 i le Aso Fono leni.*

*Faaluaina e le Sui Palemia, Minisita mo Tupe Maua, Minisita mo Galuega Tau Alamanuia ma Atinae a le Malo, Minisita mo Tina ma Tamaitai, Atinae o Nuu ma Afioaga ma Agafesootai ma le Minisita mo Faatoaga ma Faigafaiva.*

*Na faamaonia le lafo ma tulai ai le Tulafono Tumau 100(1) ua faataatia ese.*

#### **TULAFONO TAU FAAOFI O TEUTEUGA O LE FAAVAE (NU.2) 2014 – faitauga faalua**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ou te faatu le



lafo, *Ina ia faitauina nei le Tulafono Tau Faaofi o Teuteuga o le Faavae (Nu.2) 2014 i lona faitauga faalua ma ou te fia tautala faamalamalama i ai.*

*Faaluaaina e le Sui Palemia, Minisita mo Faamasinoga ma Mataupu Tau Faamasinoga ma le Minisita mo Tupe Maua.*

**FOFOGA FETALAI:** Ia, tulai mai lau Afioga i le Palemia mo le saunoaga faamalamalama.

**Susuga Hon TUILAEPA FATIALOFA LUPESOLIAI AIONO NEIOTI**

**SAILELE MALIELEGAOI:**

Lau Afioga i le Fofoga Fetalai, o le Tulafono Tau Faaofi lenei o lo o avatu ai nai vaega e talosagaina ai le teuteuina o le tatou Faavae. O le Vaega 1, ia faatagaina ai le Vaega Faaupufai o lo o tulai i le foe o pulega Malo e filifilia se tagata ina ia tofia e avea ma Ao o le Malo e ese mai ai faiga o aiaiga faapalota o lo o i ai i le taimi nei, e fai lava si umi ma fenumiai o faatino e le Fono Aoao Faitulafono. O le (2), ia faatagaina sui usufono o le Palemene e filifilia mai e le Vaega Faaupufai e aupito toatele e le Vaega lea o lo o tulai i le foe e faafoe le sa o Samoa ina ia faatatauina e faapea ua filifilia aloaia ma faamaonia e le Fono Aoao Faitulafono e avea ma Fofoga Fetalai ma Sui Fofoga Fetalai i lea tulaga, sui ia ua faatutu mai e i latou. O le (3), ia faatinoina fuafuaga ua tuuina mai i le Lipoti a le Komisi Suesue o Faiga Palota 2012 ma isi foi i tua atu, ma e maitauina o le finagalo fulisia foi lea o le Palemene i mataupu tau faiga palota, ina ia suia itumalo o latou tagata palota taitoatasi, itumalo e lua o nuu i le taulaga. Ma le vaega mulimuli, faavaeina lea o le tofiga o le Komesina o Sulufaiga ma ana matafai i lalo o le Faavae ona ua i ai nei ia te ia le galuega tauave na te suesueina le soliga o aiatatau a tagata soifua, faapea foi ma le vaaiga o le tulaga o le amiotonu, faamasinoga tonu e mafai ona fesootai i aiatatau faavae i lalo o le vaega 2 o le Faavae.

E i ai isi teuteuga faaopoopo laiti na, e tai pei o le suiga lea o le upu Pulenuu, i le upu e suia ai ua faaaogaina ai, o Sui o le Nu, i le tulaga lava ua tatau ona o le faaaogasese e nisi o le upu Pulenuu ua pei ai latou ua pulea faasoloatoa le nuu.

Lau Afioga i le Fofoga Fetalai, o le isi lea anava a le Vaega Faaupufai lenei, o le vaai i mea fenumiai ona taumafai lea e faataoto ni teuteuga e faafaigofie ai ma leai ai se lavelave ma manino i luga o Afioga a le Alii, “O le na te iloa le mea e tatau ona fai ae le faia, o le agasala lea.”

O le ala lena o lea e faavae ai le teuteuga lenei o le Faavae, e leai se taimi e toe tuu atu ai, o tatou ma le tatou taimi tatou te faia so tatou taeao e teuteu ai nisi o mea ua leva ona tatau ona teuteu. O le Vaega 1, o le filifilia lea o se tasi e avea ma Ao o le Malo, sa faataoto mai e o tatou uluai tama na faavaeina le tatou Malo na pasia e le Fono Faavae ma le Faavae, o faaupuga ua talafeagai lelei i lenei taimi. E leai ni Vaega Faaupufai. O le faaupuga la o lo o i ai, tatou te omai foi lea e laina atu i luma i o fai ai le palota i le tulaga tusa i lenei taimi, e leai ni Vaega Faaupufai ona alu atu pogisa lava lea o le tagata ia, pule ia i lana palota. A o lea la ua tatou i ai i le taimi o Vaega Faaupufai, o lea ua tatou iloa le reality of politics. O le Vaega lava e tulai mai e fulisia i ai le atunuu e pulea ma faafoe le tatou Malo, o latou lava e pau i ai le filifiliga o le Ao o le Malo, po o fea lava le mea e agai i ai le faatofalaiga, ona aumai aloaia foi lea i totonu o le Maota e fofoga ai le Maota. O le agaga lena e leai se isi agaga

faafaigofie, aua tatou te faafaigataina mea faigofie. O lea la ua ese foi lenei taimi ua tatou i ai, ona tatou alu ai lea faapena. E tatou te le iloa le agai atu i le lumanai. Pe avea le taatia ai pea o mea faapenei e tutupu ai vevesi, a o le faigofie ia o le tulaga o lea o lo o faagasolo ai nei Faigamalo. E pei lava ona i ai nei i le taimi e tulai mai ai le Vaega Faaupufai e fulisia i ai le toatele o sui usufono, ona otometi lava lea o le filifilia o se tasi ua fulisia foi i ai finagalo o le toatele o le Vaega ona aumai loa lea e avea ma Palemia, faapena foi ma le Fofoga Fetalai pe a faapea e pasia le fautuaga lenei.

E pei ona silafia, ua suia na o le filifiliga o le Palemia i le tulaga o lo o i ai nei, ae le i suia le filifiliga o le Fofoga Fetalai. E pei la o le isi lena vaega lua lea ua i ai nei i le filifilia o le Fofoga Fetalai ma le Sui Fofoga Fetalai, e sili atu ona faigofie pe a tatou alu i le mea foi lea e avatu ai le fautuaga i le Tulafono Teuteu lenei pe a outou manatua le filifiliga foi o lau Afioga i le Fofoga Fetalai talu ai, na umi se taimi o tatou laina taitasi atu i ina ma tau fai palota. E pei la o tulaga na e tatou te le... o lea ua tatou i ai i le taimi lenei, e le tatau la ona tatou alu pea i mea tuai ua le talafeagai ma le taimi lenei tatou te i ai. Ona faapea lea o le taofi, e lelei ona teuteu foi lea vaega.

O le Vaega 3, o le tulaga lea o faiga palota taitoatasi ma teuteuga ina ia aloaia ai loa itumalo aloaia nei o le taulaga. O lona uiga o le a suia mai ai le Palota Taitoatasi. I le faataoto mai ai i le amataga, sa i ai pea le avanoa i le Au Palota Taitoatasi e aumai ai o latou sui. O le faaupuga lena i lena foi taimi, a o lea lava ua alu, alu o lea ua oo ina faatino le suiga i le mea e tatau ona i ai. Ua leva ona tatou omai ai i le tulaga lea e faasolo mai i itumalo faaalaalafaga, o itumalo faaalaalafaga o lo o faalupe lelei i faalupega taualoa o le atunuu o Vaimauga Sasae, Vaimauga Sisifo, Faleata Sasae, Faleata Sisifo. E faapena uma lava i itumalo faaalaalafaga e 40+, ae tasi lava le itumalo o lea e taoto faale iloga, e pei o se igoa o se sosaiete po o se au lakapi. E le aloaia lea igoa na sau ai ma o le agaga lena, ae leai se isi agaga. Ia faa-taualoa le tuu i ai o Sui o Itumalo nei o le Taulaga. A tatou manatunatu i ai i le suiga lea ua i ai mai le tulaga faale iloaga, taape solo ma salalau i totonu o le atunuu, e aafia uma ai o tatou itumalo e salalau i ai sui o le Au Palota Taitoatasi. I le toe vaai atu i ai i le taimi lenei, o se mea ua matua le talafeagai lea mea. O lea foi ua atagia ai i totonu o a tatou felafolafoaiga, e pei e sau loa i luga le mataupu lenei e pei e alu le talie a le Maota lenei. E tasi lava le mafuaaga e talie ai, ona o le taoto faale iloga o isi ia tamalii o tupu ma ee o le atunuu. A tatou silasila i sui usufono ia e i ai nei, o le Papaliitele, o Maualaivao, o tupu o le atunuu, a o lea e sui mai i se tulaga faale-iloga faasosaiete o le itumalo Palota Taitoatasi. A o le tuu la i ai ua suia i nofoa e lua Tutaulaga, o le tauina lena ua faatietie ai i le mea maualuga. So o se atunuu lava o le lalolagi lenei, e i lalo nuu uma lava, ae tu matilatila lava le laumua, le capital.

E pei lava o Amerika, o a lava nuu uma, e ifo uma ia Uosigitone. O a nuu uma o Rusia e ifo tasi uma ia Moscow aua o i ina le lauma, o i ina le punavai o le manuia o se atunuu. O lona uiga la o lea ua sii i le Teuteuga lenei, sii lava, sii i luga i le mea o i ai mauga o ao.

O le tulaga lena lau Afioga i le Fofoga Fetalai, e le o se tulaga la faatatope ona fai le Teuteuga lenei. O lea ou te tatalo ia malamalama i latou ua leva ona fai le latou tautua. E le o se suiga e faatauemu i ai, a o le suiga e faatietie atili ai i latou ne i i le maa salafa. O le Teuteuga lena lona tolu tele lava, a o le

Teuteuga lona fa lau Afioga i le Fofoga Fetalai, o le Teuteuga lea i le Komesina o Sulufaiga.

O le Komesina o Suluga i so o se atunuu, e sulufai uma lava i ai tagata uma o le atunuu ua i ai se tulaga e atagia ai se faaiuga ua le amiotonu i so o se vaega o le Malo. O i ina le sulufaiga ma ua tele faaiuga a le Malo i nisi o Matagaluega ua toe suia ona o faaiuga a le Komesina o Sulufaiga, ma ua avatu i le Kapeneta toe liliu i ai le tofa a le Kapeneta ma latou faia ai ni faaiuga e atagia ai fautuaga ua lelei ona fai e le Komesina o Sulufaiga, ona o le faataua e le Faavae o le aiatatau. E faataua foi e le lalolagi atoa aiatatau a tagata. O le aloaia foi o aiatatau a tagatanuu, o i ina e maualuga atili ai le vaai mai a le lalolagi i se atunuu latou te faatauaina mea ia, lea ua ala ai ona faataua e le Malo e ala i Minisita o le Kapeneta ma le Vaega Faaupufai. E leai se isi auala e puipua ai mea ia nai lo le tuu loa i totonu o le Faavae e tamau ai i ina le tofiga. O le tofiga a le Palemene lenei e puipua ai faaiuga fai, na fai ai foi ma le tofiga ina ia aua ne i maluelue i taimi uma, ia aua ne i fefe e fai ana faaiuga ona o lea e tua mai i le Maota o Samoa. O le fonousu lenei o i ai uma Tootooau o le atunuu atoa.

Lau Afioga i le Fofoga Fetalai, o le faamatalaga lena e faatatau i le Teuteuga o le Faavae. O tatou o lo o i ai le tiute tatou te iloa ai le mea e tatau ona fai ma fai loa. E le tatau ona tuufauina, ma o lo tatou taeao lenei i lenei foi Paeaiga, o le isi lea taeao o le a avea pea ma Talatuu i le lumanai i isi Paeaiga, o le taeao lenei na faataatia ai puipuiga tetele nei tau le Tulafono mo le puipuiga o aiatatau a tagata o le atunuu lenei.

Lau Afioga i le Fofoga Fetalai, o le uiga tonu lena o le Tulafono Faavae e pei ona faataoto i lumamea.

**FOFOGA FETALAI:** Malo, faafetai saunoa i lau Afioga i le Palemia po o lau Afioga foi i le Minisita e a ia le Tulafono Tau Faaofi. Ua faafofoga ma le totoa lo tatou Maota i lenei taeao. Ua avanoa le Maota mo le felafolafoaiga sui usufono mamalu.

Tulai mai le sui usufono mo Faasaleleaga Nu.2.

**Susuga PAPALII LIO FAAVAIIVAIOMANU TAEU MASIPAU (Faasaleleaga Nu.2):** Ua faafetai tele i lau Afioga i le Fofoga Fetalai faapea foi le paia o le Maota. E au faatasi foi lenei sui usufono e tusa o le viiga ma le faafetai e sulaina ai le agalelei o lo tatou Matai Sili i le lagi ona ua toe faafoisia manuia mai le soifua o le Maota i lau Afioga i le Palemia ma le Kapeneta, aemaise foi o le Taitai o le Itu Agai ma sui usufono mamalu uma o le Palemene.

E momoli atu le agaga faafetai i le saunoaga a lau Afioga i le Palemia e tusa ai o le suiga o le Faavae ua i lumamea nei i le Laulau a Fono a le Maota. Malo faafetai, ua tofa foi ma auiliili itu taua aemaise foi o nisi o suiga o le Faavae i lenei vaitau ua i ai po o lenei talutalufou o a tatou auga Paeaiga i totonu o le Palemene o le atunuu. Ua leai lava se vaipanoa e le i oo i ai le saunoaga ma tuleiga i le taua ma le aoga o suiga faapenei, aemaise lava o le talanoaina o le Faavae o le Tulafono Autu ma o le Tulafono Maualuga, o le Faavae.

Atonu o le avanoa foi lenei e avatu ai ni manatu. O lagona lava ia e le mafai ona tuua aua o lagona e avatu i lumamea. O le ala foi lea na fā'ia mai ai sui usufono mai afioaga ma nuu e momoli se sao, aemaise lava o tulaga i suiga

tetele faapenei i le Tulafono Autu po o le Tulafono e aupito sili ona maualuga a le atunuu, o le suiga o le Faavae. O le mea lea lau Afioga i le Fofoga Fetalai ma le paia o le Maota, e leai e fia avatu foi se sao o Faasaleleaga Nu.2 i nei foi suiga ua i lumamea o le Maota. O le matau atu i nei suiga e pei lava ona faamalalalama e le Afioga i le Palemia, o le mea muamua lava o le tofiaina lea o Lana Afioga Mamalu O Le Ao o le Malo.

Lau Afioga i le Fofoga Fetalai, o lagona lava nei o lenei sui usufono e le mafai ona tuua, e avatu i lumamea e filitagaga i ai le tofa ma le faautaga i se mea e autasi i ai le Maota lenei, ae e le mafai ona tuua o matou lagona. I le vaai a lenei sui usufono, e le mama lenei tofi o le Ao o le Malo, o le Faauluuluga o le atunuu. O le Ao foi o le Malo o lo o Faaao i ai le Tafatofu o Faigamalo, e pei ona i ai le Pulega Faatonu po o le Executive, o le Palemene lenei lau Afioga i le Fofoga Fetalai ma le Faamasino Sili ma le Vaega o Faamasinoga, ae Faa-Ao i Lana Afioga Mamalu O Le Ao o le Malo. O le mea lea e le mama i lenei sui usufono lenei tofiga taua ona e pei e tulaui uma i ai nei Vaega uma ma lenei Tafatolu o Faigamalo i Lana Afioga Mamalu O Le Ao o le Malo. O lona uiga i le vaai a lenei sui usufono, e le faigofie i le vaai i ai i lona filifilia.

Lau Afioga i le Fofoga Fetalai, o le taimi lenei a tuu mai i le filifiliga o lo o i ai i le taimi lenei sa fai e outou tuua ma o tatou matua ua tofafa mai Tiasa, e i ai mafuaaga ma e i ai foi talitonuga na fai ai Tulafono e o tatou tuua ma matua ua lagomau mai Tiasa. O le filifiliga o Lana Afioga Mamalu O Le Ao o le Malo, e filifili e le Palemene. O lenei taimi i le fillifiliga o Lana Afioga Mamalu O Le Ao o le Malo, o lou lava sui usufono e ese le mamalu. O le mamalu ia, e oo foi i taimi e pei ona i ai le sauniga talu ai nei, ou te lagona e pei e au mai ma i tatou tuua ma matua ua tofafa mai Tiasa i le filifiliga o Lana Afioga Mamalu O Le Ao o le Malo. O lea e tapuaia e lo tatou atunuu atoa le filifiliga.

O le taimi lenei i le vaai lava ia a lou sui usufono, o lo o mamalu lava. O le upu lea i le filifiliga lea e tau fai ai nei le suiga lenei, ua pei o le a aveese mai i le Palemene le filifiliga, a o le a lafo atu i se Vaega Faaupufai. O le a ou le taua se Vaega Faaupufai a o le a ou lauga faalauaitele.

O lau vaai faasui usufono o lona uiga o le a omai lava le Vaega Faaupufai ia ma le latou Ao o le Malo.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai.....

**FOFOGA FETALAI:** Malie le sui usufono o lo o saunoa, se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** E pei lava ou te vaai atu e le i faitau le sui usufono i le Tulafono Tau Faaofi, a o le Tulafono Tau Faaofi lenei o le Aso Faraile, Aso Toonai, Aso Sa ma le Aso Gafua lenei. O lona uiga ua fa aso, a o lona uiga e le i faitauina le Tulafono Tau Faaofi, a o le faigofie ia o le Tulafono Tau Faaofi, “O Le Ao o le Malo, o le a tofia e le Fono Aoao Faitulafono, i le faia i luga o le fautuaga a le vaega faaupufai po o ni vaega faaupufai o pulea le Malo.”

Se i vaai i le sese mamao o le mea lea e te agai i ai? E fai e le Fono Aoa o le tofiga, ae pau lava lea o le mea e ese mai le mea lea. O le uluai filifiliga o Lana Afioga Mamalu O Le Ao o le Malo o lo o i ai nei, e tasi lava le sui na faatu e le Vaega Faaupufai lenei, ae toalua outou. E toalua a outou sui na faatutu mai. E ui ina tasi ae e le i nonofo ma fai se faiga e mamalu ai. Na le faamamaluina la e outou. O le mea la lea na tupu, o le le mamalu ona e tasi na faatulai atu i inei. O le filifiliga lea talu ai ia manatua, o lea ua faalua ona tauave e Lana Afioga Mamalu O Le Ao o le Malo, a o le uluai filifiliga ina ua tuua le Malo e le Susuga i le Malietoa. Ona tatou omai loa lea fai le filifiliga. O le mea la lenei na tupu, na tasi lava le fonotaga a le Vaega Faaupufai lenei tasi moemoe, o le a tasi lava le tatou igoa e ave, ona tasi ai lava lea o le igoa na aumai i le Fono Aoa Faitulafono, ae omai outou e lua.

O le mea la lenei o lea e manao le Teuteuga lenei, aua ne i toe tupu ni mea faapea, aua ne i toe tupu. E ui lava la ina faapea e le i faia se palota ona o le lua a outou, na agai sao lava i le suafa lava e tasi lea, a o le tulaga e.....

**Afioga Hon Palusalua Faapo II (Taitai o le Itu Agai):** Lau Afioga o se mea e fia faasao.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** E leai se mea e fia faasaoa o le mea amiotonu lea ou te fai atu ai.

**FOFOGA FETALAI:** E uma ona ou toe avatua lea o le avanoa i lau Afioga pe a maea le.....

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** E leai se mea o tau faasaoa o le mea moni lea ou te avatua, leaga o au na aumaia le matou pepa e aumai ai le...faatu mai ai, na o le tasi lava na faatu, ia ae ou sau i i ou fesili atu, ua leai nisi? E toalua le vaega lea na aumai, e ui lava la ina tasi le suafa ae lua. O le mea la lenei o lea e tau manatu le vaega lenei, ina ia mamalu e tasi lava e alu atu o le vaega.

Lau Afioga i le Fofoga Fetalai, o le mea lenei o lea ou te fautuaina ai le susuga i le sui usufono o lo o lauga nei, se aua e te lavea i le mea foi lea o le pa oso, ae faitau lelei le Tulafono, o le umi o lau faamalamalama, a o lea foi ua e tu ae e fai mai o mea le mamalu, o le atoaga o le mamalu lea e avatu i inei.

Lau Afioga i le Fofoga Fetalai ia aua ai ne i faaluafesasi, o le iuga lava e fai faatu atu le igoa e tasi, ona tasi ai lava lea. Ae ina ua fai le faiga talu ai na sui la le faiga, sa ou feiloai i le Taitai o le Itu Agai, ona ou fai lea i ai, se aua le toe faia le mea lea na outou faia talu ai, e mataga, ae ave le pepa lea e tasi e ta te tau fai saina uma ai, o lea la na ma tau fai saina uma ai na ou sau lava i i i ou valaau i ai, afio maia Palu, ia pei lava o kegi foi i aso la sa ma toalua ai e faalogo mai i le mea ou te fai atu ai, a o ave ma Minisita i lau Kapeneta, o le manaia ia o le...ae ana ou le valaau i ai, e tupu foi le mea lenei, e ese le matou faatu atu e ese foi la outou faatu mai, e moni lava la o lea e tasi, ae le mafai lava e ono tupu foi se mea e tatou te tau omai ai i le Palemene nei ma tau fai se palota. O le ala lenei o lea e taumafai atu, aua le alu i lea mea o le fai o palota, o lea lava tatou te iloa, o le mea e tupu, o le vaega lava e tulai mai e latou te faafoea le Malo, ia o lē lava latou te aumaia, o le mea moni lava o Le

Ao Mamalu lena o le tatou Malo, ae aumai lava iinei mea uma pei lava ona avatu ia le faaupuga lea; “18. Tofiaina o Le Ao o le Malo-(1) O Le Ao o le Malo, o le a tofia e le Fono Aoaofaitulafono, i le faia i luga o le fautuaga a le vaega faaupufai po o ni vaega faaupufai o pulea le Malo.” Lau Afioga, vaai o le manino ia, ae o lena foi o le a e tau faasipa upu o le Tulafono?

**FOFOGA FETALAI:** Malo faafetai. Malie lava le sui usufono o lo o saunoa, se i tuu atu le avanoa i le Taitai o le Itu Agai. Tulai mai lau Afioga i le Taitai o le Itu Agai.

**Afioga Hon Palusalua Faapo II:** Faafetai lava mo le avanoa ua tuuina mai ma le faaaloalo, se i faamanatu i le Afioga i le Palemia, e le tasi foi latou, sa fai muamua le latou palota e le tasi i se sui, a o lea ua tuuina mai fai mai e lua a matou sui faatutu, e le sao foi lea tuuaiga, e leai, o le mea la lea e taumafai, e pei lava ona saunoa le sui usufono...mamalu, lea na saunoa mai, ua ou faaluaina ma ou saina, ia taumafai la e faamamalu, a o lea la ua tuuina matou.....se i tuu mai se avanoa, o lea la ou te tu atu, e fia faasao.

**FOFOGA FETALAI:** O lea ua ou maua lou finagalo le Taitai o le Itu Agai, o lea o le a faamalamalama leaga e lua a tatou filifiliga lea na faamalamalama, o le filifiliga muamua, o le filifiliga lona lua, o lea o le a avatu le faamalamalama ona ou tuu atu lea o le avanoa.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le mea e fia faasao, o mea e aumai i totonu o le Fono Aoaofaitulafono, Pepa e Faatu mai ai Igoa, e lua a outou Igoa na aumai i le uluai filifiliga o Le Ao o lo o i ai nei, ae tasi lava matou. O lea la ua e taua mai mea sa fai i totonu, o mea lava na a le vaega ia, e le tau lau mai fua mea a le vaega e saili ai le tasi, ona aumai lea o le tasi aloaia i i, o mea maopoopo ma mea mamalu na lea ou te taumafai atu e avatu, ae o lena foi o le a e aumaia ni mea faale-mamalu.

Lau Afioga i le Fofoga Fetalai, o le faasaoga lena o le mea lea e tau faasese mai e le Taitai o le Itu Agai.

**FOFOGA FETALAI:** Ia tulai mai lau Afioga i le Taitai o le Itu Agai.

**Afioga Hon Palusalua Faapo II:** Faafetai lava mo le avanoa. Ae o tuuaiga ia e aumai nei e lua a matou sui, e leai, e fono muamua matou maua le tasi, e le faia ni a matou palota pei o o, aua e fai muamua le palota, ona uma ai foi lea, e le atoatoa ai foi i ai le latou vaega i le toatasi lea na aumai.

**FOFOGA FETALAI:** O lea ua maua lou finagalo, o lea ua maua le faamalamalama.....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai o le mea e fia faasao, Palu, se soia e te pepelo.

**Afioga Hon Palusalua Faapo II:** O le mea lena o lea e faamalamalama atu i tulaga o tuuaiga le moni ia tuuaiga e aumai. Se taumafai foi lea e aemaise o

le Teuteuga o le Faavae, se i tuu mai se avanoa leaga e.....e taua le mataupu lea e fai o Le Ao o le Malo.

**FOFOGA FETALAI:** O lea ua maua lou finagalo, o lea ua ou maua lou finagalo.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le mea e fia faasao lau Afioga, ina ua tapuni ia nomination ina ua tuumalo ua uma ona teu le Afioga i Le Ao Mamalu, ona faagaoioi loa lea o auala o lo o faataatia mai totonu o le Faavae i le tofia o Le o le a sosoo ma Le Ao Mamalu lea na tofia ai nei ia le Afioga ia Tupua Tamasese Efi o le Tui Atua, sa faatino la i le faiga lea e taoto mai nei i le Faavae lea e faatu atu e Teuteu, ona fono lea o le matou vaega ia tasi moemoe loa, e tasi lava le igoa e aumai i totonu ona faatumu lea o le Pepa ona ou sau loa lea aumai i le Palemene na tapuni i le 12:00, ou te oo mai toetiiti tapuni, ou te oo mai, ou fesili atu, ua aumai nisi sui faatutu, ae logo mai au e le Faauluuluga o le Clerk o le Palemene, e lua ia Pepa ia ua faaulu mai e le Itu Agai, e ui lava la ina lua ae tasi lava le Igoa lea e faatu mai, o le sao lena Palu, aua e te pepelo.

**Afioga Hon Palusalua Faapo II:** Leai o le mea e fia faasao lau Afioga.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** E pei lava e fai le mea lea, o lea lava e i i le itu lenei ia.....e lua ia.....

**Afioga Hon Palusalua Faapo II:** E le i faia se Itu Agai, e le i aloaia se Itu Agai i lena taimi, o le Paeaiga talu lena na taitai ai Le Mamea e le i i ai se Itu Agai e le i i ai matou, ioe, o le faasaoga lena o le mea lea.

**FOFOGA FETALAI:** O le a ou avatua le avanoa ma avatu le faamalamalama le Taitai o le Itu Agai.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai e lua ia itu na, e tusa lava pe a, ae sa faalupe lava o le Itu Agai. O le tulaga la lea, se Palu, se soia e te finau faavalevalea. E tiga lava ona faavalevalea le finau ae fai lava? O lea la ou te avatua, e lua i ina i le itu lena, ae tasi lava le itu lenei. Lau Afioga i le Fofoga Fetalai, o lea la e tulai atu ia le vaega lenei i le Teuteuga lea, ina ia fai mamalu a tatou tofiga.

**FOFOGA FETALAI:** O le a avatu le avanoa pe a uma le....Ia se i tulai maia le sui usufono mo Faleata Sisifo.

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fetalai, pei lava o le sao o le saunoaga a le Afioga i le Palemia, leaga pei o lea e saunoa mai i le taimi nei, ae afai foi o le taimi lena, e manatua o le taimi lena leaga e leai se Itu Agai, sa tu tu toatasi uma le tele o sui usufono, ia o le ala lea. Ia leaga pei o lena e faafofoga mai le atunuu, ai na tutupu i lo matou taimi ua faavae le Tautua, e leai, e le i tupu i le taimi o le Tautua o le taimi lea o luma atu o le isi Paeaiga muamua, ma le faaaloalo lava.

**FOFOGA FETALAI:** Ia o lea ua maua, o lea itu o le Maota, ae sa outou i ai uma. O le mea lena e le mafai ona aveesea.

**Afioga Hon Palusalua Faapo II:** Lau Afioga i le Fofoga Fetalai, o le mea e fia faasao.

**FOFOGA FETALAI:** Ia.

**Afioga Hon Palusalua Faapo II:** O le taimi lena ou te le i i i, o le taimi lena sa ou i ai i le palota lea na fai lea e saunoa i ai le Afioga i le Palemia, ioe, e le i tasi la, e le i tasi pei o le saunoaga mai o le fai mamalu i tua, na toe fai lava le palota.

**FOFOGA FETALAI:** O lea ua maua le Taitai o le Itu Agai, o le agaga lea e tau faamalamalama atu, ia manino le faamalamalama a le Afioga i le Palemia. O tatou lava mea faalotoifale i vaega faaupufai, po o fea e fesutai i ai, a tasi loa le faafitiga, ia ona aumai loa lea o le igoa e tasi, o le mea lena. O lea sa tatou i ai uma lava i le filifiliga ina ua tuua le Malo ia Malietoa ae faatino loa aiaiga o le Faavae. Ia tulouna ia lou le auai e te le i taitai i le Taitai o le Itu Agai i lena vaitau, ae sa i ai le itu i lea itu o le Maota, ma sa tatou i ai uma lava. O le agaga la lea e tau avatu, ina ia taatia i lagatonu, ia aua ne i tatou toe fefoifoiai i le mea lea e saunoa i ai le Palemia aua e le o se mea fou o lea ua faatino i le filifiliga o le Taitai o le atunuu, filifiliga o le Palemia. O lona uiga o lea ua i ai le process lea o lo o tatou i ai uma lava, o le faataitaiga lena, a faapea la lea ua fai nei i le Afioga i le Palemia, ia e talitonu foi e leai se afaina e fai i luga o le filifiliga o Le Ao o le Malo ia ma le filifiliga o le Fofoga Fetalai.

O le a tuu atu le avanoa i le sui usufono mo Gagaemauga Nu. 2, tulai mai.

**Tofa Levaopolo Talatonu (Gagaemauga Nu. 2):** Faafetai i lau Afioga i le Fofoga Fetalai, na o sina mea e toe tau faamanino atili. Ia masalo leai o le tulaga lena a o Sui Fofoga Fetalai lau Afioga, ia a matou tutu atu foi i i e fiu lava matou te fai atu o matou o le Itu Agai, ae fai mai lava o matou Tutu Toatasi. O le faasaoga la lena o lea tulaga, sa fai lava le finagalo o le sui usufono ia i lena taimi e le i i ai se tasi i lena taimi, pei o le mea lea e faapea, ai ua matou talanoa i le filifiliga o Le Ao Mamalu o le Malo, ia ae e le i faapea ua maopopo i lena taimi a o feagai ma le Afioga ia Le Mamea, faafetai.

**FOFOGA FETALAI:** Malo. Tulai mai le sui usufono mo Faleata Sasae.

**Tofa Aveau Tuala Lepale Niko Palamo (Faleata Sasae):** Faafetai i lau Afioga i le Fofoga Fetalai, ua ou tulai atu, i lou lava talitonuga e sese le faaupuga lea fai mai o le Itu Agai i le taimi lena aua o lea faatoa faatu le Tautua, a silasila mai foi i le Itu Agai i le taimi lena, a, o lea e i ai le vaega faatoa omai i nei i le Palemene, o lea la ou te tatalo atu ai, e tataua ona aveese le faaupuga lea e toalua sui usufono o le Itu Agai, ae alu pea i le vaega Tutoatasi po o le SNDP lea sa i ai muamua, leaga e aafia ai le Tautua, o le Tautua lea faatoa lesitala i le Paeaiaga lena, ma le faaloalo lava.



**FOFOGA FETALAI:** Ia, ne i mau eseese le faafofoga a le sui usufono, o le saunoaga lava ia a le Afioga i le Palemia, e le o le Tulafono lene faapea o le a tulituliaupu e le Tautua na faia le mea muamua, leai, o le faamalalamamaga lea na avatu, o mea sa tutupu, ia afai foi la o le tulaga o le faamalalamamaga o sui tutoatasi, ou te talitonu o le lava e tasi, ae o le a.....Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, pei o lea ou te tau faapaiaina le vaega lea, aua e le mafai ona tatou iloa ni aluga, ua fia ea ni Itu Agai? ua fia ni Itu Agai? O lea la ou te faapaiaina i le tau aloaia. E le iloa foi la pe uma atu lea palota e le atoa foi se toavalu, ia ona faapena foi lea. A o lea, o aga o upu i totonu o le Palemene ma le vatapuia, i le va o tatou i totonu o le Palemene, e le mafai ona avea le tulaga o le vafealoaloai. O le mea la lea, se aua, soia ia le soona tetena le tofa i mea le taua o mea faatauva, a o le tulaga lene na i ai. E le tasi le nomination, e tolu nominations sa i ai.

Lau Afioga i le Fofoga Fetalai, e faapefea la pe ana sau le isi nomination e ese le mea e agai i ai? Ona tatou o loa lea i le malafoni lea e matua fai lava le palota o le maimau o le tatou taimi. O le a le mea e maimau ai le taimi? Aua foi o le itu lava o lea e tu i le Malo, o le itu lene e agai i ai le faaiuga. O lona uiga la, e le o se mea e taumate le mea lea e faatu atu e le Tulafono, o lea e faatu atu le mea faigofie, manino ma o le mea e tatou te mautinoa, o le mea lene e tupu. O lona uiga la, na ona tatou o fua lava e faaumiumi vale ai ia a tatou galuega, a o le tulaga lene, o le Malo lava e tulai mai i lea taimi, o latou lava na e faia le faaiuga.

Lau Afioga i le Fofoga Fetalai, e pei na ona teuteu i upu, a o le mea e moni e tupu i le taimi lene o lea e taumafai atu e faaupu atu ai le Tulafono.

**FOFOGA FETALAI:** Malo faafetai. Ia e manatu ua manino ma malamalama le folasaga. Malilie foi sui usufono, e tataua pea ona faasaoina, o le taimi lea e le i tulai mai le Tautua, e sao lava outou, o le tulaga lene o le mea lene e tataua ona faasao. A o le tulaga lava ia, ia o le Itu Agai, a o le agaga lene ma le faamoemoe o lea ua manino ma malamalama, po o fea lava le itu lea o le Maota, ia e faalagi lava outou o le Itu Agai. A o lea ua faamaonia ma faasaoina o le taimi lea e le i tulai mai le tatou vaega faaupufai i lona tulaga aloaia, ia e manatu ua malamalama le mataupu.

Ia tulai mai le sui usufono mo Faasaleleaga Nu. 2.

**Susuga PAPALII LIO FAAVAIVAIOMANU TAEU MASIPAU:** Faafetai i lau Afioga i le Fofoga Fetalai, e.....

**FOFOGA FETALAI:** E faamanatu atu i sui usufono mamalu, malie lava le sui usufono mo Faasaleleaga Nu. 2, o le tatou Tulafono Tau Faaofi lenei e tai 20 minute a le sui usufono e lauga ai, ia tapenapena lelei ina ia mafai ona manino ma malamalama ma faapuupuua ia aanoa manatu ma lagona o sui usufono, ina ia aua ne i faaalua le tatou taimi. Ma lou faaaloalo, tulai mai le sui usufono e faaauu le saunoaga.

**Susuga PAPALII LIO FAAVAIVAIOMANU TAEU MASIPAU:** Faafetai i lau Afioga i le Fofoga Fetalai, e le o taua lava i lau lauga se isi itu, o lea ou te agai tonu lava i le Tulafono Tau Faaofi, leaga o lea e faalogologo lou itumalo, faapea e le o sauni lou sui usufono. Lau Afioga i le Fofoga Fetalai, o le sui usufono lenei e sau i le Maota lenei ua tapena i so o se ituaiga mea, e leai ma se vaipanoa o le Tulafono Tau Faaofi ou te le i faitauina, ioe. O le sui usufono foi mo Safotulafai e le pa oso, e oso lava ma le mautinoa.

**FOFOGA FETALAI:** Malie le sui usufono se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea lena o lea na ou tulai atu ai, atonu sa e tapena lelei i isi Tulafono Tau Faaofi, a o le Tulafono Tau Faaofi lenei, ua matua e le tapena lava. O le mea la lea na ala ai ona ou tulai atu, ona e matua sese lava i Sini pei o le mamao o sasae ma sisifo le mamao o le mea lea na e lauga ai ma le faaupuga o le Tulafono Tau Faaofi.

**FOFOGA FETALAI:** Ia, tulai maia le sui usufono, ou te manatu o lea ua malamalama lou finagalo.

**Susuga PAPALII LIO FAAVAIVAIOMANU TAEU MASIPAU:** O lea la o le a ou fai atua lau tapenaga. I totonu o le suiga lea e sau nei, o lea e sau ai le upu tofia, a ua aveese le upu filifilia lea e i totonu o le tatou Tulafono tuai. O le filifilia la lea ou te talanoa atu ai, ua aveese ai le mamalu o le Palemene ma lana filifiliga. O lea ua tuu mai na o le tofia, ia o le faapapalagi na o le omai lava e endorse a, a ua uma le filifiliga o le Vaega Faaupufai. O lea ou te malamalama lelei i le suiga lea e aumai. E leai, e le faapea ou te le o malamalama i ai.

**FOFOGA FETALAI:** Malie le sui usufono se i tuu atu le avanoa i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, se i fai atu si mea sia. O le upu faaiu o mea uma, o le tofia. O le mea lena e taua, aua a le tofia le tagata, na te le umia se tofi. A o lea o le a sau i le mea le taua, ae tuu le mea taua. Ia faataua le tofia o le tagata. O ai e tofia? O le Palemene. O le mea aupito sili lena ona taua o le tofia.

**FOFOGA FETALAI:** Ia, tulai mai le sui usufono e faaauau le saunoaga.

**Susuga PAPALII LIO FAAVAIVAIOMANU TAEU MASIPAU:** Ia, lau Afioga i le Fofoga Fetalai, o le agaga lava ia o lou sui usufono, tate fia filifili, tate fia i ai i le filifiliga. E pei o le agaga tonu lea. O le agaga ia pei o le mea lea sa tatou sau ai, e omai ai nei tatou filifili faatasi.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e le o taofia foi oe i le filifilia, a e fia i ai i le filifilia, vaai, maati lau vaai ia e i ai i le vaega e faia le filifiliga.

**FOFOGA FETALAI:** Tulai mai le sui usufono mamalu.

**Susuga PAPALII LIO FAAVAIVAIOMANU TAEU MASIPAU:** O lea ua uma ona saunoa le Afioga i le Palemia, o nei lava ata uma e fai, e auga lava i le Vaega Faaupufai o la e faia le Malo. A o se avanoa mo e o le a tutu atu i le Itu Agai e fai so latou sao, fai so latou leo, ioe, na ona fai atu lava, o leo e tau atu, o leo e fai atu, ae fai lava le mea tou te finagalo i ai. A o le agaga ia, o le taua ma le mamalu lea e taumafai atu ai lou sui usufono ina ia tatou veloaso uma i ai.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o tulaga mamalu na. O tulaga aupito sili ona mamalu lea e tau i le upu tofia. O le sao lena, o le tulaga aupito sili ona mamalu lea e tau ai le paoa, o lea e i le upu tofia. O ai e faia le tofiga? O le Palemene lenei, lea e atoa uma i ai tatou uma. E te fia alu e te fia palapala? O le galuega o le filifiliga o le galuega e palapala ai ou lima. E te fia alu e faapalapala ou lima? E te le fia palapala. O le mea foi lena na e manao ai e te Papalii, ia e saofai i i, e te le fia taulealea.

Lau Afioga i le Fofoga Fetalai, o tulaga mamalu na e tau i totonu o le upu tofia, e fai i totonu o le Palemene lenei, o lea e i ai le paoa, le paoa ma le mamalu o le atunuu atoa lenei.

**FOFOGA FETALAI:** Se i tulai mai le Taitai o le Itu Agai.

**Afioga Hon Palusalua Faapo II:** Lau Afioga i le Fofoga Fetalai o se mea e fia faamalalama. O le malamalama lava lea o le Palemia ia fai mai e mamalu le tofia, mamalu le tofia e tofia e se toaititi ona omai lea i i endorse atu ai. A o lou talitonuga lau Afioga i le Palemia, ua matua le mamalu. Se i silasila i le tofia o le Le Ao o le Malo talu ai i le mamalu ina ua e faatuina mai ae ou faaluaina? O le mamalu lena. A o le mea lea fai mai o le tofia, lau Afioga i le Palemia, e le o se mamalu lena mea o le faitoatasi e outou.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o lea lava e i ai lou leo i le taimi e fai ai le faaiuga faaiu. O le tulaga lena. E le o le amataga, a o le faaiuga. Ua e faitau i le Tusi Paia? E le taua le taimi na e fanau ai, ae taua le taimi na e oti ai. E le i soona faia la upu nei, o upu e paia, o le Tulafono foi e paia, leaga e mai le Tusi e Paia.

**Afioga Hon Palusalua Faapo II:** Lau Afioga i le Fofoga Fetalai, ua fai soo lava le saunoaga lea a le Palemia o le alo agai i le Tusi Paia, ioe. O le a faapefea ona fai mai o le manuia i le oti? O le a la le aoga e aumai ai le tofiga

lea ua ou oti? Ioe. O le mea la lea ou te fai atu ai, aua le alo i le Tusi Paia e faalafi ai mea ia e aumai nei.

**FOFOGA FETALAI:** Ia, e manatu e le tatau. O le agaga lava ia ma le faaaloalo, o le tatou Maota nei ua toetiiti ona tuu lea o le Tulafono Tau Faaofi ae tatou o e fai le Mataupu Silisili. E leai foi sou manatu faapea, o la e faafofoga le atunuu. O le mea lea o le fai ma tatou tapatapa i le Tusi Paia, o lou talitonuga, e leai lava se isi mea tatou te o e tuli i ai le faamaoni, aua o le tagata e tautala i le Tusi Paia ae pepelo, ia ou te le iloa le mea e oo i ai, aua o i o le faamaoniga lena o tatou upu ia e fai. Ae aua tatou te lafo, aua e gagana ai le atunuu i faapea o tatou faaaogaina le Tusi Paia tatou te alofaga i ai. E leai, o le Maota lenei i le tatou filifiliga ina ua uma le faatautoga o outou, na tufa uma atu a outou Tusi Paia e faitau lelei. O le a le mafuaaga o le mea lena? E tolu lava tusi, faitau le Tusi Paia na avatu, faitau le Faavae o le Malo, faitau le Tulafono Tumau a le Maota. O le mea lena o lea e limataitaiina ai le tatou Maota. Ia aua ia e te atugalau lau Afioga i le Taitai o le Itu Agai. O nisi foi taimi ua masau foi lau Mataupu Silisili, o la e foi e avatu e nenefu i le la pito o le Maota. O le agaga lena, ae aua tatou te manatu faapea ua tatou o ma tatou toe manatu, ua fai ma ata o le laua lenei mea o le Tusi Paia tatou... E leai. Le paia o le Maota, e leai se isi tusi e sili atu ona tulituli ai le tatou faamaoni, o le tatou tautata i le moa o le ala i le Atua ma Lona finagalo.

Tulai mai le sui usufono mo Faasaleleaga Nu.2 ou te iloa ua manino lau mataupu. Ia, se i tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ou te tulai atu e momoli atu le faamalo i lau taitaiga o le tatou Maota nei. E sao oe, e tatau lava ona fai ma tatou tapa i taiala, ae leaga e leai lava nisi taiala, a o le tatou Malo foi e Faavae i le Atua. O lea foi e faitioina ai le Malo, faitioina ai au o le alu alu lava o lea tusi i le nusipepa. Afai atu se mataupu ae ou nofo ma aumai upu o le Tusi Paia, ae le vaavaai i le Tulafono Faavae. O le Tulafono Faavae ma le anoano o le mau Tulafono, o le auau lava o Tulafono a Mose, o Tulafono e tau ai Mose a o Tulafono e sefulu. O le auau atoa lava na o Tulafono. Po o le a lava le talatala, ae agai lava i i, o le amataga lava lea. O le auga uma lava ma le faavae o Tulafono, o Tulafono a le Atua. E faapena foi la i le tatou Faavae.

Lau Afioga i le Fofoga Fetalai, o le auau atoa lava o nei Tulafono ma le anoano o mea tatou te faia, e tasi lava le mea e agai i ai, o le Tulafono Sili o le Alofa. Lau Afioga i le Fofoga Fetalai, o lena. A o le upu foi faapea e faitio mai, ia leaga o upu o upu na o le Tusi Paia, e le o le amataga a o le faaiuga. E le o le aso na e fanau ai. E le o le amataga la a o le faaiuga. A o lea foi e manino lava upu a Tavita, so o se taimi lava e taoto mai ai e foliga mai ua i ai le laolao ua tatau ona oo ai le lima o Tavita ia Saulo, ae tasi lava le upu a Tavita, "E le mafai ona ou tagofia le tagata ua uma ona faauuina." O le upu lena. Ua uma ona faauuina. O lona uiga, o le tofia, o le faauuina, lea e fai e tatou. E le mafai ona tagofia e Tavita Saulo o le tagata ua faauuina. O le taua lena o le Tulafono. A tatou talanoa i le tofiga, o lea ua faauuina. E ai? O le galuega a le Maota lenei, a o le Maota lenei ma le Palemene lenei, o le tatou Malo o le Malo e faavae i le Atua. O le mea la lena, malie lau Afioga i le

Taitai o le Itu Agai, o oe foi e te laulauvivilu i le Tusi Paia, a o lea a oo ina matou talanoa i le Tusi Paia ae e faitio.

O le mea la lea lau Afioga i le Fofoga Fetalai, o lau toe tulai atu lena, faamalo i lau taitaiga, ua e toe aumai i tatou uma i totonu o le moa o le ala. O le tele o taimi e feagai ai tatou ma faafitauli, tatou te feiloai feiloai lava ae tatou te maua lava le tali i le toe foi i le Tusi Paia.

Lau Afioga i le Fofoga Fetalai, o lau toe fesoasoani atu lena.

**FOFOGA FETALAI:** Lau Afioga i le sui usufono mo Faasaleleaga Nu.2, ou te manatu ua manino ma malamalama lou finagalo, manumanu i lou taimi. Toe lima ou minute.

**Susuga PAPANII LIO FAAVAIVAIOMANU TAEU MASIPAU:** Faafetai mo le avanoa i lau Afioga. Na pau lava le mea e fia faailoa atu, e leai, i le vaai lava ia a lou sui usufono, o le upu lea o le tofia o le upu faa-Komunisi. A o le filifili, e soalaupule, o upu faa-Temokarasi. O le filifili lena, e soalaupule. Ae a tofia loa, ia o lena. O le agaga lena. Ae o le a ou see ese. O lea ua faamau le teena e le sui usufono mo Faasaleleaga Nu.2 o le vaega lea o le suiga o le tatou Faavae, ioe.

Ona ou see mai lea i le Palota Taitoatasi, ua leva ona ou faitau, na aumai loa i le Aso Faraile ou faitau i le Tulafono Tau Faaofi ma le weekend atoa ma le Aso Sa ananafi, na tuua loa foi le lotu ou faitau ai. Ua malamalama lelei i totonu i mea ia, talofa e. E pei o le agaga lena o lea e tau....

**FOFOGA FETALAI:** Malie le sui usufono se i tuu atu le avanoa i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, ona o le sui usufono foi lea o lo o saunoa nei o le alii loia. Ia o le a faitau atu e au o le doctor of laws. “Fuaiupu 18. O le tofiaina o le Ao o le Malo o le a filifilia e le Fono Aoao Faitulafono i le faia i luga o le fautuaga a le Vaega Faaupufai.” Ia, o le fautuaga, o le fautuaga a le Vaega Faaupufai o lo o tulai i le foe. Ua ou manatu e faataua le upu lena i lou finagalo, o le fautuaga.

**FOFOGA FETALAI:** Tulai mai le sui usufono mo Faasaleleaga Nu.2 e faaauau le saunoaga.

**Susuga PAPANII LIO FAAVAIVAIOMANU TAEU MASIPAU:** Ia, ou te iloa o lea o le a ou see ese. Po o le fautua po o le a, o le tofi lava o le mea lena. O le tama o la e ua uma ona tofi mai, e fautua mai lava i le Maota ua uma ona outou tofia maia, ae o lea o le a ou see ese ma le mea lea.

**FOFOGA FETALAI:** Malie ia le sui usufono se i tulai mai le sui usufono mo Siumu.

**Tofa Hon Tuuu Anasii Leota (Siumu):** Faafetai mo le avanoa. Ou te fia malamalama i le saunoaga a le Afioga i le Palemia. O le fautuaga a le Malo, ae ou te fia iloa po o le a le mea o i ai nei, po o ai lea e fautuaina le aumaiga o le Ao o le Malo i le Palemene. Ma lou faaaloalo lava.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Faamalo i le fesili. O le faiga lea o lo o i ai nei faiga tuai, e aumai le faatu faafautua mai i le Palemene, ae auala mai la i le normination po o pepa faatumu ona aumai lea. O le agaga o le Faavae sa i ai i lene taimi, sa amata i le 47 sui usufono. O lona uiga la, afai lava e tofu le sui usufono ma lana ia sui e faatu, o le mea e ono oo i ai, e mafai ona oo atu i le 47 sui faatu e aumai i totonu o le Palemene, mulimuli ane ona toe faaopoopo lea o le lua i le isi foi Teuteuga o le Faavae i le tausaga e 1991. O lea la na faaopoopo ai sui e lua, mo Safata le isi ae ave le isi i Salega, ona 49 ai lea o sui usufono o le Maota lenei. A faapea la e mulimulitai i le faiga lea ae tupu mai se faiga e tofu lava le sui usufono ia ma lana fautuaga e aumai faafautua e faatu mai i totonu o le pepa lenei o lo o moomia i lalo o le Faavae ona aumai loa lea i le Palemene, o lona uiga e ono 49 foi sui e faatutu mai e fai i ai le palota a le Palemene. O le faiga tuai la lea, a oo la ina faatino i le faatinoga tuai lea sa i ai e tasi lava le suafa na faatu mai e le Vaega Faaupufai. E aumai faafautua aua e le mafai ona tofia e se Vaega i tua, ae tofia i totonu o le Palemene. O lea la na aumai aloaia i totonu o le Palemene ma e lua foi la isi igoa na faatu mai, ma o le a ta'u ia na faatu mai e sui usufono o le la Itu i o o lo o feagai ma le Malo. O lona uiga la e tolu igoa ia sa fai i ai le filifiliga a le Palemene, ae talu ai la ona o le tolu lava lea a o le tagata foi e tasi, o lea la na leai ai se palota e faia, ae malamalama lava le mafuaaga. O le mafuaaga na faatu ai suafa ia ona o taimi na e leai ni faiga Vaega. O le mea la talu ai sa ou valaau i le Taitai o le Itu Agai, "O le iuga lea a le HRPP ua uma ona fai, ma o le iuga e tasi lava o le a ave e fautu ai i le Palemene. A finagalo foi i ai lau Afioga ma lau Vaega, ua lava le tasi ona e sau lea e te saina i le pito lene i le itu tauagavale ae ou saina au i le itu taumatau."

Na fai si a ma talanoaga lelei lava i luma o le Kalaka o le Maota nei ona ma taufai saina ai lea ma ave loa i o. O lea e manaia le faiga lea sa fai ai talu ai i luga o le va lelei o le Afioga i le Taitai o le Itu Agai ma au, ae tatou te le ma iloa le agai atu i le lumanai i nisi foi tulaga vevesi. O le tali la lau Afioga, e pei la o le fautuaga a tatou nei o le Vaega toatele e ave ma ua aumai foi i ai le finagalo ioe o le Afioga i le Taitai o le Itu Agai, lea na faigofie ai e le i tau faia se faiga palota. A o le tulaga lava i le taimi nei ma le faaupuga lea o lo o i ai, e le ma iloa pe alu, alu ona tulai mai lea e manaio lava le tagata ia e faatino aiaiga o le Faavae la e i ai, aua e mafai lava ona 49 igoa e ave i o e faatino i ai le tofiga a le Palemene pe afai e faaauau pea le vaega lea o lo o i ai nei, a o le mea lea e avatu e le Vaega lenei o le lafo mai i le Vaega e faia, aua e le iloa pe oo atu i le Faiga Palota lea ona see atu lea o lenei Vaega nonofo mai i ina, ae see mai oe Palu ma lau Vaega i inei ona ua toatele, ona e faapea loa lea, "Oi se e sao lava le mea lea na finau mai ai le Malo." E le mafai ona iloa e tatou le lumanai, a o lenei taimi ia fai so tatou sao, ia faataoto se mea lelei ma faigofie, manino ma le fenumiai e mulimuli mai ai aua tupulaga o le lumanai.

**FOFOGA FETALAI:** Malo faafetai, ua manino ma malamalama fesili a sui usufono. Tulai mai le sui usufono ua malamalama faaiou lou taimi.

**Susuga PAPALII LIO FAAVAIVAIOMANU TAEU MASIPAU:** Faafetai lava, ma o lea ua agai lau lauga i le suiga tele lea i sui o le Taulaga.

O le agaga lava ia e le mafai ona tuua e lou nei sui usufono o le vaavaai pea i nei suiga ma tuu fesili pe na mafua aisea na faavae nei tofi e tuua ua mavae ma le mea o lo o i ai i le taimi nei, pe ona o le faatauaina o le sao o nai ia vaega o le atunuu le au totolua, se i vaeatu lava le faafofogaaga a le Maota ma le faafofoga mai a i latou nei, ae ou te talitonu e i ai se taua na ala ai ona faatauaina e tuua ua mavae se sao mo le atiaeina. E pei o le agaga lena o lea ua toe vaavaai ma matamata i ai ma o lagona na, o lagona i se taua ma ni galuega lelei sa fai e o latou tuua ua mavae.

O le tulaga foi lea ua i ai nei, o lea ua suia i suafa matai ma ua suafa matai mai i lea afioaga ma lea afioaga, a o le mea e sili o lea ua faataunuu finagalo o le Maota ia faasuafa matai. A o le tulaga o i ai e pei o le agaga lena. O lou foi sui usufono ou te alofa i nei sui usufono. E moni lava i le mafutaga ma le agai i luma, ae ou te talitonu lava o lea e sologa lelei i lau lea vaai faasui usufono ma e taua foi o latou sao ona e le faapito i se itumalo, ae aoga mo lea itumalo ma lea itumalo ma le lautele o le atunuu. E pei o le uiga lena o lou manatu ma lou agaga, ou te talitonu e le o i ai foi le agaga o lenei sui usufono i lea suiga o lenei vaega o le Faavae. E i ai lava le manatu ia faatumauiina pea e o lo o i ai i lenei taimi ma nei foi Nofoa.

Ona ou oo mai lea i le filifiliga o le Fofoga o le Fono. Lau Afioga i le Fofoga Fetalai, toe pau lava lea uma loa. O le mea taua lava i le agaga o lenei sui usufono, o le mamalu o le Nofoa o le Palemene. E talitonu lava au ia, o lea lava e lelei o lea e i ai i lona tulaga tuai, ae i ai le faaopoopoga lea e i ai ua na o se fautuaga lava. E le tuua foi o matou lagona, e le oti foi i tua o matou lagona aua o le agaga lava ia, e manatu i le tutoatasi o le Nofoa o le Palemene.

I lau lava vaavaai i ai aemaise lava le atunuu lea o Saina na ou malaga i ai, e ese le taua o le Fofoga Fetalai i lau vaavaai i ai i le faaeaea a lea atunuu i le Fofoga Fetalai. O lau foi la tilotilo ma lau vaavaai i ai, o le agaga foi lena. E manatu lava o lea e manaia le filifiliga lea e i ai aua e filifili lava e le Vaega Faaupufai o lo o toatele, a o le fautuaga lava ia i lau lava vaai e tatau lava ona tausii mamalu ma ave le tatou faamua ma tatou faamamalu le Afioga i le Fofoga Fetalai. O fautuaga lava ia e tuusao, e le tatau ona toe i ai le Fofoga Fetalai i fono faa-Vaega Faaupufai. O upu tuusao lava na o lea e avatu e lou sui usufono aua o la ua uma le tofiga ua saofai i le Nofoa, ae a oo loa i faiga faavae faa-Upufai e pei e manatu i le mamalu o le Nofoa ma ia faatumauiina pea le faaeaea aemaise foi o le Taitai o lenei Tafatolu taua o a tatou Faigamalo, o le Fofoga Fetalai. Aua e ui lava i isi Tafatolu ma isi gaoioiga, ae e pei e auga ma e pei e agai uma mai lava i le Maota Fono o lo o taitaia e le Fofoga Fetalai.

O nai manatu ia ae i ai le agaga o le a fesoasoani mai le Agaga o le Atua i le tatou Palemene aua foi lenei Tulafono Tau Faaofi taua. Ma le faaaloalo lava lau Afioga i le Fofoga Fetalai.

**FOFOGA FETALAI:** Malo, faafetai saunoa i le sui usufono mamalu. E manatu ua manino ma malamalama ma ua avea foi le tamua o lau Afioga i le Alii Loia ua tele ai lava le malamalama o le tulai mai o lenei Tulafono Tau Faaofi taua.

E faamanatu atu i sui usufono mamalu e le i saunoa leaga o lea ua faagasolo le tatou debate, o lenei Tulafono Tau Faaofi, e uma ona tuu atu loa lea i le tatou Business Committee. Ua outou silafia e le o le iuga lea o le tatou

mataupu, ae tele lava le laolao o lea o le a faaleo ai finagalo o le Maota, ae e le punitia ai foi sui usufono mamalu i le faaoo o outou finagalo i le Komiti.

O le Business Committee o au nei o le Taitaifono, o le Afioga i le Palemia, o le Taitai o le Itu Agai, Tofa Lealailepule, o le Afioga i le Alii Loia Tofa Lefau, o le Sui Fofoga Fetalai ma le manaia o le Palemene Tofa Hon Tuuu Anasii Leota. O le Komiti lena, e matua tele le taimi e afifio atu ai foi aua e le o se mataupu e faatumutumu lima. Ina ne i augani tele lo tatou Maota i felafolafoaiga, ae e le o le iuga lea o le a tatou agai i ai. O lea e soalaupule, o lea foi tatou te fesuatai. Ina ne i o tatou faavaivai loto i le au palota taitoatasi ae leai, o lea e tele avanoa ne i meaane ua oso se toto maualuga o se isi. Ae faafetai Papalii, ua manino ma malamalama le folasaga ua atagia ai le naunautaiga ma le sauniuniga a sui usufono taitasi, ae na ona ou faamanatu atu. Ne i tatou toso le laau felefele ae na o le 20 lava minute e faaleo ai tulaga i a tatou Tulafono Tumau i totonu o le Maota. A o le faalauteleaga e 90 aso, e 90 days. E le i lalo ifo o le 90 le taimi e tuuina atu e le Komiti lena. O le avanoa la lena a uma loa le tatou Fono, ona amata loa lea o fono a le Komiti o Faiga Palota. O lona uiga e tele a tatou consultation e soalaupule ai mataupu ia ma le mataupu lea i lo tatou Faavae. O le faamalamalama lena.

Ua avanoa le Maota mo se isi sui usufono e fia saunoa. O lea o le a lafo i lea Itu o le Maota nei, tulai mai se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi se i vavae foe.

**Afioga Hon LEAUPEPE TOLEAFOA APULU FAAFISI (Aana Alofi Nu.1):** Faafetai mo le avanoa ua mafai ona maua. E faatalofa atu foi i lena taeao fou i lau Afioga i le Fofoga Fetalai faapea foi le Taitai o le Malo le Palemia aemaise o le Palemene aemaise foi o lea Itu o le Maota i le Taitai o le Itu Agai.

E le umi foi se manatu e fia faaalua i lena Teuteuga o le Faavae. I le toai taunuu i lena taeao ma maua le Teuteuga o le Faavae, sa lagona lava le faafuaseia o le manatu ma sa tulai mai se agaga e matua tetee i lena Teuteuga. O le agaga lea sa tulai mai i lena taeao, e matua tetee lava i le Teuteuga lena ona o mafuaaga ia. O mafuaaga sa tetee ai vaeatu le paia o le Fono ma le tapuai mai a Samoa. O mafuaaga o le tetee i lena taeao ona e pei e foliga ua aveese ai le mamalu o Lana Afioga Mamalu O Le Ao o le Malo ma lona tofiga i se isi itu. O le isi foi itu o lea e pei ona tau faamalamalama mai e le Afioga i le Palemia.

O lona lua o le tetee ona e le i atagia i le faalogo e i ai se Teuteuga faapea i luma o le Palemene lena e auala mai i le Vaega ma le tulaga ua i ai lena taeao. E ui i lea, ua avea le saunoaga i lena taeao a le Afioga i le Palemia e pei ua malamalama ai itu eseese uma e pei ona finauina mai foi e le Taitai o le Itu Agai ma le sui usufono sa saunoa nei mo Faasalelega Nu.2, ua fai ma mea ua matauina totoa ai ma faapena ona maua ai se lagona. O le ala lea o le vave tulai atu ina ia faaalua se manatu ua mafai ona maua e se tasi o sui usufono mo Aana Alofi Nu.1. O lea la ua maua se lagona e faafetai atu ai i lau Afioga i le Taitai o le Malo. O lea ua manino o le taotoga lea ua taoto ai le Faavae sa faataoto e tuua ma matua i na foi vaitau, ma e leai ni Vaega Faaupufai sa i ai ma sa tulai mai o le tulaga lava lea. Sa fesili foi le mafaufau pe mafua aisea ona sui pe afai o la e lelei.

E pei o fesili anoa ia sa tulai mai i le manatu pe o le a le mea ua finagalo ai i lena taimi e sui pe afai o lelei, ae ua avea le felafolafoaiga ma le faapupulaga a le



Afioga i le Palemia ua fai ma mea ua lagona ai ua malamalama ma ua oso ai foi le agaga e fia faafetai i le Taitai o le Malo, le Sui Palemia ma le Kapeneta ona ua fai lenei Teuteuga o le Faavae aua e ui lava foi i le eseesea o faaliliuga o filifiliga ma le soalaupule, ae a iu le filifiliga ma le soalaupulega i se tulaga e aupito sili ona lelei, ona fanau mai ai lea o le tofiga. Ona fanau mai loa lea o ai ua tofia, ae fanau mai i luga o le tofiga ma le fautuaga ua tuuina mai i totonu o le Palemene. O lona uiga o la lava e tamau i le mamalu ma le matagofie e pei ona sau ai. Afai ua faapea ona faatino i le tofi Palemia, o lea foi ua faapea ona faatino i le tofi o le Fofoga Fetalai ma le Sui Fofoga Fetalai. Aua o tofiga ia e tofia i totonu o le Palemene e ala i le pule a le Maota. O lona uiga o lea foi e mamalu ai ma le tofiaina o Lana Afioga Mamalu O Le Ao o le Malo, se i tulou le faafofoga tapuai mai a Lana Afioga Mamalu O Le Ao o le Malo.

Ona pau lava nai itu sa ou manatu au ia aua ne i aveesea le mamalu o Lana Afioga Mamalu O Le Ao o le Malo ona o le faa-Ao o le Tafatolu, ae ua avea la le faamalalamaga a le Afioga i le Palemia ona o finagalo lagalaga o sui usufono mamalu; ou te faafetai atu ai i sui usufono mamalu e pei ona saunoa. Ou te masalo o le agaga lava lea e tasi sa ou le malamalama ai, a o lea la ua ou malamalama nei o lea ou te momoli atu ai le faafetai. E faafetai atu i lau Afioga i le Palemia ma le Kapeneta e tusa ai o le Teuteuga o le Tulafono Tau Faaofi ua tuuina mai aua e le i soona tofiaina foi e le Atua Mose ina ia sau e taitai le fanauga a Isaraelu. O ia mea uma tatou te toe tepa ai i tua i le Tusi Taiala o lo o taitaiina ai le soifua lelei o o tatou tagata ma le Agaga Faa-Kerisiano ina ia mafai ona tatou maua le malamalamaga e faafaigofie ai a tatou mataupu.

O le mataupu e uiga i itumalo Palota Taitoatasi, o au ou te nofo lava ma lou faanoanoa aua o a tatou Tulafono Tumau e taua alalafaga ma faasinomaga o sui mamalu o le Palemene i o latou itumalo palota. O lo o faapea lava o le Palota Taitoatasi po o le palota o Samoa aoao. Ua ou manatu ua tele lava le tatou solitulafono i lea itu, e ui i lea sa musu lava se lagona e lagaia ona o le agaga o tonu ia ma sao i faamaumauga a le Fono aoao, ae ua ou manatu e aupito sili lea ma taua pe a tuu mai i le taulaga. Ina ia faamaopopo mai i le taulaga e e aafia i le Palota Taitoatasi, ae o lo o faapena ona salafa i itumalo ma afioga i tua.

Ua leva lava ona tautalagia i futia ua sola ma paeaiga foi ma Palemene i nofoaiga talu ai ina ia faamuta le tulaga lenei, ua ou manatu o se taitai e fefe e faatino le amiotonu ma le tulaga e tatau ona i ai i lea paeaiga i lea paeaiga, ni faaiuga tatau ma ni faaiuga talafegai, ua outou faafofoga ma tatou malamalama i le faaiuga ma le iuga o le taitai e palaai e fai le tonu, e fai le mea e tatau ona fai, o le mea la lea ua ou manatu ai, o tonu uma lava ma miti o lea sa faatino e le taitai o lo o faatautaia le faigamalo i lenei vaitaimi, a lea e taunuu, o lea e taunuu lelei, sa ou fia tulai atu lava e fesoasoani i le mataupu lea na mafua ai ona see mai le taitai o le Itu Agai i i avea ma taitai o le itu lea e agaia nei le Malo. Na see mai le taitai se tasi o sui mamalu o le aiga malosi, o le tetee ina o le a sui auala taavale, itu e feoai ai taavale ma le suiga o le itu o foeli o taavale fai mai o le a feoti ai tagata. O lea la ua taunuu le miti leai na o le manuia ma le tamaoaiga o le atunuu la e i ai, ae o lea ua see ai lona vaa. O lea la ua tulai atu ii. Pei ua ou manatu e faaali atu le tulaga lea ona o miti nei a le Malo o miti o lea e taunuu i le taunuuaga lelei. Afai foi o le finagalo lea o le Malo e faamuta le tulaga o o tatou uso ia i le Palota

Taitoatasi, ia e taunuu lelei foi lea tulaga, aua e leaga e leai lava se mea e le o fesoasoani mai i ai le Atua, i tonu fai ae faamoemoe i le Atua. Aua o le tagata lava e fuafua, e le faapea o le Atua e faia le tonu e leai, o tonu tatou te faia o le tagata e fuafua tapena saili ae faamoemoe i le Atua na te faataunuina i le tulaga manuia. O le matou leo lea, e i ai nisi teuteuga e pei ona i ai, o le Komisi o Sulufaiga e selau pasene, leaga ua soli faatuaoi le aia tatau lea ua i ai, e tatau ona i ai se isi e tosia le laina ma fai ma sulufaiga o le atunuu aua ua soona soli le aia tatau. O le matou tala lea ma le faaaloalo. Manuia le tapuaiga a Samoa. Faafetai mo le avanoa.

**FOFOGA FETALAI:** Malo faafetai saunoa i lau Afioga o se tasi o sui usufono o Aana Alofi. E momoli atu le faafetai tele mo le folasaga ma le sao taua mo le tatou Tulafono. Ona ua tatou taunuu i le taimi malolo ua manatu ai ua tatau ona fai se tatou malologa.

*Na faataatia ese Taualumaga a le Fono Aoao mo lana malologa masani i le itula e 10.45 i le taeao ma toe faaauau i le itula e 11.20 i le taeao.*

**FOFOGA FETALAI:** E talitonu le faamoemoe o lea ua tatou taunuu mai i le malologa o le taeao, ma e i ai le talitonuga ua faafoisia lo outou malosi i la le tino e ala i le taumafaga ti ma ua matu i fau ma palega auau le taliga o le sua i lenei aso. E faamalulu atu foi i le mamalu o lenei Maota, o le a se faifua ua tauaao i ai le Failautusi ma le Matagaluega o le Fono, o le agaga ma le faamoemoe ia maua se taliga ti lelei aua le maua o lo outou malosi i le tino e faaauau ai le tatou galuega.

E fautua atu pea le Fofoga Fetalai e ala i le tulai mai o le tatou Tulafono Tau Faaofi o lo o talanoaina nei, e le tatau ona faataataa a luga manatu ma talitonuga, ona o le tasi foi lenei o Tulafono Tau Faaofi o lo o faagasolo i luma o le tatou Laulau a Fono. Na ona faamanatu atu nisi o tulaga ma aiaiga o lo o aafia foi i isi a tatou Tulafono ua uma ona tatou talanoaina, o le Tulafono lea o Faiga Palota, ne i meaane ua laa tele saunoaga a sui usufono mamalu agai i le Tulafono lea o le vaevaeina o itumalo taitasi i le tulaga o le Tulafono o Faiga Palota, a o lea ua maea ona tatou soalaupuleina. A o le tulaga lava ia i le Teuteuga o le Faavae, na o se vaega ina ia puipuia ma faamalosia ai le tulaga o le tatou Tulafono o Faiga Palota ua uma ona talanoaina i totonu o le Maota. E fautua atu ai i sui usufono, ina ne i tatou toe asa le ogasami ua uma ona asa, a o lea ua malamalama lelei finagalo o le Maota, o lea foi ua agiga i malae finagalo o sui usufono. Ma e pei ona ou faasilasila atu i le taimi ua sola, e taunuu uma lava le Tulafono o Faiga Palota ma le Tulafono lenei o le Suiga o le Faavae i le Komiti lea na ou tolaulauina atu e Taitaifono ai au nei ma le Afioga i le Palemia ma le Afioga i le Taitai o le Itu Agai ma sui usufono mamalu o le Maota. O lona uiga, e tele lava ma anoanoai le avanoa e mafai ai ona tatou toe soalaupule ma feliuliuai lenei Tulafono Tau Faaofi ina ia taatia nei Tulafono Tau Faaofi e lua i se taatiaga lelei ona e le o natia o se Tulafono Tau Faaofi o lo o atagia ai le taua o le filifiliga o sui usufono o le Palemene aemaise ai foi nisi o suiga taua aua le tulai mai o le filifilia o tulaga tofi maualuluga o le tatou Malo, O Le Ao o le Malo, o le Fofoga Fetalai aemaise sui usufono pei ona taua ma le Ofisa o le

Komesina o Sulufaiga a le tatou atunuu. O lea e fautua atu ai i le paia ma le mamalu o nisi o sui usufono o totoe o toe fia faaalua ni o outou finagalo, ia tatao pea i le moa o le ala ona o le alofa atu e 20 minute avanoa o sui usufono mamalu.

Ua avanoa le Maota mo se sui usufono e toe fia saunoa i lenei Tulafono Tau Faaofi. Ia, tulai mai se tasi o sui usufono mo le Palota Taitoatasi, Susuga Hon Papaliitele Niko Lee Hang.

**Susuga Hon PAPALIITELE NIKO LEE HANG (Palota Taitoatasi):**

Lau Afioga e momoli atu le faafetai mo le avanoa. E manatu foi ua maua se faasiliga malosi i lau Afioga ma tali le sua, aemaise foi o le mamalu o le Palemene e faaauau ai le tatou galuega i lenei taeao. Ae ua ou tulai atu ma le agaga faaaloalo e fai foi se sao i le Tulafono Tau Faaofi o le Teuteuga o le Faavae (Nu.2) 2014. O lea foi ua uma ona sausaunoa le Afioga i le Palemia i le auga foi o le Teuteuga o le Faavae ua tulai mai nei, aemaise lava le aafiaga o le Palota Taitoatasi. Ia atonu e taua le agaga o le tuuina mai o le mafuaaga ona o le tulaga foi lea ina ia toe faaeaea le tulaga o le itumalo palota lea taitoatasi ona a maitau atu i le saunoaga a le Palemia, o le sosaiete le mea, po o se au lakapi. E pei e foliga e le logomalie i se faalogo le tulaga lea. Ae pei la o le tulaga lea a faapea o se tulaga e faaeaea i lea tulaga ina ia mamalu, e pei o le tulaga lena e taua i lau maitau atu.

Lau Afioga i le Fofoga Fetalai, ou te tau manatu atu i le amataga mai o le Nofoa lenei i le tulai mai o le taimi na Tutoatasi ai le tatou atunuu ma amata mai ai Nofoa, pe ono ea Nofoa na amata mai ai sui usufono o le Palota Taitoatasi. Ua alu ai alu ai o le tele o le au palota ua fai o latou suafa matai ma ua o ese atu ma le lola palota ma faaitiitia ai lava le aofaiga o Nofoa, o le taimi nei lea ua toe lua. E pei o se lagona lau Afioga pei foi ona ou faailoaina atu i lau lauga i le Tala o le Tupe se lagona faanoanoa ona o le tulaga ua tapena ai nei le Malo e sui ai Nofoa ia o le Palota Taitoatasi i nofoa o le Taulaga.

Sa i ai lava le lagona e faaauau pea le tulaga lea na faaitiitia ai Nofoa i lalo o le Faavae seia oo lava ina ua le lava le au resitala, ona muta ai lava lea o Nofoa ia. Ae peitai, o lea ua see le vaa o le Malo ua fai le fuafuaga. Ia ona tomanatu ai foi lea i le sao o tamalii foi a o tulai mai le Palota Taitoatasi i le taumafaiga e oo ai le tatou atunuu i se tulaga lelei aemaise lona tamaoiga. Ma ou te talitonu e tele foi le sao o ia tamalii a o taumafai mai le tatou Malo tauatia. Masalo ua galo Afia i si ona vao, ae le toe selu atu i lea tulaga ona ua uma foi le taimi. A o le fesili lava i lou mafaufau, ona o le tulaga lea e i ai le Nofoa nei, o lea e lagolago malosi i le Faigamalo. A o le taimi lea e Teuteu ai le Faavae e aveese ai, i sou lava lagona ia te au e pei e faafesiligia ai le tautua a sui usufono nei i le Malo po ua lapelapea po o le a se tulaga o i ai. Sa ou faapea se i oo Nofoa nei i le Vaega Agai ona taumafai lea o le Malo e teuteu le Faavae ma aveese ai. Ae paga lea, o lea e ma te tulai atu ma le Afioga ia Maualaivao e lagolago le tatou Malo, a o lea ua tulai mai le taimi e teuteu ai le Faavae e soloia ai Nofoa ia a le Palota Taitoatasi.

Ia o lena e faafofoga mai le ma itumalo, o lenei lava e tuualalo ma valualusia aa o le fau. O se taumafaiga foi e muta, aua e leai se ma mea e mafai pe afai o le finagalo lea o le Malo o le a i ai se suiga faapea i le tatou Nofoa. Ae talitonu lava a faapea o se suiga e lelei ma manuia ai le atunuu, ia, atonu o le tulaga lea. Ae paga lea, o lea ma te taumafai lava i le Malo e tatalo

ma tuualalo po o le a se finagalo e toe silasila ane i ai se i maea lenei Paeauga ae se i alo i le Faiga Palota po o le a le tulaga... a tulai mai loa ni sui usufono fou o le Vaega lea ua le toe lagolagoina le Malo, ona faapena lea ona tapena le Tulafono e Teuteu ai le Faavae e aveese ai. Ae pei o le faafesili lava lena i lou mafaufau, e pei ua le amanaia maia maua nei o lo o lagolagosua i le Faigamalo.

Ona i ai lea o se manatu lau Afioga i le Fofoga Fetalai, e faamalulu atu foi i lau Afioga i le Palemia aemaise o le Kapeneta, ou te le lagolagoina le Teuteuga lea o le Faavae e aofia ai Nofoa o le Palota Taitoatasi. Ma lou faaloalo lava.

**FOFOGA FETALAI:** Malo. Faafetai saunoa i le sui usufono mamalu, o lea lava ua faaalua manino le saunoaga a lau Afioga i le Palota Taitoatasi.

Se i tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, na ou tali atu i le agaga faaloalo. O le taimi lenei i so o se mataupu tau le Faavae, e faataoto loa se Teuteuga o le Faavae, o au o le Taitai o le Vaega Faaupufai, ou te tapa ai le lagolago a le Vaega atoa, e pei ona ulufale mai ai ma tauva i le Vaega lenei, o le tulaga lena ia nofouta i ai le sui usufono e pei foi ona saunoa, o au o le Palemia, o le Taitai o le Vaega e Puipuia Aia Tatau a Tagata, ua uma ona auai faatasi i le lagolagoina o le Tulafono Toe Teuteu, ua ou tapa e tusa ai ma le tulaga o tautoga a i tatou uma e lagolago i le Vaega lenei, e leai se tagata e aloese ma ona tiute i le lagolagoina o le Tulafono Tau Faaofi lenei. E oo i le Teuteuga o le Faavae, e tutu faatasi sui o le HRPP e tusa ai ma tautoga i le ulufale mai i totonu o le Maota lenei.

Lau Afioga i le Fofoga Fetalai, o lau toe tali atu lena i le sui usufono na saunoa nei.

**FOFOGA FETALAI:** Malo faafetai. Tulai mai o lea ua avanoa le Maota mo le saunoaga. Tulai mai le sui usufono mo Siumu.

**Tofa Hon TUUU ANASII LEOTA:** Faafetai i lau Afioga i le Fofoga Fetalai mo le avanoa e fai atu ai sina manatu puupuu lava i le Tulafono Tau Faaofi e pei ona lauiliuina nei e le Palemene.

Lau Afioga i le Fofoga Fetalai a o le i faia se manatu, e muamua ona momoli atu le agaga faafetai i lau Afioga ona o le faaavanoaina foi o le Maota o le Palemene nei e fai ai le faamoemoe o le Afioga i le Akiepipoko ma lenei Ekalesia i le aso ananafi, aemaise foi o le Afioga i le Minisita mo Leoleo ma Falepuipui mo le galuega faamalumalu a le Malu o le Malo i le faamoemoe o lenei Ekalesia i le aso ananafi. Faafetai faamalo.

Lau Afioga i le Fofoga Fetalai, ua ou tulai atu e fai sina au tala puupuu i le Tulafono Tau Faaofi o Teuteuga o le Faavae (Nu.2) 2014. Lau Afioga, e lagona le faanoanoa o lou nei sui usufono i le tulaga e pei ona tuuina mai ai lenei Teuteuga. O lea ua saunoa mai le Afioga i le Palemia po o le Taitai foi. A o lou talitonuga, e le i i ai se tino mai o lenei Teuteuga i le Vaega Faaupufai lenei. O au o le sui usufono o lou itumalo o Siumu, e le taitaia faa-ia-matau lou tofi, ae faamalulu atu i lau Afioga i le Palemia, e le o se faataumatatao i lou finagalo. O lea ua e saunoa i tulaga ia, a o tulaga faapenei

ma taimi faapenei ma aso faapenei, o lea tatou te alu lava i faaupuga ia e masani ona fai, “A e iloa le mea e tatau ona fai ae le faia, o lena e te silafia o le agasala lea i luma o le Silisiliese.” Ae ou te lagona e le talafeagai i lau vaai Teuteuga ia ua tuuina mai.

Lau Afioga i le Fofoga Fetalai, o le vaega muamua o le Teuteuga, ou te le o malamalama. O le ala lea o lau fesili, o fautuaga. O le tulaga lea ua tulai mai o le a avea faapolokiki le tofiga mamalu o le Ao o le Malo. Ou te le o malamalama po o le a le eseese o le mea o lo o i ai nei ma le mea lea ua aumai ai nei le Teuteuga lea. Ma lou faaaloalo.

**FOFOGA FETALAI:** Malie le sui usufono se i tuu atu le avanoa i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielega:** Lau Afioga i le Fofoga Fetalai, ou te le o malamalama po o le a le tulaga o le faapolokiki lea e aumai. E manino lava le avatuga o le mataupu analeila, ma o lea foi sa ou faitauina atu le Teuteuga o le Tulafono Tau Faaofi. E pei o le tulaga lava lea i le tofiaina o Lana Afioga Mamalu O Le Ao o le Malo. O Le Ao o le Malo e tofia e le Fono Aoao Faitulafono, i le faia i luga o le fautuaga a le Vaega Faaupufai, o le Vaega Faaupufai e pulea le Malo. O le mea lea tatou te i ai nei, o le Vaega lava e fulisia i ai le Malo, o i latou foi na e fulisia i ai le tofiga o Le Ao O Le Malo. A o se faiga e faafaigofie ma le fenumiai, na i lo le faaupuga lea sa i ai i le amataga, e mafai e so o se sui usufono o le Maota lenei ona avatu lana ia igoa faatu. O se tulaga faigata tele lena. E pei la o lea sa taofiofimaui ai le Vaega lenei, ia fai le iuga, o le iuga a le Vaega, nai lo le sau lava o le tagata ia aumai lana fasipepa e faatu mai ai Simi, Sione, e le o ni mea mamalu mea na. Ou te le iloa la po o le a le le mamalu. Tatou te le polokiki i mea ia. Tuu tatou lauga faapolokiki, tatou te le polokiki i mea ia. O lea e manino, o a tulaga faapolokiki? Ia o le faaupuga lea o le Tulafono Tau Faaofi o lea tou te tetee i ai, “O Le Ao o Le Malo o le a tofia e le Fono Aoao Faitulafono, le Fono Aoao lenei, ia faia i luga o le fautuaga a le Vaega Faaupufai o pulea le Malo.” O le a la le polokiki? O lona uiga tatou te o pea i le mea lea e i ai nei, e pule lava le tagata ia ma lana lafo faatu e sau lava... O lona uiga, afai e 49 tatou, e pule lava le tagata ia i lana sui e aumai, o lona uiga e 49 foi sui e fai i ai le filifiliga a le Palemene lenei ona tatou le omai lea i inei e fai ai le palota. O le mea lena o lea e ala ai ona taumafai atu le Malo ina ia taofia, leaga o faaupuga na o lea e i lalo le Faavae, na aumai i le taimi na leai ai ni Vaega. Na o sui usufono tutoatasi, e pule lava le sui usufono ia i lona taofi. Lau Afioga, o le faigofie ia. Ou te le iloa la po o le a le polokiki lea e i i. Ae afai e ni tagata e le o ni faipule, masalo ai o le mea lena. O ai e faia le filifiliga? O lea e fai e faipule. Ae a faapea e polokiki ae le faia e faipule, ona sao lea o le upu lea.

Lau Afioga i le Fofoga Fetalai, se ou te matua ofo lava, o le sui usufono mo Siumu o le tasi lea sui usufono matua o le Maota lenei, a o lea lava na te le o maua mai le agaga. Se i vaai i ai ua leva ona ou avatua i le taeao. O le a ou toe faitauina atu le mea lea e tetee i ai le sui usufono mo Siumu. “O le Ao o Le Malo o le a tofia e le Fono Aoao Faitulafono e faia i luga o le fautuaga a le Vaega Faaupufai e pulea le Malo.” Vaai i ai i le faigofie? O lona uiga, a fai lava le filifiliga a le Vaega Faaupufai, afai e 37 sui usufono ia e i ai, e tasi lava le sui usufono e agai i ai na i lo le mea lea o le ui i le mea lea na omai ai,

e mafai ona 37 foi sui usufono e pule lava le tagata ia. Lau Afioga i le Fofoga Fetalai, o mea le mamalu la mea na.

**FOFOGA FETALAI:** Tulai mai le...

**Afioga Hon Palusalue Faapo II:** Lau Afioga i le Fofoga Fetalai, o se mea e fia faamalamalama aua o lea e tofu uma lava tatou ma Faavae, Constitution, o lea foi ou te faitau ai au i le ao ma le po, e leai lava se mea faapea e sau lava le tagata ma lana sui faatu, e 49 sui e fai i ai le palota e pei ona saunoa i ai le Afioga i le Palemia. E leai ma se mea o i ai i totonu i i.

**FOFOGA FETALAI:** O lo o i ai Palusalue, o lo o i ai le mea lena pe a faapea e tapa, e manaomia, o lo o i ai le mea lena i le filifiliga. E le o i totonu o le Faavae, o lalo o le Tulafono Tumau o lo o i ai uma mea na. O lo o i ai le aiaiga o le filifiliga o le Ao o le Malo, o lo o i ai mea na o tuutuuga i le Tulafono tuai lea tatou te i ai nei, e le o i ai ni tatou faiga Pati mai le amataga. E filifili sui usufono uma. O lona uiga e tofu lava le 49 sui usufono ma lana tagata e aumai. O le mea lena o lea tatou te i ai i le taimi lenei i totonu o le Tulafono Tumau. O le ala lena na ala ai ona faamanino atu i le amataga, o le suiga lea o le a tatou i ai, e tau faapuupu ai le mea lea instead o le 49 sui usufono, e tatau ona tatou galulue i Itu e lua o le Maota lea e i ai nei e faafaigofie ai pei ona amataina i le filifiliga o le Palemia. O lea ua tatou amata, na tatou amata i le 3, 4, 5 Paeaiga talu ai i le mea lena. Ou te faamaonia o lo o i ai i lalo o le Tulafono Tumau le filifilia O Le Ao o le Malo.

**Afioga Hon Palusalue Faapo II:** Lau Afioga i le Fofoga Fetalai ma le faaaloalo lava, se i faamasino ifo pe mafai ona tupu lena mea o le 49 sui a le tagata? O lea ua mautu a tatou Vaega Faaupufai, e mautinoa lava e tasi le sui e aumai. Ae le tupu lena mea o le sau ma le 49 sui e fai ai le palota.

**FOFOGA FETALAI:** Ia o lea la ua tupu le mea lea Palusalue, e tatau la ona sui le mea lea e leaga e le tumau tatou i le Maota. Tatou te le tumau i inei, e fai le tatou taimi e uma le tatou taimi, e tea le aso o le lupe, tea le aso o le fuata. Ae tulai mai, e tatau la ona tatou o e faamaonia mea ia i va o Vaega Faaupufai ma tautalagia ia solisoli mulivae i le mea lea tatou te i ai nei. O lona uiga, e tatau ona sui, ia o i luga o lea ua mautu Vaega Faaupufai, o le a le mea e saunoa i ai ma tasi i ai Vaega Faaupufai, o le mea lena e fai.

Tulai mai le sui usufono mo Siumu e faaauau le saunoaga.

**Tofa Hon TUUU ANASII LEOTA:** Lau Afioga i le Fofoga Fetalai, ou te talitonu lava au i le tulaga lea o lo o i ai nei, o le fautuaga lea na aumai e le Malo, le tofia O Le Ao o le Malo, o lea e sologa lelei lava. O le fesili la lea e tulai mai, po ua i ai ni toatuga po o ni faafitauli na aliai mai i a tatou tofiga ia na fai? E leai se mea. O le mea lea e popole ai lou sui usufono, i tatou teuteu teuteu le vaega lenei o le Faavae ae oo i lima o ni tagata sese ona tulai mai lea o le faafitauli lea e vaavaai atu ai i le mea lea o le a tulai mai. Ina ne i o tatou faufau pe fafau i lo tatou manatu e tutumau pea le HRPP i le Malo, ae i ai se taimi ona fesui lea, aua leaga e le tumau pea, e alu aso ae sau aso. O le

tulaga lena o lou popolega lau Afioga i le Fofoga Fetalai, ua ou tulai atu ai e faaali atu ai lou taofi ou te tetee i le vaega lenei o le Tulafono Tau Faaofi.

**FOFOGA FETALAI:** Ia, malie le sui usufono se i faamalamalama atu pea lou finagalo.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea lea e aumai sese ai le taofi o le sui usufono, ai o se mea faapena e manatu le HRPP e tutumau. E leai ma se faaupuga o i ai e faapena. E matua leai lava ma se faaupuga o tau atu, ae matua sese tele lea taofi e aumai. Na pau lava le mea lea o lo o manino ina ia faafaigofie ona fai a tatou faaiuga fai, faafaigofie, mama ma manino, nai lo le tuuavanoa, aua a tuu loa le avanoa, e le mafai lava ona faapea e le faaaogaina le avanoa lena. Lau Afioga i le Fofoga Fetalai, e le la pea aso, e i ai lava le aso e timu ai. A o le mea lea e avatu, ia mamalu ona fai le tofiga. O le tofiga o le tofiga a le Maota Fono lenei. E le faia i tua ni tofiga.

Na o le pau lava le mea lea e avatu, ia taofi le faiga lea o le aumai ua tele sui usufono e faatutu mai, a o le faiga matagofie lea, e fai i luga o Vaega, o le mea lava e fulisia i ai le Vaega o lo o pulea le Malo, ia o le sui lava latou te aumaia, o le sui lava lena. Aua o le iuga lava lena. O lea tatou te talanoa i le nauna lautele, a o le iuga lava lena. O le mea lena e fai. Afai la o le mea lena e fai, e tatau foi ona atagia i lalo o le Faavae.

**FOFOGA FETALAI:** Ia, tulai mai le sui usufono e faaauau mai le saunoaga.

**Tofa Hon TUUU ANASII LEOTA:** Lau Afioga i le Fofoga Fetalai, o lea ua taoto mai tiasa tama ma tuua na latou fafauina le Faavae lenei, famous of the Constitution, e mamao le latou silasila. I lou talitonuga, e le i taitai ona oo i le taimi tatou te teuteuina ai Vaega nei. O lena lau Afioga i le Fofoga Fetalai ua ou tulai atu e teena ai lenei Teuteuga. Ma lou faaaloalo.

**FOFOGA FETALAI:** Malo saunoa, faafetai i le saunoaga i lau Afioga i le sui usufono. Tulai mai lau Afioga i le Minisita mo Faamasinoga ma Pulega Tau Faamasinoga.

**Afioga Hon Fiafe Naomi Mataafa:** Lau Afioga i le Fofoga Fetalai, ou te tulai atu e saili se faamaninoga mai le Nofoa. E maitauina i le maea mai o le tatou malologa sa saunoa lau Afioga e faasino i le mataupu lea o le Teuteuga o itumalo faa-Palota o lo o aumai i le tatou Tulafono Tau Faaofi lenei, ia ma e saunoa faamanatu mai, o lo o faagasolo nei ia le Tulafono o le Teuteuga o Faiga Palota. E mafua lou tulai atu lau Afioga i le Fofoga Fetalai, aua o lea ua ou faalogologo atu nei ua tolu sui usufono o le Maota ua saunoa i le Teuteuga o itumalo, ma e o le fesili lea e tulai mai i lou mafaufau, pe fia felafolafoaiga a le Maota lenei e fai i le mataupu lea, aua o le Tulafono Autu lava ia o le suiga o a tatou faiga faa-Palota lea ua faagasolo nei. O le Teuteuga o le Faavae ua aumai i le Tulafono o le Afioga i le Palemia, o se fuafuaga e faagasolo ai ia auga autu o le Teuteuga o le Tulafono o Faiga Palota. Ma lau Afioga i le Fofoga Fetalai, o le mafuaaga lea ua ou toe tulai atu ai, sa ou le fia faalavelave i saunoaga a sui usufono, ae tupu pea le manatu ma le faafesili i

lou mafaufau, pe fia taimi e talanoaina ai ia mataupu autu ia, aua o le mataupu autu lea ua i ai i le tatou Tulafono Tau Faaofi o Teuteuga o le Tulafono o le Faiga Palota lea o lo o faagasolo. Na o le pau lava le mea lea e aumai i le Tulafono o le Teuteuga o le Faavae, ina ia mafai ona faagasolo ai ia le faamoemoe lea, pe a faapea ua pasia e le Palemene, it's an enabling Amendment in the Legislation, pe a faapea lea e pasia le tatou Tulafono Autu aua o i ina o lea o lo o i ai le fatu o suiga e pei ona i ai ia le suiga mo le Lola Palota Taitoatasi. O le faafesili la i lau Afioga i le Fofoga Fetalai, e le faapea e fia oia le avanoa e saunoa ai sui usufono, ae o le manatu e lelei lava le tatou o malamalama, tatou tuu vaega lelei ia le faiga o a tatou galuega ma ia tatou tilotilo, po o fea tonu e tataua ona ave i ai le faamamafa, o le faamamafa la lau Afioga i le Fofoga Fetalai, o le Tulafono Autu, ma le faaaloalo lava.

**FOFOGA FETALAI:** Malo. Faafetai atu i lau Afioga i le Minisita mo le Komesina o Faiga Palota, ia e saolele le tuleiga ma le saunoaga, o lau Afioga ma lau Matagaluega, ia o le tatou Tulafono Autu lena, o le ala lena o lou taumafai atu ina ua maea mai le tatou malologa ina ia nofoilo nisi o sui usufono e le i saunoa i le tatou Tulafono lenei o le Teuteuga o le Faavae, ina ia malamalama lelei, o le Tulafono lenei o le Teuteuga o le Faavae e fesootai ma fesoasoani agai i le pasia aloaia o tatou Tulafono Autu, o le Komesina o Faiga Palota, o le ala lea aua ua maea ona tatou soalaupule. I le tulaga aloaia lava ia, o le tatou debate, official debate e agai tonu i suiga o le Tulafono o Faiga Palota lea ua maea ona tatou talanoaina i totonu o le Maota lenei, o le ala foi lea na talosaga atu ai i le faafaigofieina faamalamalamaina ma le faasaina o lo tatou taimi, ina ne i tatou toe talatala le fue lavelave ma asaasa le ogasami ua uma ona asa, lea na ou fautua atu ai, malilie sui usufono mamalu, ia tuu tonu le saunoaga ma finagalo agai i le Tulafono o le suiga o le tatou Faavae lea ua i ai nei.

Ou te manatu foi ma taofi o lea e malamalama le saunoaga a le Taitai o le Malo, malilie sui usufono, o lea e matua manino foi ma o lea foi ou te nofo atu ma au o le Fofoga Fetalai aiaiga o suiga nei ua tuuina mai, e le nofoai foi au e fautua i le Taitai o le Malo i lea taimi i lea taimi, ma e leai, leai se suiga e leaga ai se atunuu pe leaga ai se Malo, o le tautinoga lena lea e fai atu ia te au nei o le Fofoga Fetalai. E le o se faamatalaga ina ia limataitaiina ai lo outou finagalo i la outou tofa ma la outou faautautaga loloto, leai, e matua maioio mea uma leaga e faigata, a i ai ni faaletonu o lea tatou te i ai i le vaa e tasi, a outou faafofoga lelei i le folasaga lea na fai atu i le taeao e le Taitai o le Malo, o le matua manino lava mea uma, o lea lava tatou te agai i suiga o le tai faanae i lea taimi i lea taimi, i lea vaitau i lea vaitau. Sa tatou omai i le 49 sui usufono, tu lava le tootoo o le itumalo ia i le itumalo, e leai ni tatou vaega faaupufai, leai se mea e tasi, sa tatou tiutalaloa, o le mea e saunoa i ai le sui usufono o lona finagalo lena. E a lenei vaitau? Mai le 1979, 1980, 1981, 1982, o le a le suiga lea ua tatou i ai? Ua tatou omai i le faamalu i lalo o faiga faa-Temokarasi o lo o limataitaiina ai Malo Afaatasi, United Nation, leaga e tatou te le o toe tutu na o Samoa ma ona upufai o Malo, ua tatou siosiomia i faigamalo o le lalolagi o lo o fusia uma ai faiga faa-Temokarasi ma faiga faava o Malo, e le aafia ai ma Samoa. O le ala lea, e le tataua ona tatou toe sui i se tulaga e toalia ai le sa folau o le atunuu, e tatou te maitau ma o tatou silasila i le tulaga, ina ia aua ne i tuuaunoa tatou, aua ne i tatou see ese ae o lo o faapena ona folau sa e isi faigamalo ma isi atunuu, i suiga ua tatou i ai. O le



Palemene lenei e faia lona iuga. O le ala lea o lou fautua atu, le paia ma le mamalu o le tatou Maota, ina ne i meaane ua mau eseese Tutuila ma Ape, ae sili ia le avatu lau upu lea i le taimi lenei, o a ni suiga e oo i ai le Faavae, e le o i ai se papa maa faapea e sa ona tatou sui le Faavae, e leai, e tulai mai i lea vaitau i lea vaitau i le tofa ma le faautautaga i totonu o lea Palemene ma lea taimi, o lo o i ina le tofa ae tatou te sui i mea lelei, i taimi talafeagai.

O le ala lea o lau tali atu i lau Afioga i le Minisita e a ia le Tulafono o Faiga Palota, o le Tulafono Autu sili lena, leaga o lea e tatou te feagai ma faafitauli i taimi uma aso uma, e uma loa le Faiga Palota tatou vevesi i le Faamasinoga toulou sui. O fea o i ai le filifiliga a Samoa? Ua le aoga, ona o le lē tumau ma lē mautu i le Tulafono lea o Faiga Palota. O le ala lea o le suiga o isi vaega ia o le Faavae ma tulaga uma o filifiliga ma tofiga, e tataua ona tatou lotea le Faavae. O le ala lea le paia e ma le mamalu o le Palemene, ina ia outou nofo malamalama ma outou silafia lelei, e le mafai ona tagofia na o se vaega e tasi, leai. A tatou o loa e lote le mataupu lenei o Faiga Palota, ia e aafia uma ai ma isi aiaiga o isi Tulafono sili o lo o limataitaiina ai le tatou Maota Fono.

O le ala lea faafetai i lau Afioga i le Minisita i lou faamanatu mai, leaga o oe o le Tulafono Autu e agalima i ai ma faasoasoa atu i ai tulaga o lo o tatou talanoaina le Tulafono lenei o le suiga o le Faavae ina ia taatia i le agatonu le Tulafono Autu o le Faiga Palota.

Ua avanoa se sui usufono, ia o lea ua tulai mai le Taitai o le Itu Agai.

**Afioga Hon Palusalua Faapo II:** Lau Afioga i le Fofoga Fetalai, o se mea e.....

**FOFOGA FETALAI:** O lau lauga lea le Taitai o le Itu Agai?

**Afioga Hon Palusalua Faapo II:** I lau mataupu lea e te saunoa mai ai.

**FOFOGA FETALAI:** E te le tali mai ia te au.

**Afioga Hon Palusalua Faapo II:** Aisea?

**FOFOGA FETALAI:** Sauni e fai lau lauga.

**Afioga Hon Palusalua Faapo II:** O le a fai a la e le fetai ae fai lava au saunoaga.

**FOFOGA FETALAI:** O lea, oi, o lea a le uiga o lau saunoaga?

**Afioga Hon Palusalua Faapo II:** Ma lou faaaloalo o lea ou te tu atu o le mea e fia faamalamalama.

**FOFOGA FETALAI:** Ae e te fesiligia lau tala lea na fai atu o le faatinoga lena o le galuega?

**Afioga Hon Palusalua Faapo II:** E sa ona fesiligia lau Afioga?

**FOFOGA FETALAI:** E te fesiligia i le mea talafeagai.

**Afioga Hon Palusalue Faapo II:** O le mea talafeagai o le Teuteuga o le Faavae, o le Teuteuga o le Faavae o le Tulafono e aupito sili ona maualuga. O le ala lea o lou tulai atu lau Afioga.

**FOFOGA FETALAI:** O le a lau upu ua sese ua e saunoa ai?

**Afioga Hon Palusalue Faapo II:** E le o sese na o se fautuaga.

**FOFOGA FETALAI:** Ia o le a le mea e ala ai ona e fai mai? E le o sese? O sese po o sao?

**Afioga Hon Palusalue Faapo II:** E sese.

**FOFOGA FETALAI:** Ia nofo la i lalo. Alaala i lalo.

**Afioga Hon Palusalue Faapo II:** O lena e sese lau folasaga, e sili atu lea i lo i le Tulafono Autu.

**FOFOGA FETALAI:** Alaala i lalo! Alaala i lalo! Alaala i lalo! Aua tatou te saili ai i mea ia lea ou te fai atua. Vaai ai i le malamalama o lau folasaga na fai atu nei, malamalama lelei le folasaga na ou fai atu ina ia malamalama finagalo o sui usufono. Ae e te faasagasaga mai? Palusalue, vaai le tatou va i oia, vaai le tatou va nonofo. Aua le avea le alofa ma mea o le a tatou lalaa ai i se isi tulaga. Ou te le o fai atu e punitia lo outou saunoa i le mataupu, a oo i le taimi o lau saunoaga ona e saunoa lea, ae aua ne i e tulai mai e faasao le mea lea ou te fai atu ai. Se i avea oe ma Fofoga Fetalai ona fai lea o le mea lena e te manao ai. A o le taimi lenei, e tasi lava le tagata e faatonutonu le mea ma avatu le fautuaga ia outou, e tasi foi le tagata e faatulaga le Tulafono Tumau, e le faia se loto, ae tumu i le ava atu i le mea lea e taumafai atu, ava tele, ae aua ne i avea le mea o le avatu o le alofa ma mea o le a tulai o le a sopo le taiao i le taipo, ae sopo le tai i le eleele, fuafua mai, o lea e taumafai atu ina ia toamalie le tatou Fono o lea e faamalamalama le mataupu.

E i ai se isi sui usufono e fia saunoa.

**Afioga Hon Palusalue Faapo II:** Lau Afioga i le Fofoga Fetalai ma le faaaloalo lava, ou te faamalulu atu i lau Afioga pe afai ua laavale sau faamatalaga. O le mea lava lea o lea ou te popole ai aemaise o le Teuteuga o le Faavae lea ua aumai nei, tofi mai e o le Fofoga Fetalai, o le tulaga lea o lea ou te popole ai. Ae afai ua sese sau tala, ia e faamagalo mai ma lavapapale lau Afioga, o le itu nei o le itu toaitiiti e taumafai atu ni avanoa, aua o lea lava ou te iloa, e fao uma e....

**FOFOGA FETALAI:** Palusalue, alaala mai i lalo le sui usufono! Alaala mai i lalo le sui usufono se i fai atu lau faamatalaga lea.

**Afioga Hon Palusalue Faapo II:** O le mea lea ou te faamalulu atu ai i lau Afioga.....

**FOFOGA FETALAI:** Alaala mai i lalo. Ou te taofi o oe le isi sui usufono matua i le Maota lenei e te malamalama ma teu lo tatou va ma le tatou va

nonofo, ou te talitonu foi e le mafai ona faaitiitia ia te au nei lou agaga o le faaaloalo atu, ae a outou le faaaloalo loa, ona tatou oo loa lea i se isi tulaga. E sese uma na faamatalaga o le a fili pitotasi le Fofoga Fetalai, a lea e malamalama, e aumai lava mea uma iinei. E le faia e se vaega faaupufai, e tatou te taunuu lava i le Maota pe a tatou o e faauiga upu ia tatou te talanoa ai. O le mea lea malilie sui usufono mamalu, o lea e sagatonu a tatou mataupu, ae aua tatou te fetosoai faapena o le a limataitaiina sese ai ia upu ma tala, o le a alu lenei taeao o faamalamalama le mea lea. O le fautuaga e tuuina mai i le vaega faaupufai, ona aumai lea i totonu o le Maota lenei e filifili ai le tatou mataupu. A lea ua uma ona faatulaga foi i le filifiliga o le Palemia, faatulaga i le filiga o le Fofoga Fetalai, lea ua tatou taunuu i Le Ao o le Malo. O le mea lea, malilie sui usufono, aua na ona outou fai mai e faaaloalo ae tou te le faaaloalo? Ua ou fai atu soo i le mea lea o le tatou vanonofo ma lo tatou vatapuia, a o lea lava ou te ava tele atu, le Tulafono Tumau e 90, ‘o le Faaiuga a le Fofoga Fetalai e mausali,’ ia outou taofi la i le mea lenei. Ia outou manatua, o lea lava ou te faaoloolo pitovaa ma ou fai atu, o le tatou ava i lo ta vanonofo, ae a ou tu loa e fai lou tulaga faa-Fofoga Fetalai, ia ona outou malilie lea. Ma o lau toe faasilasilaga, faatoa ou taua lea o le Tulafono Tumau lea talu le Paeaiaga lenei, leaga o lea ua ou vaai atu ua amata ona outou laalaa i le isi tulaga e ese le mea tatou te o i ai.

E faamanatu atu, o le Faaiuga a le Fofoga Fetalai, e mausali. A fai loa lau Faaiuga, ia ona outou malilie lea o le Faaiuga lenei, e sao pe sese, o le Faaiuga lenei.

Tulai mai se isi sui usufono e fia saunoa. Tulai mai le sui usufono mo Faleata Sasae.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai, ia faafetai foi i le Afioga i le Palemia aemaise foi o le aumai o lenei Tulafono Tau Faaofi, e faamalulu atu foi i lau Afioga i le Fofoga Fetalai.

Ae ua ou tulai atu o lea ua saunoa lau Afioga i le Fofoga Fetalai, ia e le toe ova atu foi i luga o lau saunoaga le mataupu pei ona i ai nei, ae i ai lava le faamoemoe o le sui usufono mo Faleata Sasae, e tataua pea ona pai i vaega ia e aumai i i e ono sui ai le Faavae, e ui ina ua maea ona faamalamalama mai e le Afioga i le Palemia aemaise foi o le taumafai mai a lau Afioga i le Fofoga Fetalai, a o le vaega lava e ala ai ona ou fesiligia le vaega lea muamua o le filifiliina o Le Ao o le Malo, e moni, e moni lelei lava le saunoaga i totonu o le Tulafono, o lo o faapea mai pei ona e lauina, “O Le Ao o le Malo o le a tofia e le Fono Aoaofa Fautulafono,” ae a tagai lau Afioga i le Faatomuaga o le Tulafono Tau Faaofi lenei, o faamoemoega o le Tulafono Tau Faaofi lenei o lo o faapea mai; ‘ia faatagaina le vaega faaupufai e pulea le Malo e filifilia se tagata ina ia tofia e avea ma Ao o le Malo,’ o le vaega la lea o lea e ala ai ona ou fia talanoa i le Tulafono lenei, ona o lea e manino mai i i, e filifili e le vaega faaupufai e pulea le Malo, ona aumai ai lea i totonu o le Palemene. E moni, e moni le saunoaga a le Afioga i le...aua a tatou alu foi i le vaega lea, e 90 pasene, 99 pasene e aumai lava o le sui lava lenei, ae le o le agaga lenei o le sui usufono mo Faleata Sasae. Silasila foi lau Afioga i le Fofoga Fetalai, a aumai nei e filifili faatasi e tatou, ae ia i ai se sao o le Palemene. Ia i ai se sao o le sui usufono mo Faleata Sasae o le ua avea ma sui o tagata o le itumalo e filifilia ai Lana Afioga Mamalu O Le Ao o le Malo. E i ai la le vaega lenei lea

e ala ai ona ou talosagaina pe aisea, leaga o lea ua sau iinei ma o le mafuaaga lena o lea ua ou fesili ai.

O lona lua lau Afioga i le Fofoga Fetalai, e faapefea pe afai e alu, alu ni tausaga tolu ni Vaega Faaupufai i totonu o le Palemene, ae leai se Vaega Faaupufai e i ai se aofaiga e mafai ai ona faatu se Malo? O le a la le faiga e filifili ai le Ao o le Malo pe afai e sui nei le Faavae?

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o lea e tau fesili le sui usufono i le Vaega 3, o le Ao o le Malo o le Vaega 3(18): “18. **Tofiaina o Le Ao o le Malo**-(1) O Le Ao o le Malo, o le a tofia e le Fono Aoaofaitulafono,” le Fono lenei, “I le faia i luga o le fautuaga a le Vaega Faaupufai po o ni Vaega Faaupufai.” O lona uiga o lea e i ai le avanoa ma o le mea tonu lava lena o lea e saunoa mai ai le sui usufono.

Lau Afioga i le Fofoga Fetalai, na o le pau lava le tulaga lea e aumai iinei, a toalua lava tagata o le isi ma faamaonia e le isi, ona pau lava na o tagata e toalua e faia le fautuaga e ave i totonu i le mea lea o lo o i ai nei. O lona uiga e mafai lava ona talatalanoa Toleafoa ma Tuuu, ona faapea lea o Toleafoa ma Tuuu; “E i ai lau tama lea e fia ave a o lena foi e i ai lau tama lena e fia ave, o le a ta saina uma iinei e ave lau tama ona ta toe saina foi lea e ave lau tama.”

O le uiga tonu lena o le mea lea e i ai. I lalo o aiaiga ia e i lalo o le Faavae i le schedule e mafai ai ona tupu le mea lena, ona tatou omai ai lea i le Palemene lenei ua le tasi e mamalu, ae ua toatele. E le faapea e le tupu, e faaono tupu le mea lena leaga o lea e i ai le avanoa i lalo. E i ai loa se avanoa o lo o tatala mai e le Tulafono, e le mafai lava ona alu, alu faaoga loa lena e pei foi o le mea lea e tupu nei i le lalolagi. O le mea lea e taumafai nei i le lalolagi o le taumafai e taofiofi meatau ina ia aua le soona fauina meatau ma faaputu, aua o le iuga e oo i ai e fau, fau lava ma faaputu, e i ai lava le taimi e tulai mai ai nisi tagata i aso o i luma faaoga loa.

Lau Afioga i le Fofoga Fetalai, e faapena le agaga lea e tulai atu ai le Malo. O lea ua outou fai mai i le tulaga mamalu, a o lea foi e naunau atu le Malo i le mea e mamalu leaga ua tupu le mea lea o le le tasi o le nomination o le igoa e faatu, ae tolu nominations ua tupu i le taimi muamua. O le mea lena sa avea pea ma auala sa faatupu manatu i le Vaega Faaupufai lenei aemaise le Kapeneta, e tataua ona i ai se faiga ina ia aua ne i toe tupu mai. O le laki o lena mea o le sau ae tasi lava le tagata lea e agai i ai. E faapefea pe ana faapea e sau ae tolu tagata eseese? Ona tele ai lava lea o le vevesi.

Lau Afioga i le Fofoga Fetalai, o le mea lena, a le faigofie ia o nei mea. Se e mama lava mea i e loto mama, ae palapala lava mea i e palapala loto. O le faigofie ia o le faaitaiga lea e avatu ma na mafua ona avatu le faaitaiga leaga ua tupu muamua.

Lau Afioga i le Fofoga Fetalai, o le taua ia o le mataupu lea sa avatu e le Minisita ona o le tulaga lenei. Ua uma ona tatou pasia le Tulafono o Faiga Palota. Ua uma ma o lea foi ua oo i ai lou finagalo ma e le tataua ona toe fefoifoia faapea faatalanoaga i totonu o le Palemene lenei o luma, tua, luma, tua. Ua uma ona fai i ai le tatou faaiuga e faagasolo le Tulafono i le tulaga lea. Ua toe pau lava la le mea lea e totoe, ua toe o le Faavae. O le vaega lea o le Faavae e mafai ai ona faatino le tulaga lea. E pei o le mea lena o lea e faataua ai le saunoaga a le Tamaitai Minisita ona o lea o le a tatou tuu maa ae

maa i aau. O le taua ia o le toe faamanatu mai lea ona e pei o le a toe lauga sui usufono ma toe agai ai i tua lauga i mea ua uma ona pasia.

Ona pau lava o lea o nai vaega fou ia e avatu, o vaega ia e aafia ai le mea lea o le filifiliga o Lana Afioga Mamalu O Le Ao o le Malo, ma o le tulaga foi e le faapea o alu i se tulaga faanatinati. O lea e taoto mai i totonu o le Palemene, e alu lava i luga o tulaga masani. O lea ua uma ona faaali manino mai e lau Afioga i le Fofoga Fetalai, a uma ona faasee foi lea i o i le Komiti. Pe alu, alu filifili le Komiti ona faapea lea o le Komiti, e leai o faiga faapea e feiloai ai oulua ma le Taitai o le Itu Agai. E faapena le faasologa o mea, ona toe fai ai lea o se Teuteuga i le mea e fulisia i ai i latou e o atu e fai molimau i o i le vaega lea.

O lea foi e aumai i totonu manatua foi, a o le consultation le mea lea e fai. So o se Tulafono e le mafai ona pasia se Tulafono seia maea le consultation. O le consultation lea e fai i totonu o le Palemene, ae e le faapea o se Tulafono ua tamau le mea lea e aumai nei, o Teuteuga e aumai i totonu e faaali i ai finagalo ona toe ave foi lea i o i le Komiti e fai i ai faaiuga a le Komiti i faatalanoaga ma i latou e o atu e fai a latou molimau. Lau Afioga i le Fofoga Fetalai, ae manino lava mataupu, e leai lava ni mea alualua i fautuaga nei e avatu, e leai ma ni mea alualua o i ai.

Ua ala ona ou tau atu le mea lenei ona o le a tuu maa ae maa i aau le tatou mataupu.

**FOFOGA FETALAI:** Ua faamalo faafetai saunoa i lau Afioga i le Palemia. Tulai mai le sui usufono mamalu e faaauau le saunoaga.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai. O le manatu autu lava ia o lou sui usufono ina ia i ai se sao o so o se sui usufono e mafai ai ona faatino le vaega lea. Aua o le vaega tonu lava lea o lea tatou te taua o le faatemokarasi. Ona pau le vaega lea e mafua ai le le faia o le itu lea e pei ona saunoa le Afioga i le Palemia, o le process, o le umi o le taimi e faatino ai ma le lavelave ma e pei o mafuaaga ia.

O vaega uma ia e mafai ona foia, ae ui i auala ia faatemokarasi ina ia mafai ai ona faatino le vaega lea. Ona pau na o vaega ia ou te fia talanoa atu ai i le vaega lea e avatu ai se manatu. E i ai foi lou manatu i le vaega lea lona lua i le Tulafono o le suiga o le Faavae i le filifiliga o le Fofoga Fetalai, e moni lava e tele ina malo se sui a le Vaega Faaupufai o lo o toatele i totonu o le Malo, a o le faiga o le filifiliga i totonu o le Maota Fono e malo ai le tagata i se faiga faatemokarasi, o i ina e iloa ai le independent o le tagata o le a tulai mai i le tofiga o le Fofoga Fetalai, ona o lea sa filifili faatasi i totonu o le Maota lenei le Fofoga Fetalai. A aumai faapea i se vaega faapea ona i ai lea o lou talitonuga e leai se tutoatasi o le a i ai i le Fofoga Fetalai. O le vaega faigofie lenei e pei ona ou taumafai atu ai ma ou tatalo atu ai i le Faavae ina ia toe silasila ane i ai.

E moni ua saunoa le Afioga i le Minisita mo Faamasinoga ma Pulega Tau Faamasinoga i le Tulafono Autu o lo o agai i ai lenei Fonotaga, ae taua tele vaega ia e lua leaga o lea e aumai i luga i le Faavae. Afai e pasia le Pepa lenei, ona pasia ai lea ma vaega ia. E tatau lava la ona fai se sao o lou nei sui usufono ina ia faamalamalama ni atugaluga o lou nei sui usufono i vaega ia.

O le aua o lou tulai atu ina ia tutoatasi le faiga o filifiliga faatemokarasi i totonu o le Palemene.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai o le mea e fia faasao.

**FOFOGA FETALAI:** Malie le sui usufono o lo o saunoa se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Ua laga soo lava le mataupu lea ia tutoatasi le Fofoga Fetalai. Ou te le malamalama po o le a le uiga o lea upu o lo o tuuaia ai le Fofoga Fetalai ma le tutoatasi o lana faaiuga.

O le mea moni lava, o le taimi lava e saofai ai le Fofoga Fetalai i lona Nofoa, ua tutoatasi, a o lea e faataoto mai iinei le filifiliga. O le mea tonu lea e tupu nei, o le Itu lava e fulisia i ai le Pulega o le Malo aua o le mea e faatino i le mea e toatele i ai le Malo, o le temokarasi le mea lena. O le mea e toatele i ai faipule e lagolagoina se Vaega, o le temokarasi moni lena.

O le mea la lea e avatu i le Tulafono Tau Faaofi, o le faatinoga o le temokarasi lea o le matua faafaigofie ia i le tulaga o le otometi, aua o le Vaega Faaupufai lava e toatele, o le latou sui lava ua tulai mai e filifilia e aunoa ma le toe o i nisi mea lavelave e pei o le mea lea tatou te faia pea, e tiga lava ona iloa lelei e toatele lenei Vaega ma le sui e avatu, ae tatou omai lava iinei tatou auai atu i o e fai le palota. E i ai nisi o tatou e le lava savavali i o. O le ae atu i luga i le fasitepu lea, toetiiti lava sulu ai isi toeaiaina ua matutua. E le faapea foi e talavou uma le tatou Maota nei, a o se faiga e faigofie - aua o le taunuuga lava lena.

O le mea lea e avatu i le Tulafono Tau Faaofi, e le faapea e aveesea ai la outou aiatatau. O lea foi ua lauga mai isi, ia aua ne i toe alu le Fofoga Fetalai i lana Vaega na sau ai. Se i vaai i le maoae tele o nei mea ua aumai? O le a faapefea ona le alu le Fofoga Fetalai i le Vaega na mafua ai ona filifili i le Nofoa e auai i fonotaga e ave ai foi i ai la matou fautuaga e faamapue atili ai lana galuega e fai? O le tulaga lava ia i le faatinoga o ana galuega, e saofai loa i le Nofoa faatino ana galuega i Tulafono ua uma ona faataoto e limataitaiina ai le tutoatasi. E le faapea o ni Tulafono e pule lava le Fofoga Fetalai ia, a o la e manino Tulafono. O lea foi ua outou faafofoga atu o lea lava e fai ma tau mai e le Fofoga Fetalai le Tulafono e faavae ai lana faaiuga.

Lau Afioga i le Fofoga Fetalai, o le fesoasoani atu lena ona o lea lava e fai ma fesiligia, a o lea lava e tutoatasi le Fofoga Fetalai. Ou te ofo foi i lo outou fai mai e le o tutoatasi le Fofoga Fetalai? O nai manatu na e fesoasoani atili ai i le tatou mataupu.

**FOFOGA FETALAI:** Tulai mai le sui usufono e faaauau le saunoaga.

**Tofa AVEAU TUALA LEPALE NIKO PALAMO:** Lau Afioga i le Fofoga Fetalai, e leai lava se manatu o le sui usufono lenei e fesiligia ai le tulaga o Lana Afioga Mamalu O Le Ao o le Malo po o le tulaga ma tiute faafoe o le Fofoga Fetalai, ona pau lava le mea lea ou te fesiligia o le process. O le auala e faatino ai le filifiliga lea aua e tusa lava pe umi se filifiliga pe a tasi i ai le Palemene, o le filifiliga lava lena o lea e manaomia lea e ala ai ona

tatalo atu, ae e le o manao lou sui usufono e omai se vaega toatele e faapea mai, o le sui lea. E leai lava ma se isi mea ia te au, ona pau lava le mea ia te au o le endorse i totonu o le Palemene leaga o lea ua fai le Tulafono lenei. E matua leai, leai ma se sao o le sui usufono lenei i le faatuina o le vaega lea. O le mea lena o lea ou te tatalo atu ai, e leai e le o le tulaga lena o lea ou te talanoa atu ai, o le process, o le auala e faatino ai ina ia tatou alu i auala faatemokarasi.

Ona ou oo mai lea i le Vaega lea o Faiga Palota.....

**Susuga Hon Tuilaepa Fatialofa Lupesoliai Aiono Neiote Sailele Malielegaoui:** Lau Afioga i le Fofoga Fetalai, e pei lava e i ai se mea lea e le o malamalama ai le sui usufono.

O le upu lea temokarasi, e faasino i auala faatino i le mea o lo o fulisia i ai le toatele o le atunuu. O lena, o le uiga lena o le upu temokarasi. A silasila la i le fuaiupu lea aua e ala ona ou faitau atu le vaega lea, ona ou te faitauina pea, faitauina pea ma faitauina pea leaga o la e faafogafoga mai le atunuu. O lea e faafogafoga mai i le mea lea ua outou fai mai ai e eleelea le mea lea e avatu e le Malo. O le mea lea o lea o lo o outou tetee ai o le fuaiupu lea “18. (1). O Le Ao o le Malo, o le a tofia e le Fono Aoao Faitulafono, i le faia i luga o le fautuaga a le vaega faaupufai po o ni vaega faaupufai o pulea le Malo.”

Lau Afioga i le Fofoga Fetalai, o le mea lena o lea e tetee ai i tofiga nei, e aofia ai foi ma le tofiga o le Fofoga Fetalai, i le auala e faatino ai, a o le Vaega e fulisia i ai le pulega o le Malo, o i latou na e aumaia le tagata i totonu ae fai i ai le tatou faaiuga, e fai i ai le faaiuga a le Maota atoa. E le faapea o faia matutu.

Lau Afioga i le Fofoga Fetalai, o le toe fesoasoani atu lena, o lena e manino lava upu e faamatala ai auala o mea.

**FOFOGA FETALAI:** Tulai mai le sui usufono mamalu toe lima ou minute.

**Tofa AVEAU TUALA LEPALE NIKO PALAMO:** Faafetai. E ala ona ou fesiligia ona o le faamoemoe pei ona ou faitauina atu le vaega lea o faamoemoe o le Tulafono Tau Faaofi. O le faamoemoega o le Tulafono Tau Faaofi lea e i ai e aumai i le Itu o lo o toatele, ae ui i lea, o lea ua maea se manatu.

Ona ou oo mai lea i le Tulafono Autu pei ona saunoa le Afioga i le Minisita mo Faamasinoga ma Pulega Tau Faamasinoga. Ia ou te masalo foi ua tele ni manatu ua uma ona fai i lea vaega. Ma e talitonu foi o lo o i ai foi se taimi o le a avatu ai se manatu. Na pau lava lea o le vaega o le Tulafono Tau Faaofi lenei ou te tatalo atu ai i lau Afioga i le Minisita, ona a oo ina faatalatalanoa e le Komiti le vaega lenei, o le a leai se avanoa e mafai ai ona faafogafoga lau Afioga i le Minisita aemaise o le atunuu i le vaega lea.

O le vaega muamua, o le faatulaila o lenei Vaega i totonu o Faleata Sisifo ma Faleata Sasae, ae faaigoa o Sui o le Taulaga. E leai lava se eseese o le faaigoa o le Sui o le Taulaga ma le Sui o le Tutoatasi. Afai ua saunoa nisi o ni kalapu, e pei foi e foliga o se kalapu, town area, mea faapena, urban seat, a o lea e tu i totonu o le itumalo.

O le vaega lona lua i totonu o le Tulafono Tau Faaofi lenei, e le mafai e se matai Faleata ona tauva i le sui lea. Aisea? Aisea le mea e le mafai ai e le

matai Faleata? O lea e maitau atu seiloga e i ai se isi suafa matai o se tagata Faleata e matai ese mai se isi nuu ona faatoa mafai lea ona alu...

**FOFOGA FETALAI:** Malie le sui usufono mamalu se i tulai mai le Minisita mo Faamasinoga ma Pulega Tau Faamasinoga.

**Afioga Hon Fiamē Naomi Mataafa:** Lau Afioga i le Fofoga Fetalai, o le mea e fia faasao. O le taumafai atu lava, po o fea le Tulafono o lo o fai ai le tatou talanoaga lea ua fai, aua ua uma ona tatou talanoa, o manatu faavae o suiga ia na aumai i le tatou Tulafono Tau Faaofi o Teuteuga o le Tulafono o Faiga Palota. Ae pei foi la o lena ua saunoa manino foi lau Afioga, peiseai o lea o le a toe fai le tatou talanoaga lea. Ma le faaaloalo lava, ou te manatu, ia aumaia se faaiuga i le Laulau, o le a alu ai le tatou taimi, a o lea lava e i ai avanoa tatau i totonu o tatou Tulafono Tumau, Standing Orders i le faagasologa o tatou galuega. Aua o le mea moni, o lea o le a toe faafoi le talanoaga i le mataupu lea. A o le mea moni lava lau Afioga i le Fofoga Fetalai, o le Teuteuga o le Faavae, e tatau ona fai, aua e tua mai i ai le Tulafono lea, a o le autu lava ia o le Tulafono o Faiga Palota. O le tele o vaega o le tatou Faavae, e i ai lava le faaupuga faapea, e faasino pe faamoemoe le faataatiaga o Tulafono mai lea taimi i lea taimi, e faamoemoe i le Act.

A o lea la ua maitau atu i le Tulafono Tau Faaofi lenei, o lea o le a toe alu atoa lava le tatou talanoaga i le Teuteuga o le Tulafono o Faiga Palota. Ma ou te tatalo atu ai i lau Afioga, se i aumaia se Faaiuga a le Nofoa, aemaise lava i le itu lea, sa tatau ona malamalama sui usufono o le Maota lenei, na aumai loa le Toe Teuteuga i totonu o le Tulafono o Faiga Palota, sa tatau ona tatou malamalama e o faatasi ma le Toe Teuteuga o le Tulafono Faavae. Ma le faaaloalo lau Afioga.

**FOFOGA FETALAI:** Malo. Ia, faafetai atu lava i le toe tulai mai a lau Afioga i le Tamaitai Minisita, ma e i ai foi le faamoemoe o lo o manino ma malamalama lau folasaga na avatu muamua. O le ala foi lea o le a ou toe faamanatu atu le sui usufono mo Faleata Sasae aemaise foi nisi o sui usufono mamalu e le i saunoa i le mataupu lenei. Ua outou silafia le tatou Tulafono Tau Faaofi lenei na toe faaui i tua. Ia outou iloa lelei le talanoaga o le tatou mataupu lenei na toe faaui i tua, ona o aiaiga ma mea ia. E tasi lenei mea taua sa lagalaga tele i o outou finagalo, aumai muamua le Teuteuga o le Faavae, aumai muamua le mea lea ua tatou talanoa ai nei, a o lea ua uma ona alu le tatou mataupu. O le ala lea le paia e ma le mamalu o le tatou Maota, ua ou toe talosaga atu ma e tatau foi ona fai se tatou Faaiuga, palepalealuga le tatou mataupu e le iloa po o fea le vatapuia e gata mai ai a outou saunoaga agai i le mea lea i le Palota Taitoatasi. A silasila foi outou, ne i meaane ua mau eseese Tutuila ma Ape, o le consultation le tatou mea lea e fai, e ao manogi o a outou saunoaga, ona agai mai lea i i toe agai i le tatou Komiti faatoa toe agai mai maua le faaiuga. Silasila foi i le malamalama o le mea lea na saunoa i ai le Malo, e leai se suiga na o le fesuaiga lava e aveese mai le Palota Taitoatasi i Nofoa o le Taulaga. O isi faiga faavae ma isi mea, se o mea na e teuteu i le taimi e fai ai le consultation ona faatoa maua ai lea o le auga e tasi e taunuu i ai le mea lea e i ai le atugaluga lea foi e popole mai i ai sui usufono o le Palota Taitoatasi po o fea le mea o le a alu i ai le mataupu. Ae malilie sui



usufono o lea ua ou toe tuu atua leaga o lea ua tulai faalua mai le Afioga i le Minisita e a ia le Tulafono Tau Faaofi. Se i palepalealuga mai a outou saunoaga agai tonu i le suiga o le Faavae ona malamalama lea o le tatou mataupu.

**FOFOGA FETALAI:** Malie se i tuu atu le avanoa i le sui usufono mo Faleata Sisifo.

Tulai mai le sui usufono mo Faleata Sisifo.

**Tofa Lealailepule Rimoni Aiafi:** Faafetai lava i lau Afioga mo le faaaliga manino, o lea foi ua faalogologo atu. O lea na saunoa manino lava lau Afioga, o le Faavae, o le Tulafono Sili lea o le Tulafono e sili atu i le Tulafono Autu. Ma mo le faaauauina o le Tulafono Autu, e ao ona sui le vaega lea o le Faavae ona faaauau ai lea pei ona saunoa le Minisita, enabling. O lona uiga o lau faamatalaga, e tele le suiga o le Tulafono Autu pe a le pasia le Faavae lea. O lea la e ala ai ona tatala atu finagalo lau Afioga, ona e taua tele, aemaise lava i mea tau itumalo ma palota ma suiga tetele pei ona suia mai ai. E le laitiiti pei ona e saunoa lau Afioga i le Fofoga Fetalai. E le laiti suiga o le Faavae lea e aumai. E tatau foi la ona e logosaia lau Afioga, o lea e faaali atu finagalo, o lea ua uma lava isi mataupu, ae tele mataupu lea na aumai i le Faavae. E faamalie atu i lau Afioga aemaise lava o matou nei sui usufono o lea e aafia tonu i le suiga o le Faavae, e tatau lava ona aumai se avanoa e faaali atu ai ni finagalo ma ni manatu, leaga e le tutusa uma sui usufono o le Palemene. Ae o le Tulafono Tau Faaofi o le Teuteuga o le Faavae (Nu.2) 2014, e tatau lava ona aumai se avanoa e faaali atu ai ni manatu leaga e le tutusa uma sui usufono o le Palemene. A o le Tulafono Teuteu o le Faavae, o lea lava e silafia e le tau faaali atua i lau Afioga. O le Tulafono Autu Silisili lea e fai fuafua ma agai i ai le Tulafono Autu. Ma le faaloalo lava.

**FOFOGA FETALAI:** Ia, o lea ua maua le finagalo o le sui usufono mamalu. Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e ala ona faigata mea o le tatou nonofo ma faamamafa ma soona faafaigata mea faigofie. O le faigofie ia o nei mataupu tatou te talanoaina. Ona ua pau lava ua aumai le tapenaga a i latou foi o le au tusi Tulafono. Ae masalo ana omai faatasi lava Tulafono Tau Faaofi ia e lua, ua leva ona uma lenei mataupu. Ua uma foi la ona matua oooo lava i ooooga ma saausi le felafolafoaiga i le tulaga lava lea o le palota, ua leai lava ni mea o totoe. Ua leai lava ni mea o totoe, na pau le mea o le fai o le Faiga Palota pasi le Tulafono, a o lea e taoto nisi o saunoaga sue le Faavae e regularize ai suiga ia a si vaega lea faatatau mo sui ia tau le taulaga. Toe pau lava lena o le mea e moomia ai le Teuteuga o le Faavae. O lona uiga la, o faamatalaga uma lava, ua uma ona oooo i ai lauga, o le ala lena o lea e tutulai atu ai le Tamaitai Minisita o ia lea e nafa ma le Tulafono Tau Faaofi Tau Faiga Palota, ua finito, ua uma, ua uma le talanoaga. Toe pau lava le mea lea e totoe, toe o upu o le Faavae e aloaia ai Teuteuga ia leaga o lea e i totonu o le Faavae le vaega lea o Au Palota Taitoatasi, e tatau ona faasee aloaia ese ma i, ina ia faatuina ai loa le tulaga lea. O lona uiga la, e leai lava nisi mea

lavelave, ae pei ua mamafa lea mea, o tatou lava uiga faapolokiki. O tatou uiga faapolokiki lava ia e manao ia faafoliga e tele le mea polokiki lea e i ai. Lau Afioga, o le matua mama lava o lenei mataupu. O mataupu faatauvaa tele. Ae na pau lava le mea o lea e fai mai o le Faavae e a igoa ma a igoa, ae ua uma ona tatou pasia mea e tatau ona tuu i totonu o le Faavae. O lea ua uma ona tatou pasia i le Tulafono o Faiga Palota. Na o le pau lava la le mea o le tuu loa o le Yes i totonu o le Faavae uma loa mea uma. O lenei ua oo lava i le Aso Gafua o fai lava nei faiga. Se e pei lava o le ao.

Lau Afioga i le Fofoga Fetalai, leai o lou toe tulai atu lea e toe faamamafa lava le vaega lea e saunoa manino i ai le Tamaitai Minisita.

**FOFOGA FETALAI:** Se i toe tulai mai le sui usufono mo Siumu.

**Tofa Hon Tuuu Anasii Leota:** Lau Afioga i le Fofoga Fetalai, e fia malamalama lava lou nei sui usufono i le saunoaga a le Afioga i le Palemia ma le Afioga i le Tamaitai Minisita. O le Faavae lea e Teuteu, e le o se tamai mea lenei na fai. O le faiga nei e aafia ai taeao ma aso a sau. O lea foi la ua aumai Teuteuga e fuafua i le Tulafono lea o Faiga Palota. E sala la ina aumai le vaega lea i Nofoa ia o le Palota Taitoatasi, aua e aafia ai le Tulafono lea, a o le aumai ai fua o le Teuteuga i le tofiga O Le Ao o le Malo, e le aafia ai i le mea lea. Ma lou faaaloalo lava.

**FOFOGA FETALAI:** Ia, o le agaga lava ia i tulaga o Teuteuga o le Faavae, e pule lava le Malo i le latou Teuteuga e aumai, a o lea foi e aumai i ala o mea i totonu o le Maota. A o a Teuteuga e... o se mea matagofie lenei mea e teuteu nei teuteu taeao toe teuteu talaatu taeao? E le o ni tapenaga... Silasila outou, na amata le Teuteuga o le mea lenei, na amata mai le filifiliga muamua O Le Ao o le Malo, le uluai filifiliga O Le Ao o le Malo mai le uluai taimi na faatino ai le faiga o le Faavae. Silasila outou? O se taimi puupuu na mafaufau ai le Malo e aumai Teuteuga nei? Silasila? E le mafai ona tuulua leaga o lea ua ou tautino atu, o le ala foi lea e ala ai ona ou taumafai e faamalalamalama atu, i meaane outou o nofonono a o alu mea ia. O lea ua ou tau atu, ina ne i meaane ua outou fesiligia po o fea lea ou te i ai ae sui mea ia. E le mafai le mafai, e ave le tuualalo i le Palemia. O le manatu la o outou e fai pogisa a tatou mea? Ae silasila outou i le malamalama o le saunoaga a le... A tatou o nei e toso le tolaulauina o le Tulafono o Faiga Palota, talofa e, na o Papaliitele lava ma Maualaivao na asaasa le la mataupu, e leai ma se isi o outou na talanoa i le mea lea pe fesoasoani i le mataupu a le toalua lea. Na pau lava le mea lea na augani mai e aumai le Faavae se i fai e o faatasi ma le Tulafono lea e saunoa i ai le Minisita mo Faamasinoga ma Pulega Tau Faamasinoga. Ae malilie sui usufono, o lea ua ou taumafai atu ne i meaane ua tatou toe o e toso le mea tele lea ua ou tau... Silasila foi o lea ua saunoa le Minisita mo Faamasinoga ma Pulega Tau Faamasinoga, ou te le o fai atu Lealailepule e leai so outou avanoa. O lea ua ou fai atu e fai ae fai fuafua mai, o lea ua uma ona tatou talanoa. Ou te le o fai atu aua ne i outou tautatala i le mataupu, leai. Silasila foi ua faalua ona tu mai le Minisita a o lea lava ou te tuuavanoa atu, e ava tele atu, leaga e le tatau ona le aafia, o le suiga o itu e aafia ai Maualaivao ma Papaliitele.

O le ala lea malilie sui usufono, ia outou seu silasila. A outou faaaloalo i le mea lea ou te talosaga atu ai, ona outou alofagia lea e tata mai i le moa o le

ala ua uma ona tatou tautalagia le mea lea. O se tamai mea puupuu lava e aveesea ai le igoa o le Tutoatasi ma le Sui o le Taulaga, east and west, uma, ona malamalama lea. A o isi faiga faavae uma ia tou te atugalu i ai, we are still in the consultation of the Act. E uma nei, ona ave lea i le Komiti, e tele lava, fesili i le atunuu. Silasila outou? Ae o le a umi le tatou taimi. A o lea e faamoemoe e tatau ona uma le tatou Fono nei. E tele isi tuatuaanoa, a o lea o le a alu lava alu lava o lea e taumafai ona faamalamalama mai lava i le 9:00 i le taeao o lea e faamalamalama atu.

Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, faatoa uma nei lava, masalo pe toalua sui usufono o le Itu Agai na lauga i le mataupu lava lea e tatau ona tutoatasi lau Afioga, tuu se avanoa i le Vaega le la, a o le maitau a le matou Vaega Faaupufai, ua e faaauau tele i o i le Vaega le la, ua e tuu avanoa tele i tulaga o mea ua uma ona pasi. O le mea lena o lea ua ou toe tulai atu ai ona o lea e pei ua tatou toe talanoaina Toe Teuteuga e fai i le Tulafono o Faiga Palota ua uma ona tatou pasia.

E ala ona ou talanoa i le mataupu lena o lea e tuuai oe, tuuai oe, tuuai oe i lou le tuu avanoa ona e te le o tutoatasi, a o le mea ua matou vaaia ua e ova tutoatasi tele.

**Afioga Hon Palusalua Faapo II:** Lau Afioga i le Fofoga Fetalai ma le faaaloalo lava.....

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon Palusalua Faapo II:** Ua leva ona ou fia tulai atu i luga a o lou faaaloalo i lau Afioga i le Fofoga Fetalai. O le mea lea e tulai mai o le Teuteuga o le Faavae, tatou te vevesi ai. Pe uma le aso lena ma taeao, a o le Teuteuga o le Faavae e le faigofie.

E ui foi ona ua saunoa le Afioga i le Palemia o sina tamai mea lava ma o se mea mama o se a, ma se a. E pei o se mea mama e le faatauaina le mea lea. E leai la lau Afioga i le Fofoga Fetalai, leaga o le Teuteuga o le Faavae, o le Tulafono Autu a le atunuu. E le faataga faia i ai se finagalo o le Maota lena. O le Teuteuga o le Faavae aemaise o le Ao o le Malo lea e taoto ai. O lea la ua tutulai mai nei e faatau le Tulafono Tau faaofi, a o lea e Teuteu ai ma le Faavae.

O le ala lena o le tutulai atu o le Itu lena, pe vevesi pe a, ua tatau. Ua tatau ona tatou vevesi, e tatau ona umi le Fono leaga o le Teuteuga o le Faavae. E le o se mataupu mama la le mea lea, e le o se tamai mea e pei ona saunoa le Afioga i le Palemia. O lea e faamasino mai le atunuu.

**FOFOGA FETALAI:** O lea ua maua lou finagalo. Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, so o se finauga e fai i le Palemene lena, afai e faaape ona tulai i luga Palu, ae faaape ma le tasi ona ou tulai atu leaga o le upu faaiu lava e avatu i le Malo. E le mafai ona tuufau e le

Malo se upu faaiu sese e tuu atu e o i le Itu le la. Afai e faasefulu afe ona tulai i luga Palu i le aso, e faasefulu afe ma le tasi ona ou tulai i luga. E le mafai ona tuu atu ia Palu le final saying. O le tasi lena mau ia e malamalama lelei i ai.

O le mea lea e aumai, ia i ai le avanoa o le Palemene e filifili ai. O le mea lena lea e aumai nei, ia i ai le avanoa o le Palemene ma ia i ai lona leo e filifili ai le Ao o le Malo ma le Fofoga Fetalai ma o le auau atoa lava lena. O a la upu ia ua outou i ai? O lea o le a ou toe lauina atu. “18. Tofiaina o Le Ao o le Malo (1) O Le Ao o le Malo, o le a tofia e le Fono Aoao Faitulafono , i le faia i luga o le fautuaga a le vaega faaupufai po o ni vaega faaupufai o pulea le Malo.”

Ia vaai i le manino, e fai e le Palemene le tofiga. O upu nei e soona faafelelei solo; o le Faavae e mamalu, e paia. Ioe, e mamalu, e paia. A o le a la lo tatou tiute e fai? Ia tatou taumafai e faamamalu atili ma faapaia atili. O le mea lea e i ai i le faiga lea sa faataoto mai i le amataga, sa lelei i le taimi lena a o le i faia ni Vaega Faaupufai. O lea la ua oo mai i o tatou taimi, e tatau foi la ona tatou Toe Teuteuina ina ia toe atagia ai le taimi lena ua tatou i ai. O lea foi e manino lava i le Fono Faavae, o a lava nisi Teuteuga e fai ia lafo ia i latou o le a i ai i totonu o le Palemene i lena taimi. O lea e tatala le avanoa aua foi e leai ni Tulafono e tamau. Na o le pau lava Malo na latou faia mea faapena na o Peresia ma Metai. A pasia loa e Metai ma Peresia se tulafono e sa se isi ona toe suia e tusa lava pe sese i taimi mulimuli. O fea la o i ai Metai ma Peresia? Ua leai se Peresia, leai se Metai aua foi e le faapena le lalolagi lena tatou te i ai? O le lalolagi e fesuisui, ona faapena foi lea ona fesuisui o tatou olaga e faatatau i le taimi ua tatou i ai.

O lea foi e manino lelei i le Fono Faavae, o a mea sa latou suia, ia sui e latou i le tofa mamao na i ai i tama o le atunuu. Ona lafo mai lea i augatupulaga o le lumanai, o a foi ni mea latou te silafia ua talafeagai, ia teuteu e latou e fua i le taimi o i ai.

Lau Afioga i le Fofoga Fetalai, o le ala lena o lea ua ou toe tulai atu ai. O le a ou toe faitauina atu le vaega lea ona o la e fai mai o e leai se avanoa o le Palemene lena e aafia ai. A o lea la o le a ou toe tolaulauina atu le fuaiupu 18. “18. Tofiaina o Le Ao o le Malo-(1) O Le Ao o le Malo, o le a tofia e le Fono Aoao Faitulafono, i le faia i luga o le fautuaga a le vaega faaupufai po o ni vaega faaupufai o pulea le Malo.” O le mea lena o lea e tupu nei. Po o fea lava le mea e agai i ai, e le mafai ona tofia e nisi mai tua le tofiga O Lana Afioga Mamalu O Le Ao o le Malo. E aumai lava i totonu le fautuaga e i latou o lo o tu i le foe o le tatou Malo. Ia vaai i le faigofie? Ona omai loa lea i totonu o le Palemene lena, e aumai o le fautuaga, ona fai ai lea o le tatou faaiuga. Ia se i vaai la i le faigofie, a o le fai mai o le matua mamafa lava o lena mea, o le a polokiki.

O lea o le a agai i le 9 au Nofoaiga i totonu o le Palemene lena, e leai lava ni polokiki faapea e fai ai. A o le mea lea e aumai, e aumai e i latou e fou uma i totonu o le Palemene. Lau Afioga i le Fofoga Fetalai, o le toe faaopoopo atu lena i le mataupu; o le faigofie ia o lena mataupu.

**FOFOGA FETALAI:** Ou te faamalulu atu i lau Afioga i le Palemia e tusa ai ma lau saunoaga ina ne i e matau mai ua agai le Fofoga Fetalai ina ou faaauau i lea Itu o le Maota - tasi ae foi lau saunoaga. O au nei ina ua filifilia au e lou itumalo, o le tuualalo lea ma le faatonuga na aumai, “Tautuana le

Maota o le atunuu ona e le faigofie se tagata e toe tu ma auau Samoa i ona tulaga faalupe.” A o le saunoaga foi a Tama Faale-Agaga, “Laauli, ia e tausisi i le faamaoni ma le tautoga aua le vaaiga o le Maota.” E i ai le isi Faafeagaiga Malolo Manumalo o lo tatou nuu sa ia faaui mai ia te au le feau na ui atu ia te ia i fanua ma ona tapuafanua i aga a o tatou matua. E le o se tala’ole le tala lea ou te tau atua. Na tau mai ai Maafa, Vaai ma Tofilau. Na fai mai le tala a le toeaina, “Sole, o le feau lea na aumai ia te oe, ia e alofa lelei ia Palusalua ma le Itu Agai.” Na ona ou tau atu faapena ae e le o ni tala’ole ia ou te avatua.

O le ala lena lau Afioga i le Palemia ou te faamalulu atu ai. Ou te vaai tele i le silasila mamao, i le tilotilo ma le tagatagai i lea Itu o le Maota. O le Itu e toaitiiti, ae afai o le a sa outou silasila i lou taumafai atu ae e le o amanaia e lea Itu o le Maota, na ona ou faapena atu. O le agaga ma le faamoemoe e avatu pea avanoa. A outou mataitu lelei i le tatou mafutaga, o lea o le a savali i le tolu tausaga ma ou te le toe tau fai atu. Ana pau mai o tama sasao, ua leva lava ona tatou malolo, ae silasila foi o le vaitau lenei e le o toe i ai ni avanoa o ni fefulituaaiga ona e ava tele atu. E faapena foi la ona ou talitonu e faapena lo tatou va nonofo ma le va tapuia. Ua uma na taimi sa tulai mai ai feteenaiga ma mea uma i la tatou faasoa, a o le taimi lenei ia outou malamalama gofie ia. Ia faatulai le tatou mataupu ina ia mafai ona sagatonu lau o le fo ma faasolo a tatou galuega i le mea e tataua ona i ai.

Aveau, na ona ou toe faamanatu atu. Ia lafo mai lou faatuatuaga o au o le Taitaifono o le Komiti, o lea ou te faamaumauina uma lava a outou saunoaga ia e fai, ona fai lea o lau Lipoti e ave e faamanatu i le Komiti, o le tulaga lea sa i ai finagalo autasi o le Palemene, ae faaiu maia lau saunoaga ua maea lou taimi.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai.....

**Tofa Hon Tuuu Anasii Leota:** Lau Afioga i le Fofoga Fetalai.....

**FOFOGA FETALAI:** Le sui usufono mo Siumu, o le a se isi mataupu?

**Tofa Hon Tuuu Anasii Leota:** Leaga o lea sa pei e te tau le pua ma lafo mai e faapea ua ou fesiligia po o fea sa e i ai i le taimi na tuuina atu ai le Tulafono.

**FOFOGA FETALAI:** E leai, e le o lou finagalo lea Tuuu. E faasao atu e le o lau Afioga lea na ou agai atu i ai, o lea ou te tuu talaloa i finagalo uma ina ne i faapea ua ou nofonofo ae le faia se fautuaga i le Malo e pei e faapea ai ua soona fai. O le mafuaaga lea o lou fai atu, ae aua le tee le uluga o lea ua ou malamalama. E leai, e le o lau Afioga lea na ou agai atu i ai.

Tulai mai le sui usufono mo Faleata Sasae.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai, e faafetai foi i lau Afioga i le Palemia mo le faamalalamalama o le vaega lea.

I le Vaega lea o le Tulafono i Lana Afioga Mamalu O Le Ao o le Malo, o lou lava manatu lea o le a fai atu i le Fuaiupu 18 e pei ona e saunoa. O le mea

e tatau ona i ai i lou manatu i le Fuaiupu 18. Tofiaina o Le Ao o le Malo-(1) O Le Ao o le Malo, o le a tofia e le Fono Aoaofaitulafono. Ou te le auai i le vaega lea e faapea e faia i luga o le fautuaga. O le mea tonu lava lena o lea e avatu ai lou manatu lau Afioga i le Fofoga Fetalai. O lou lava manatu o le fuaiupu lea e tatau ona faapea, o le Ao o le Malo o le a tofia e le Fono Aoaofaitulafono.

Ona ou see mai lea e faauma atu lou manatu i le vaega lea e pei ona saunoa le Afioga i le Minisita.....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea la lea na ou fefe ai aua o lona uiga tatou te omai e tofia ae leai se isi e tofia ma e tatau lava ona i ai se suafa e aumai i totonu, ae tatau foi ona i ai se isi na te aumaia. O le mea lena o lea ou te popole ai i le fautuaga a le sui usufono ona e tatau ona i ai le siusiu. E le siusiu lau fautuaga, e tatau ona manino le sui ma e tatau foi ona manino le na te aumaia i totonu. O le matua le siusiu lava o lau fautuaga.

**FOFOGA FETALAI:** O lea ua manino lau folasaga, o lea ua tuu i lalo ma le full stop lea na e saunoa mai ai, o le a faaoo i luma o le Komiti, ae tulai mai le sui usufono.

**Tofa AVEAU TUALA LEPALE NIKO PALAMO:** Faafetai, a finagalo lava e avatu le siusiu o lena, ae a leai o le a ou le oo foi i ai i lea vaega.

E faamalulu atu i lau Afioga i le Minisita mo Faamasinoga ma Pulega Tau Faamasinoga, ona o totonu o le Faavae i le Tulafono lea ua aumai nei o lea o le a faatu ai se sui e tau o le Sui o le Taulaga, a o le sui lena o lea e tu i totonu o Faleata Sasae ma Faleata Sisifo. O le vaega lea e mafua ai ona avatu se manatu ina ia saga lagolago ai lea manatu. Afai e alu sao i le Faavae, ou te le lagolagoina la le Vaega lea o le Faavae. Ou te le lagolagoina le vaega lea i le faatu o se Sui o le Taulaga ona e i ai lou manatu, afai lava o lea e lelei le tulaga o i ai nei i le Palota Taitoatasi, tatou alu ai pea i le Palota Taitoatasi.

Lau Afioga i le Fofoga Fetalai ma le mamalu o le Palemene, lau Afioga i le Palemia ma le mamalu o le Kapeneta, o nai motugaafa na mai le sui usufono mo Faleata Sasae aua le suiga o le Faavae e pei ona faataatia mai.

Ma le faaaloalo lava.

**FOFOGA FETALAI:** Tulai mai le sui usufono mo Gagaemauga Nu.2 e saunoa.

**Tofa LEVAOPOLO TALATONU:** Faafetai i lau Afioga i le Fofoga Fetalai ona ua maua se avanoa. E puupuu lava foi se manatu o lena itumalo i le mataupu e pei ona taoto nei.

Ou te fia faitau atu pea le Fuaiupu 18: Tofiaina o Le Ao o le Malo-(1) O Le Ao o le Malo, o le a tofia e le Fono Aoaofaitulafono, i le faia i luga o le fautuaga a le vaega faaupufai po o ni vaega faaupufai o pulea le Malo.”

A oo mai loa la i le Fuaiupu 18(4) ona manino mai ai loa lea o le auga atoa o le Tulafono: “...pe afai ua i ai o se avanoa i le tofi o Le Ao o le Malo, o le vaega faaupufai po o vaega faaupufai o pulea le Malo, o le a tuuina atu i le Fofoga Fetalai o se Faasilasilaga tusitusia, e fautuaina ai le suafa o se tagata e toatasi (1) e ao ona tofia...” E leai la se mea o le a toe aumai ai i totonu o le

Palemene pe a faapea ua ae le tofa ma ua tasi le tofa i le Vaega Faaupufai o taitaia le Malo ma tusi aloaia atu i lau Afioga i le Fofoga Fetalai.

O le mataupu lenei lau Afioga i le Fofoga Fetalai, ou te talia le tulaga lea e eseese taimi.....

**Susuga Hon Tuilaepa Fatialofa Lupesoliai Aiono Neioti Sailele Malielegaai:** Lau Afioga i le Fofoga Fetalai o le mea e fia faasao.

**FOFOGA FETALAI:** Malie le sui usufono o lo o saunoa se i tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaai:** Ona pau lava le mea e fia faasao. O le (4) lena o lo o fautuaina ai le suafa o se tagata e ao ona tofia. E muamua le upu fautuaina, ae mulimuli le upu tofia ma le toatasi la lena e i ai, o lena ua faamaonia ai e tasi lava e aumai mamalu. O lea la ua toe faamaonia ai i le vaega lea le agaga lea o le Malo, ia fai mamalu, e tasi ae le lua.

**Tofa LEVAOPOLO TALATONU:** Lau Afioga i le Fofoga Fetalai, o lau matau aua ua lua nei filifiliga o Lana Afioga Mamalu O Le Ao o le Malo a o ou i ai. Mai le amataga o le faigata ia e sao sa umi ma tulaga faapena. Na ou mai i le isi filifiliga, e tusa e 10 sekone ta te alu ai i luga i o ma toe sau iinei.

E pei lava ona ou fai atu lau Afioga i le Fofoga Fetalai, e auai lou manatu i le tulaga o fesuiaiga. E i ai lava taimi e fesuisuia ai tulaga i le atiaaina o lo tatou atunuu ona fua foi lea o nai suiga i faaupuga ma a tatou Tulafono aua o le tai ma lona taaga, o le mafua foi ma lona fulu. O le mataupu lenei lau Afioga i le Fofoga Fetalai i le Ao Mamalu o lo tatou Malo, ou te lagolagoina nisi o vaega, a o le Ao Mamalu o lo tatou Malo o se mataupu e ao ona tatou soalaupule ma le faaeteete, ia seu ma le mata toaga le tatou felafolafoaiga ona e le o se.....leaga o se tofiga e tu matie, e le tutusa ma le tofiga o le Afioga i le Palemia ma le Fofoga Fetalai o le Maota. E vala. O le mea foi lena a faapea e sai atu ma tetele atu ni a matou fautuaga i le tatou consultation lea e fai, ia e faamalulu atu, a uma foi ona avatu loa le Komiti e fai ai le latou, fua pau lava lea o le tulaga ou te toe faamanatu atu i le Afioga i le Palemia o le atunuu ma lena vaega, e faataua ia te au le tulaga o le HRPP o le Puipuiga o Aiatatau a Tagata uma o le atunuu, afai nei o lena o le a fai mai i ina le itu lena ia le filifiliga o Le Ao o le Malo, e 21,887 tagatanuu o le atunuu sa lagolagoina lenei itu. O lona uiga la lau Afioga i le Fofoga Fetalai, o le a le logona se leo ma faaaoga ma logona lo latou aiatatau e latou te silasila ma fai ai le latou filifiliga i Le Ao Mamalu o le tatou Malo, ona o lea e fai le tatou consultation, o le fautuaga lau Afioga i le Fofoga Fetalai e faapea, na o se teuteuga a Saleaula i le vaega lea, afai ua uma ona fai la outou filiga o le tai i se tasi po o se lua, ae manaia lava pe a lua, ia ona aumai loa lea tuu i luga o tatou pepa palota, e faigofie lava le kolosi o le tagata i lana sui e silasila i ai ia ma kolosi atu ma lana faailoga i se isi o le a avea ma Le Ao Mamalu o le Malo, ae o lena ua faaaoga uma aiatatau ua puipua aiatatau uma lava, a so o se tagatanuu o le tatou atunuu. Ma le agaga faaaloalo pau lea, faafetai.

**FOFOGA FETALAI:** Malo faafetai fesoasoani mai i le tatou mataupu. O lo o maua pea le avanoa i se isi sui usufono, a leai loa o le a tuu atu le tatou

fesili. Ia o lea ua tulai mai se tasi o sui usufono mo Palota Taitoatasi, Afioga Maualaivao Pat Ah Him, tulai mai lau Afioga i le sui usufono.

**Afioga MAUALAIVAO PAT AH HIM (Palota Taitoatasi):** Faafetai i le avanoa i lau Afioga i le Fofoga Fetalai, ma ou te talitonu foi i lenei itula ua faafetai foi ua mafai ona maua le avanoa e molimoli ai ni finagalo e tusa ai ma lenei Tulafono Tau Faaofi aua le suiga o le tatou Faavae. Le paia o lo tatou Maota nei, e talitonu e avatu sina manatu laitiiti ona o lo o aafia tele ia so matou lagona e tusa ai ma le matou itumalo, ia leai, e matou te le toe sagolegole le filifili o le vaosa, ma ou te talitonu foi ua maea ona matou tautalagia lea vaega i se faamatalaga i le taimi ua sola, e atagia mai ai i ina le lagona, a o lenei taimi, faamalo faafetai atu foi i ni sui usufono o lenei Maota ua mafai foi ona faaalua o latou finagalo e tusa ai ma le Tulafono ua tau aliai mai. Amuia e faanoanoa aua e faamafanafanaina. O outou lagona ia e aumai, ua matua mafanafana ai lava le lagona. Ma ou te talitonu foi, tulou lava lau Afioga i le Fofoga Fetalai, se i faanoi atu lava i tuamaota se i faapasi atu le silasila a sui usufono i le ata lea manaia e tuu mai i i, o lo o tapuaia foi e lena foi...ua tatou filogia i totonu o le Maota nei ma le ata o le tatou Faaola. O le ata lea e le o se...na o se denomination e tasi, leai, e le faapea o le EFKS e ona le ata lea, po o le Metotisi, po o le Katoliko, po o le Mamona, leai, o le ata o le lalolagi atoa ma tatou uma. Tatou te faapelepele i ai, e galo ia tatou i tatou upu nei e fai, a o lea e faafogafoga mai, ioe, ia sau i lagona o le loto, ia tapuai mai, ae ou te talitonu i lenei aso, e le tele sau tala e uiga i le fesuaiga o le Tulafono i le Tofiaina o Le Ao o le Malo faapea foi le Fofoga Fetalai, e i ai lagona, ae ou te talitonu o lo o i ai le avanoa e faasao lo tatou taimi, o lo o i ai le avanoa i le faatalatalanoa pe a faasee i le Komiti, ona e taua tele ia te au le tofi lea o le Fofoga Fetalai, e faapea foi ia te au le tofi o Le Ao Mamalu o le tatou Malo.

Ae sei ou oo atu ia i lou itumalo, ina ua....ou te le manao e uma le taimi e le i uma lau lauga, leaga e te i ua galo nisi mea, ae o le itula lenei, o lea ua saunoa manino le Afioga i le Taitai o le Malo, o se itumalo e ese lona faaigoaina mai i le Faavae, pei ona matou tautala atu i le taimi ua sola, sa mafai ona faataga i lalo o le Faavae le itumalo lenei o Tagata Palota Taitoatasi. Sa faasolosolo mafaufauga po o a lava mafaufauga po o le a le uiga o lea igoa o le Palota Taitoatasi? E i ai lagona, ae o lea ua aumai manino e le Afioga i le Palemia e faale iloga lelei le suafa lea, Tagata Palota Taitoatasi, peiseai o se suafa e faaigoa ai se Faalapotopotoga, o se suafa o se Sosaiete. O i la, e moni, e matua moni ma faamaoni le saunoaga a le Afioga i le Palemia, o lagona foi na. O i la tatou te silasila i ai ma matou vaavaai i ai i le maualalo o le mea sa i ai tagata nei, ioe, o lea na ala ai ona faaigoa, o le a le igoa ua togi atu, fai ai loa, ae pau lava le mea ia maua so latou avanoa ia palota ai, o le latou faasinomaga lea, ioe, tatou te asiasi i ai i le saunoaga a le Afioga i le Palemia, e matua moni ma faamaoni, o i e tatou te fua i ai le tulaga sa sau ai lenei itumalo o le Palota Taitoatasi, ia ua oo mai i le taimi lenei, ua i ai foi lagona, e pei ona saunoa le Afioga i le Palemia e manaia le siitia o tulaga o sui usufono pe a omai, ia matuai faamaualuluga lava, ae ou te talitonu au, o lea lava e maualuga lava le faaeaea a le tatou atunuu. Ioe, taoto ia faamaene o tai loloto le paia o Samoa, ioe, i ou sa le popo, ma ou sa e le ave, ma ou paia le popo, ae ou te talitonu, ua matou lagona le faatauvaa, ioe, aisea? Ua mafai ona matou ofi mai i le Maota nei i lea auala mai i le Palota



Taitoatasi. Ia faafetai tele mo le avanoa taua lea, e le toe tele sau faamatalaga e tusa ai ma le tatou mataupu lenei, ona e pei ona ou fai atu, ua maea ona matou tautalagia lea vaega, ae faasao lo tatou taimi, o le mea e faafetai ai, o lo o i ai le avanoa lelei, ne i toe faafoisia atu i le Komiti ina ia mafai ona toe iloiloaina, e pei ona saunoa le Afioga i le Palemia, e mafai lava ona fetuutuunai, o lea e avanoa, e le i faapea ua tapunia, o le consultation, o le faatalatalanoa ae o lea ua ou vaai atu lava, ua manaia lava lo outou lagolago e aua le suia le itumalo, ioe, manaia, faafetai. E ese foi lo matou fiafia i lo matou foi....ua lava ai i i, ua fetui lava matou i lea, ioe, te i ua tuu atu i luga ma pauu mai ai i lalo ma faaletonu ai, ae ou te talitonu ua manaia lava le tulaga lea ua fetui lava ma matou, ioe, ae faafetai le faaeaea, faamalo i lau Afioga i le Taitai. Ou te faapea atu ai, e lagona lava le lē lagolagoina o lenei mataupu, ae a faapea e oo atu i le Komiti ae aumai i le tulaga lelei ma...ia o lea foi ua saunoa isi, matuai le fiafia ua oo atu lava i nisi o itumalo pei i le Vaimauga, Faleata Sisifo ma Faleata Sasae, ia ae ou te talitonu lava e leai se afaina, e oo foi lava i le Palota Taitoatasi, e leai lava ma se afaina o nei itumalo, e tiga lava ona salalau pei lava ona saunoa le Afioga i le Palemia, tu salalau le itumalo, ae ese le manaia, o lea lava e lagolago mai i le tatou Malo.

Ia ma le agaga faaaloalo lau Afioga i le Fofoga Fetalai, ou te faamalo atu i lau Afioga i le Fofoga Fetalai, faamalo atu i lau Afioga, malo le onosai, ou te talitonu lava e le faigofie lau pitolaau, sa ou faapea ua ou popole i te i ua tuu mai lau fesili, ia aua e tutasi lava lou siufofoga iinei, ae ui i lea, o lea ua toe o nai toe minute ia o lenei taeao ua ou tautala atu ai ma le faaaloalo ma le migao e tulai atu ai e faailoa atu se lagona vaivai i le sui usufono o lo matou itumalo. Lo matou itumalo, ia tapuai mai, e tau vaivai foi le lagona o lo outou le vili mai po o le a le mea o i ai la outou...ae o le toatele lava o outou na e vili mai, a o nisi, e pei o se itumalo na o le toaluaselau, toetiiti faaape lo tatou itumalo, ioe, toe lava o nai selau pe tolu, oo i le faafe, ma e talitonu o le isi faiga palota lea, masalo pe oo atu i le valuafe ia le aofaiga o tatou. Ia o le lagona lea ma le faaaloalo, e faamalulu atu, a i ai se upu ua le tau tamalii ia faamolemole faatea i nuu le aina, ae manuia lenei aso ma le tatou Fonotaga, faamalo faafetai i le tatou Fono.

**FOFOGA FETALAI:** Malo faafetai saunoa.

**Afioga Hon Palusalua Faapo II:** Lau Afioga i le Fofoga Fetalai o se mea e fia faasao.

**FOFOGA FETALAI:** Ia o le a se mea e toe fia faasao ai i le sagisagi a si toeaina?

**Afioga Hon Palusalua Faapo II:** Ioe, lau Afioga i le Fofoga Fetalai, o le mea ua tuufesili ai aemaise lenei itu, o lou faafetai i le Malo, e te faafetai o latou ia o le a aveesea lou nofoa? Fai sao saunoaga ia. O le a faafetai i le Palemia o le Palemia e aveesea lou Nofoa? Ia o le tulaga lena ua ou toe tulai aemaise o le matou itu nei, o lea e avatu le lagolago ia oe, sa ou faapea e te faafetai mai ia au.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai o le mea e fia faasao, o le mea o

lau taitaiga Palu i lou faaoloataua ma faatupu vevesi, fai sau mea aoga, e iloa o oe sa e Taitai i le Itu Agai, ou te vaai atu e uma lava lau Paeaiga, na o le pau lava lea o le mea e te matele i ai, na o le tupu o le faaita i le va o uso, ma e manao e faavevesi le Palemene. E uma atu le Palemene lea ae e tulai mai a tatou Faamaumauga o le taua ia o le mea lea na fai e Palu, o lea o le a uma atu lava lenei Paeaiga, na o le pau lava lea o le mea o e faia, na o lou faaoloataua, faaoloataua.

**FOFOGA FETALAI:** Ia e manatu ua...ia se tasi o sui usufono mo Palota Taitoatasi, Afioga Maualaivao Pat Ah Him, e i ai se isi mea?

**Afioga Maualaivao Pat Ah Him:** Leai faafetai i lau Afioga i le Fofoga Fetalai mo le avanoa, pau lava o lea, o lea sa ou faafetai atu i lo outou faamafanafana mai ma le lagolago mai, masalo sa le maua mai e lau Afioga le Taitai o le Itu Agai, le lagona ma se manatu na avatu, faafetai lava.

**FOFOGA FETALAI:** Ia e manatu o lea ua tatou taunuu i le tatou taimi malolo o le aoauli. Aua e te popole tele i saunoaga a le Taitai o le Itu Agai, o saunoaga lava ia e faamalosiua tele ai oe. A o Tualumaga, o lea o le a tatou malolo i le tatou malologa masani i le itula e 1:00, ia o lo o taatia pea le tatou lafo i le itula e 3:00 tatou toe amata, onosai mai le tatou Palemene ia ona faaauau ai lea o le tatou galuega i lenei afiafi.

O lo o ua saunia e le Ofisa o le Fono le tatou taumafataga masani o le aoauli, o lea ua tapena le tatou lunch i i le tatou tulimanu masani, ia ona fai ai lea o se malologa tatou toe tauaofia mai lea i le tatou amataina o le tatou Fono i le itula e 3:00.

Ou te faasilasila atu o le a faataatia ese Tualumaga a le Fono Aoao Faitulafono mo lana malologa masani o le aoauli.

*Na faataatia ese Tualumaga a le Fono Aoao i le itula e 1:00 i le aoauli.*

*Na toe faaauau Tualumaga i le itula e 3:00 i le aoauli.*

## **TULAFONO TAU FAAOFI O TEUTEUGA O LE FAAVAE (NU.2) 2014 – felafolafoaiga i luga o le faitauga faalua**

*Na toe faaauau felafolafoaiga.*

**FOFOGA FETALAI:** Ou te faasilasila atu ua toe amataina nei Tualumaga a le Fono Aoao Faitulafono.

E i ai le faamoemoe o lea ua tatou taunuu mai i le amataga o le vaega lona lua o le tatou Fonotaga i lenei aso. E momoli atu ai le agaga faafetai ma le faamalo i le paia ma le mamalu maualuga o le tatou Maota. Malo le onosai, malo foi le lagapapale, faafetai foi mo le tatou Fonotaga i le taeao analeila. E talitonu foi ua maua la outou faamalositino e ala i le tatou taligasua e faaauau ai le tatou galuega i lenei aso. E faapena foi ona momoli atu le faafetai i le tapuaiga ma le au faafogafoga o lo o tapuai mai i maota ma laoa o le tatou

atunuu i le faafofogaaga a Samoa i ona tulaga faalupe, faafetai Samoa le tatalo, faafetai le tapuaia o le Fono a lou Palemene i lenei vaega o le taeao na liugalua.

E faia le tatou malologa o faasolo ina agai pea saunoaga a sui usufono mamalu e uiga i le Tulafono Tau Faaofi. Ae tatalo atu pea ma le agaga faaaloalo i le paia ma le mamalu o sui usufono e le i saunoa po ua leai foi se isi e toe fia saunoa, ia tau tata mai i le moa o le ala a tatou saunoaga. E talitonu lava o lo o i ai le lagona ua malamalama mea uma mai folasaga ma saunoaga a nisi o sui usufono mamalu na saunoa i le taeao analeila, a o lo o lafo atu pea lagona e faaleo ai tulaga i le tulaga aloaia ma la outou aiatatau e mafai ai ona faaleoina o outou finagalo. Ae ona o le tulaga i le taatia i lagatonu o le sagatonu o a tatou faiga Faavae faa-Palemene, e tatalo atu ai pea le Fofoga Fetalai ina ia tatou au pea i le autafeloa ina ia see le tatou galuega e pei ona faatulagaina. Ae ua avanoa le tatou Maota mo se isi e fia saunoa.

Ia, ua maitau atu e le o toatele nisi, ma o le sui usufono mulimuli lea. Tulai mai se tasi o sui usufono mo Falealili, Tofa Tusa Misi Tupuola. O lea sa ou faitau e leai lava se isi e fia faailoa mai. O le avanoa mulimuli lea mo se isi e fia saunoa. Tulai mai se tasi o sui usufono mo Falealili, Tofa Tusa Misi Tupuola.

**Tofa TUSA MISI TUPUOLA (Falealili):** Lau Afioga i le Fofoga Fetalai ou te momoli atu le faafetai tele ona o le avanoa ua maua e lenei itumalo o Falealili. O lea foi ua maua se faamalositino a le tatou Palemene i le taimi ua tuana'i, faafetai tele i lau Afioga ma le Ofisa. Faafetai i lau Afioga i le Failautusi o le Fono ma lou Ofisa i le tapenaga foi o le taumafataga manaia o le aoauli ua lagolagosua ai fuafuaga faaii o lenei aso.

Ae ua ou tulai atu ma le agaga faaaloalo e fia faali atu se manatu o lenei itumalo e tusa ma le tatou Tulafono Tau Faaofi o Teuteuga o le Faavae (Nu.2) 2014. Lau Afioga, ou te momoli muamua le faafetai i lau Afioga i le Palemia ona o le faamalamalama auiliili o le tatou Tulafono Toe Teuteu. Ua manino ma malamalama foi lau faalogo ma le vaai foi ma le silasila a lenei itumalo i le tulaga o le tatou teuteuga o le Faavae e pei ona taoto mai. O le mea taua i lenei sui usufono, e le o se suiga o le Faavae, ae o le Teuteuina o le tatou Faavae. O lona uiga i se manatu vaivai, o lo o tumau pea le tulaga o i ai le tatou Faavae mai le amataga, ae na o nai mea laiti lava o lo o taumafai e toe teuteu ina ia faaleleia atili le tulaga o le tatou Faavae e pei ona faavae ai lo tatou Malo. E leai lava se pogisa i lau vaai i le tulaga o Itu e lua, o le Itu a le Malo ma le Itu Faaupufai a le Itu Agai. I lou lava talitonuga, se o tatou lava e au i le fagota e au i le tauola. E leai foi se isi e tu faamauga i ni ona tofi ma tulaga ma Vaega Faaupufai. E le iloa foi pe oo atu i le isi Paeaiga o muamua ua tulai mai le Itu Agai i lenei foi Itu. O lou la lea talitonuga, e leai lava se mea tatou te popole ai pe tatou te atuatuvaile ai i le tulaga o le tatou Faavae. Ou te faafetai i le Afioga i le Loia Sili a le tatou Malo, le Afioga ia Tuatagaloa, faafetai tele i lau Afioga ona o oe o le Falealili, e fai lava foi e Falealili mea silisili aua le atunuu ma ona Tulafono. Ae malo faafetai le galue, faafetai lou silasila totoa, faafetai fautua i le tulaga o le faafoeina o tatou Tulafono aemaise foi lenei Tulafono Tau Faaofi o Teuteuga o le Faavae o le atunuu, ina ia aua ne i i ai se mea e aafia ai taeao. Aua so o se mea lelei tatou te faia i le aso, o manuia na mo a taeao. O lona uiga i lou manatu lau Afioga ma le mamalu o le Fonotaga a le Palemene, e lagolago e le itumalo

lenei Teuteuga. O lea lava e i ai le talitonuga, e i ai foi le avanoa e toe teuteu ai i se isi taimi. O a foi ni mea o tulai mai i na taimi ua le fetau ma le tatou Faavae, e faapena foi ona toe silasila ma toe vaavaai i le tulaga e toe teuteu ai le tatou Tulafono.

Na pau lava le mea lau Afioga i le tulaga o le tofiaina O Le Ao o le tatou Malo, e moni lava le tele o nisi sui usufono, sa i ai foi si ota manatu faa-sui usufono, maumau e pe ana tofia Le Ao o le tatou Malo i se faiga e tofi faaleaganuu, e fai i lauga a le Maota lenei, e tofia ai Le Ao o le tatou Malo, a o lea lava ua aumai le Teuteuga, e pei lava ona fai atu matou te lagolago, a o le tulaga lena lau Afioga.

O se manatu lena lau Afioga e tuuina atu e avatu ai foi le lagolago a lenei itumalo o Falealili, e leai lava se galuega e mama uma ni ona itu, e i ai foi le galuega e eleelea isi ona itu, ae tasi lava le taua, o le lelei ma taua mo le lumanai manuia o alo ma fanau a le atunuu, aua se manuia mo taeao o le tatou atunuu.

Lau Afioga, o nai motugaafa na o lenei itumalo e faaali atu ai le agaga faafetai. Faafetai i lau Afioga i le Palemia ma le Kapeneta ma tulaga uma o lenei Tulafono Tau Faaofi, o le taua lava ina ia ola manuia, ola fiafia tagatanuu uma o si o tatou atunuu. Ia manuia tele le tatou Fono.

**Tofa Lealailepule Rimoni Aiafi:** Lau Afioga e vave lava...

**FOFOGA FETALAI:** Sole, ua pei lava oulua o le oleolega o teineiti e tau faatutu mai. Na ou fai atu foi ae fai mai e leai se isi e fia lauga. O ai e te lua faatafai i ai ma Toeolesulusulu? Ae ui o lea, tulai mai. E ava tele atu Lealailepule leaga o oe o le Fofogaoalii, ae ia alofagia e maitaulia sekone uma o le tatou Fono. Na ou fai atu foi e tulai mai po o ai tagata e fia lauga. Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai lava i lau Afioga mo le faaaloalo. E puupuu lava se manatu, faafetai le faaaloalo. Fai mai le fesili a Iesu ia Peteru faatolu, “Peteru e te alofa ia te au?” Ae faafetai Speaker, o lea ou te iloa e te alofa.

**FOFOGA FETALAI:** E te alofa i le Fofoga Fetalai?

**Tofa LEALAILEPULE RIMONI AIAFI:** Ou te alofa ae sili ai lou alofa ia Iesu lena e i ou tua.

Faafetai lau Afioga. O le suiga ua aumai e le Faavae lau Afioga ma le faaaloalo lava, le suiga o le Ombudsman po o le a foi le igoa o le mea, e talia ma le atoatoa e lenei sui usufono.

Na pau le mea e fia ave i ai se manatu puupuu lava i le suiga lava lea o le Faavae e faatatau i Sui ia i totonu o le Taulaga, Vaimauga ma Faleata. E moni ua maea le Tulafono, ae manatua foi lau Afioga, ou te le toe oo i le tulaga lea ona o le taua o le Faavae ua aumai. I lou lava talitonuga ma lau tilotilo, o lea ua aumai isi itumalo fou e lua tuu i luga o itumalo o lea ua i ai itumalo faaleaganuu mai le amataga o Faleata ma Vaimauga. O lea la pei o se mea ua aumai impost ai i luga o le mea, already lea ua exist o lea ua leva ona mamalu ma i ai. O le uiga o lau faamatalaga, o le a le matagofie o le a toe tuu mai ai nei itumalo i totonu lava o itumalo faavae ua leva ona i ai? Aua a tatou fuafua

faale-mafaufau i ai o tatou uma lava o sui usufono, a alu atu nei faapea mai le suiga, o le a toe fai se isi itumalo fou i totonu o Faasaleleaga, po o totonu o Safata. O le a se faalogona a ia itumalo? E moni o fanua umia saoloto, a o fanua o lo o i totonu ma lalo o le pule faamalumu a itumalo nei.

O le vaega lava lea na aumai e le Komisi Suesue, o le a aveeseina le pule i le tofiaina o sui usufono o itumalo nei i le mea o lo o i ai nei. Lau Afioga, a faatino le suiga lea, o lena ua fai ai i ina, ua aveese le pule lena. Aua foi i le taimi nei, po o fea lava e te nofo ai po o fea le afioaga e te afio mai ai, ae a oo mai loa i afioaga nei, e te sau gagau ai lau aupolapola o lea ua e i totonu o Faleata ma le Vaimauga. O lea la ua e i totonu o alii ma faipule ma e o lo o suafa matai ma nonofo i totonu o Itumalo nei, le pule. Ae afai nei la e fai le fuafuaga lea, o lona uiga ua saofaga mai i totonu so o se matai i totonu o Samoa. So o se matai tausinu lava ma matai tautua, e te faalogo atu lava ia te oe e le sao. Aua foi e le mafai ona ou alu atu ma lou matai Faleata ou alu ai i Safata po o Savaii. Ou te iloa lava e au e le talafeagai, leaga o Samoa ua uma ona tofitofi faapena. Ma o le faiga foi lea pei ua tatou fai ua vavae ese nai tagata nei, le mamalu o le atunuu o afifio mai i nei. O le mea a tatou e fai, opogi mai i totonu e fai ma nuu, tuufaatasi ma afioaga nei. Aua e le faapea a e sau e nofo i Vaitele po o Vaialele ona sui ai lea o le igoa o lou nuu. E te taunuu mai lava, e le mafai ona suia le igoa, leaga o nuu faavae mai le amataga e oo i le gataaga.

O le isi mea lea e avatu ai le fautuaga i le mea na tuuina mai e le Komiti, e le mafai e matai Faleata ma Vaimauga e nonofo i fanua tau le aganuu ona o e tauva i Nofoa nei. Lau Afioga, o se mea le talafeagai tele. O le a faapefea ona sau le isi matai mai le isi itu o Samoa tauva i totonu o elele nei o lea o lo o nonofo tagata o lo o matai ma tautua i totonu o itumalo nei? Afai ua tatala le avanoa, ave le faamuamua ia i latou o lo o suafa matai i totonu o afioaga nei. Ma o le mea lava e tatau ona fai ma le amiotonu lau Afioga, ua lava na o tagata e matai i totonu o le lio lea ua taamilo nei, ua lava latou e o i le tofi lenei ona mamalu lea ma paia ma amiotonu le suiga lea ua i ai nei. A o le fai faapea ma aumai ma nisi tagata mai isi itumalo....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai o le mea e fia faasao.

**FOFOGA FETALAI:** Malie le sui usufono se i tuu atu le avanoa i le mea fia faasao a le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le Teuteuga lea e i ai, e tuu atu ai le avanoa mo le faataitaiga; a faapea o Lealaipule e matai i Faleata ae i ai foi sona matai o Fiaai i Lepa, e mafai lava ona alu i lona suafa Fiaai i Lepa i i. Ae mataga tele pe afai o Lealailepule ae oso oso i totonu i i. O lona uiga o le mea ua aliali mai ua e fefe ia Ale? O le mea moni lava lena, o lona uiga ua e fefe ia Ale o le a e oso ai i o, a o oe e tatau lava ona e nofo e faataua leaga o oe o le Faleata Sisifo. A e sola ese loa, o lona uiga e aliali mai ua e le fialia i i e toe fia tau oe o se matai. O le a faapefea ona tiai lou nuu o lea e te nofo ai i i. Afai foi e i ai sou elelele umia tutoatasi na o le 10 iata le mamao mai i i i elelele faaleaganuu, o le matua tumu i lou le alofa. O lona uiga e te le fialia e apoapo tu ma aganuu a lou nuu lea na mafua ai ona e matai. O lea la e manaia lava le faatofalaiga,

afai e tolu pe fa ni ou matai, ua talafeagai ai la le aumai o le Fiaai lea e te oso ai i i. A o le tasi o lou matai na o Lealaipule lava ae o lea o le a e faitio ona ua le mafai ona e alu i i, lona uiga e aliali mai ai i ina, ua e le toe fia Faleata. O le faasaoga lona lau Afioga. O le manaia ia o le... e tuu atu lava le choice o la e i ai le avanoa e pule ai oe. Ae afai loa o oe o le tagata e suafa i i, e le tatau la ona e oso mai i i e oso i le 10 iata o la e i ai lou fanua ae tiai lou nuu o lea sa e matai ai. O tu ma aga faaleaganuu, a o lea o le a e alu i le mea e i ai fanua o papalagi. I le faapuupuuga la, ua e fia papalagi, ae le o oe o se papalagi. O le tali atu lona.

**FOFOGA FETALAI:** Ia, tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Ia, e uma lava le faauilavea a le Afioga i le Palemia, ou te le o malamalama lau Afioga. Ia manatua foi, o fanua nei ou te nofo ai i Vaitele, o le fanua tau Vaitele. A ou alu foi la ou te nofo i lou fanua palagi, o le fanua tau Vaitele lava. E le mafai ona aveesea ai mamalu ma le mea lea ou te talanoa atu ai.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o lea o le a toe finau mai i le mea ua uma ona talanoaina. Ua uma ona talanoaina ma pasia le Tulafono Tau Faaofi. Sa ou faapea lava au ia o se isi mataupu, ae na ala ona ou tali atu, foi lea ne i te i ua ou le tali atu ona faapea lea o tagata o la e sao le mea lea e te fai mai ai. A o le mea lea lau Afioga, ua uma ona talanoa le Tulafono Tau Faaofi, ua uma foi ona tatou pasia. Na pau lava le mea lea e talanoa i i, o le ioega i totonu o le Faavae, na pau lava lea. E le o toe talanoaina auiliili aiaiga o le Tulafono ua uma ona tatou pasia.

**Afioga Hon Palusalua Faapo II:** Lau Afioga i le Fofoga Fetalai o se mea e fia faamalalama.

**FOFOGA FETALAI:** Tulai mai le Taitai o le Itu Agai.

**Afioga Hon Palusalua Faapo II:** Faafetai lava i lau Afioga ae ua ou tulai atu ma le agaga faaloalo. O le mea lea e leaga ai le aumai muamua o le Tulafono Tau Faaofi ae aumai mulimuli le mea taua. O le a le mea taua? O le suiga o le Faavae, aua tatou te fiu lava e kami solo o le Teuteuga o le Faavae ona ua aumai muamua le Tulafono Tau Faaofi, lea la e taumafai ai le itu le la ma faapea aua ne i toe taua ona o le sese o outou mea na aumai i le Maota, e faamuamua mai le Tulafono Tau Faaofi ae sa tatau ona faamuamua mai le Teueuga o le Faavae. E le mafai la ona matou le oo i ai leaga o le Teuteuga o le Faavae e aafia i le Tulafono Tau Faaofi.

**FOFOGA FETALAI:** O lea ua ou malamalama ma sa ou manatu sa i ai le faamalumaluga a le Malo i le taimi ua sola. Sa i ai foi le tulaga ona sa paia e le Afioga i le Palemia, ae faamalulu atu ona o le tulaga lea i le faatulagaga o galuega o lo o faatinoina Tulafono, ae ui o lea ua taatia i le agatonu le mataupu. E faapena lava le faagasologa o a tatou galuega, o nisi taimi ua

faapena ona le ogatasi o le futia ma le umele a o lea ua taatia tonu ae leai foi se mea e afaina tele ai o le Tulafono Tau Faaofi lava e tasi.

Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai ou te talitonu o lena ua outou faafofoga mai ma ua maua atoa le ata o le mea lea ou te taumafai atu ai. O lena ua outou mafaufau e faapea, e sao lelei manatu ia ua aumai o le a toe fesoasoani i le toe fefulisaiga o le – aua e leai se mea i lalo o le la o le fai o se itumalo i totonu o le mea o la ua e i ai ae faasa na o i ai tagata o lo o nonofo i totonu o le itumalo, o tu ma aga na faa-Samoa e le mafai ona suia. E le mafai ona sau le isi tagata i le mea o lo o i ai le mamalu o isi tagata o lo o i Faleata ma Vaimauga, pau lava lena o le mea lea e avatu ia tagai ma toe fetuunai i ai aua o lea ua i le Komiti ina ia mafai ona maua ai ni o latou mafaufauga i le taimi e soalaupule ai. O le Faavae o le mea taua, o lea ua ou faitau i ai e 174 i latou sa i ai i le amataga o le tusiaina o le Faavae e taitoafia mai i itumalo. Sa i ai foi Fiaai Auelua Fatialofa mai Lepa ma matai maualuluga o Samoa sa tusia lenei Faavae. O le ala lea o le taumafai atu o se manatu.

Ona ou oo mai ai lea i le...

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o le upu lava lea e le fetai i le Tulafono i totonu i Faleata ae faasa ai ma Faleata. Lau Afioga i le Fofoga Fetalai, o le mea tonu lava lena sa tatou i ai i le Nofoa ia o le Au Palota Taitoatasi. E le mafai ona e alu i ai pe afai e te le agavaa, e sa, e matua sa lava. O le faiga lea ua faatulaga ai le itumalo fou e aofia ai eleele tumaoti, e le o aafia ai lava eleele tau i fanua faale-aganuu. O lona uiga o le tele ia o le Teuteuga lea ua i ai nei, o lea la ua le faasa, o lea ua faataga. O le mea lea na ou tulai atu ai e faasao le sasi lea o le fai mai e faasa tagata Faleata ona o ai i totonu i i. E leai o lea faatoa faataga nei lava i le Tulafono Tau Faaofi lea pe a pasia nei le Faavae. Ua tele la le avanoa lea ua tatala mo e o lo o alaala i luga o eleele umia saoloto.

**Tofa LEALAILEPULE RIMONI AIAFI:** Faafetai, aua foi lau Afioga e fesili taeao i le taimi nei, leaga o suiga nei o lea e tutupu i o tatou taimi. Po o le a se manatu o le sui usufono sa fai ae po o fea sa tu ai i le taimi na talanoaina ai leaga o lea e aafia ai le itumalo lea ou te i ai i le taimi nei. O le ala o le avatu o se manatu ina ia fetuutuunai le tofa ma le faautaga i le taimi e faamanino ai ma faamautu ai lenei Tulafono Tau Faaofi. O le saunoaga a le Afioga i le Palemia ai ua ou palaai, talofa e, talofa i le Afioga i le Palemia ua atili ai ona ou le palaai ina ua saunoa mai faapea.

Ona ou oo mai ai lea i le suiga o le...

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga, o le upu lea ua atili ai ona e le palaai. O le mea moni lava o lea ua e nofo oe ma tau mai lou le palaai. Ua matua e palaai lava, a o le tulaga lea e te saunoa mai i suiga ia e te manao i ai, o le mea moni lava lea e te agai i ai o lou fasiotia o le Au Palota Taitoatasi, o le mea tonu lava lena e te agai i ai. E nana lava le tetea ae aliali lava.

**Tofa LEALAILPULE RIMONI AIAFI:** O le a ou alu ese ma lea tulaga lau Afioga, e ala ona avatu se manatu leaga o Faleata ma Vaimauga o lo o aafia tonu i le tatou Faavae. O le mea ua tatau ona fai, e pei ona ou fai atu faafetai i nai nei foi sui usufono e pei ona tulai mai le Afioga Papalii ma le Afioga Maualaivao, manaia le mea na e te lua matai mai ai e te lua o e tauva mai ai, o ai e taofia ouluga ma le tele o le pisa ae tuu mai Nofoa o le taulaga ia Faleata ma Vaimauga e agai i ai na o matai o Faleata ma Vaimauga.

Ona ou oo mai ai lea i le filifiliga o le Ao o le Malo ma le Fofoga Fetalai, lau Afioga i le Fofoga Fetalai, e 99% o le sui usufono lava e faatu mai e le itu toatele o le mea lava lena tatou te alu ai ma fulisia i ai. Ona pau lava le mea lea e faatagisia atu e lenei itu o le process matou te fia auai faatasi i le taimi e filifili ai ona mamalu lea ma mapue le tulaga i ai. Ae manatua foi le mea lea e sisi ai nei le tou fua o le accountability ma le transparency, ia vaai mai fafo i Faigamalo lelei. O le tasi lea vaega, tatou te iloa lava le mea e tupu i tausaga uma ma tausaga uma, o le Malo lava e omai o le Malo foi lena e malo le Fofoga Fetalai ma tulaga uma. O le a le mea o le a faese ai le Itu Agai, manatua foi faalupega o le Ao o le Malo, Tama o le Atunuu, a o le faalupega o lau Afioga o le Tama o le Palemene. O le Tama o tatou uma, Tama o le Atunuu atoa e filifili ma fai sao uma i ai tatou ona matagofie lea.

Lau Afioga honourable Speaker, o le tuualalo lena o lenei sui usufono i tulaga aloaia ma tulaga mamalu o i ai, ia tatou patilima faatasi i tofiga nei ona matagofie lava lea ma agai lelei le tulaga o le tatou Faigamalo.

Ia manuia tele le tatou Fono i lenei aso.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, e tatau lava ona ou faasaoina le saunoaga faaiua le sui usufono i lona saafiafiaga ina ia tatou patilima faatasi i le tofiga o le Ao o le Malo. O le mea moni lava o le Tulafono lena, ia tatou patilima faatasi i le tofiga o le Ao o le Malo, e le faapea na o matou e patipati ae le patipati outou, tatou te tau fai patipati uma lava i le tofiga. O lea ou te mulimuli atu i le saunoaga faaiua le sui usufono, e le faapea na o matou e faia le tofiga, leai e fai faatasi lava e tatou uma i totonu o lenei Palemene.

**FOFOGA FETALAI:** Malo faafetai saunoa. O le a tuu atu muamua le avanoa i le sui usufono mo Aana Alofi Nu. 3 ona lafo ai lea i lea itu o le Maota ma oo atu ai i se tasi o sui usufono mo Salega, Afioga Afualo Wood Uti Salele a o le i faaiua mai e le Taitai o le Itu Agai.

**Afioga TOEOLESULUSULU CEDRIC POSE SALESA SCHUSTER (Aana Alofi Nu. 3):** Faafetai i lau Afioga i le Fofoga Fetalai, ou te talitonu foi ua tele ina faaalua e nisi o sui usufono le tele o lagona ma ni motugaafa o lenei itu. Ona pau lava nai vaega e lua ou te fia faamamafaina lau Afioga i le Fofoga Fetalai, e tusa ai o le iloiloaina o le tatou Faavae i le tofiaina o le Ao o le Malo. O le tuualalo lau Afioga i le Fofoga Fetalai, ona e maitauina foi le faatauaina e lou nei sui usufono le vaega lea o le Congress Vote. O le tele o Palemene i atunuu i fafo le taua o le vaitaimi e ao ai ona tuu ese le Vaega Faaupufai ae palota i le lagona ma le vaega e mafai ona tutoatasi ai le manatu o le tagata. Ou te amanaia le finagalo o le Afioga i le Palemia aemaise o le Tulafono Tau Faaofi ua tuuina mai ina ia tasi le vaega o i latou e malosi, o i latou ia o le a aumaia le sui usufono, ae lagona i se agaga vaivai le tuuina atu



ina ia mafai ona toe Iloilo ona o le Ao o le Malo i lou lea iloa e pei ona faaalua e le tele o sui usufono, o le Ao o le tatou Malo e ao ona velo aso uma i ai. O se lagona foi lea e ao lava ina faaleo e taua ia te au le i ai pea i totonu o le independent po o le palotaina e sui usufono taitoatasi o lē o le a avea ma Ao o le Malo.

E le gata foi i lea lau Afioga e pei ona tuuina mai i le Tulafono Tau Faaofi, o le Vaega e toatele i totonu o le Palemene. O le tele o vaega o le tatou Faavae e manaomia le 2/3. Ou te talitonu o le vaitaimi lenei o lo o mafai ona ausia e le Vaega Faaupufai e Puipuia Aiatatau a Tagata lea vaega, peitai ane o le lumanai po o ai lava se Vaega o le a tulai mai po o le 26 po o le 25 i latou o le a i ai i se Vaega Faaupufai e taitaia le Malo, ou te talitonu o le a limataitaiina i le fuafuaga o le a tuuina mai. Ona e pei ua le manaia i le vaai le afa po o le sili laitiiti atu ma le afa o le Palemene latou te lagolagoina sē o le a avea ma Ao o le Malo, ae ao pea ona maua le avanoa e felafolafoai ai ma maua ai le tasi e le toatele o le atunuu ma fili tagaga ma faaali manatu o sui o afioaga taitasi. E le faapea foi o le filifiliga o matai po o le taitoalua i aiga taitasi a o lenei avanoa ua vaai atu o le a aveeseina mai le faatinoina o le tatou aganuu, e i ai le agaga faanoanoa e avatu ai le tuualalo ina ia mafai ona toe liuliu le tofa, ou te talitonu e maua lava le avanoa e mafai ona faaalua.

E pei ona maua i nisi o saunoaga i le taimi ua fano, ua faaalua nei ona filifilia le Ao o le Malo talu mai ona tuumalo le Susuga i le Tapaau Faasisina, peitai ane e le i ai lava ni popolega o lo o atugalua ai le Afioga i le Palemia i le ono fai i ai o le 47, 48 po o le 41 foi, e eseese mai ni sui usufono e faaalua a o le avanoa e mafai ona faaalua ai e le gata o sui usufono taitasi ae ao foi ona fesiligia le itumalo ma aumai foi le latou tuualalo i sui e mafai ona faaleo e sui usufono. Ona pau lea o se vaega e fesoasoani atu ai.

E faapea foi le tofiaina o le Fofoga Fetalai, ou te talitonu lava e taua le faaoo mai pea i totonu i nei tatou te felafolafoai ai ma faatu po o ai lava po o le Itu Agai, e ao lava ona faaleo so latou sui usufono i le filifiliga. O le atugaluga foi faapea e umi ai le taimi o le lima tausaga ou te talitonu pau lea o le taimi e talanoaina ai i totonu o le Maota le filifilia o le Ao o le Malo pe na o le tasi le aso ae a tele na o le afa aso po o le Fofoga Fetalai, ae 5 tausaga le term e fuafua i le faatalanoaina i nisi foi o Tulafono aemaise o le Tala o le Tupe lea e vaiaso o faatalanoa. O vaega taua uma nei o a tatou galuega faa-Palemene, o lea e tuuina atu ai le tuualalo mo le iloiloaina o nei vaega o le Faavae ina ia mafai ona toe liuliu i ai le tofa a le Komiti aemaise i latou o le a mafai ona autovaa atu e faaali o latou manatu. O lou lea talitonuga e ao pea ona i ai le avanoa e talanoaina ai ma faaalua ai finagalo o sui usufono o afioaga taitasi. Faafetai.

**FOFOGA FETALAI:** Malo faafetai saunoa i le sui usufono mamalu.

O le a lafo atu i lea itu o le Maota, tulai mai le sui usufono mo Sagaga le Usoga.

**Afioga MUAGUTUTAGATA FAAMAUSILI AUMATAGI PETER AH HIM (Sagaga le Usoga):** Faafetai i lau Afioga i le Fofoga Fetalai mo lou avanoa. E puupuu lava le sao o Sagaga le Usoga e tusa ai ma le mataupu ua opea i lenei Maota.

Lau Afioga i le Fofoga Fetalai e momoli atu foi le faafetai o lea lava e maua le avanoa e faaali ai manatu o le sui usufono e tusa ai o mataupu ogaoga

faapenei. E maitau mai foi itumalo ua leai ni leo ona fai lea ma lape i se auaunaga.

Lau Afioga i le Fofoga Fetalai, sa ou alu ma au Pepa ia i le fale sa faitau lava ma ou malamalama lelei i ai i le tulaga o le Tulafono Tau Faaofi. Ou te lagolagoina le tulaga o lo o i ai i le taimi nei, ou te manatu e faalua ona ou saina i le Pepa ma tuuina mai i le Maota. Ona pau lava le eseesea lea ou te vaai atu i ai, o le mea lea e i ai nei a aumai lava le pepa ua uma ona.....o lea lava e mautinoa e malo lava le itu o lo o tauaveina le Malo, ona aumai lea i inei. E fai lava le palota, a tutu ae lava la lenei Itu e manumalo ma e mautinoa lava e manumalo. E manaia foi aua ou te vaai atu i le la Itu i le taimi ua sola e leai lava ma se isi e nofo i lalo, ae tutu uma lava. A i ai foi le tagata e tetee e nofo lava ia i lalo ma o lana ia lenei aiatatau, ae fai lava le finagalo o le Vaega Faaupufai o lo o tulai mai i le Malo i lea taimi.

Ua faalua nei ona ou aafia i tofiga nei ma ou te lagolagoina lava le tulaga o lo o i ai i le taimi lenei. O le mea lea e leai ai sou manatu aua o lona uiga ou te le lagolagoina le mea ua aumai nei aua e malo lava le sui e avatu e le Itu lenei i le taimi lenei.

Ona ou oo mai lea lau Afioga i le Fofoga Fetalai i le suiga o le Faavae i le Palota Taitoatasi. O lenei e silafia uma le tulaga o lo o i ai o matou tagata. Ou te le lagolagoina ona e le mafai ona ou palota ese a o Maualaivao o lou uso. E ese foi lenei Paeaiga, e le faia ni faiga-aiga i inei aua o lea foi ou te iloa o lea e i ai i totonu o le Faavae le vaega lea aua e mate malie lava, e uma malie lava Nofo ia. E pei o le mafuaaga lenei o lea ou te tautala atu ai au i lenei itula, a o le tulaga ua aumai e le Ombudsman e lagolagoina e lou sui usufono tulaga uma ua faaoo mai.

O nai manatu na lau Afioga i le Fofoga Fetalai e fia tuuina atu e faamauina ai se lagona o le itumalo i le tuuina mai o nei suiga. Ia manuia tele lau Afioga i le Fofoga Fetalai, le Palemia ma le Kapeneta ma sui mamalu uma o lenei Maota.

**FOFOGA FETALAI:** Malo faafetai saunoa. Tulai mai se tasi o sui usufono mo Salega, Afioga Afualo Wood Uti Salele.

**Afioga AFUALO WOOD UTI SALELE (Salega):** E faafetai atu i lau Afioga i le Fofoga Fetalai mo le avanoa taua. E faafetai foi i le Palemia ma le Kapeneta ma le mamalu o le la Itu i Minisita Lagolago ae faapea foi le Taitai ma lenei Itu, aemaise le paia i le tapuaiga a Ofisa Sili o Pulega ma i latou e lagolago i ai, aemaise o lau tapuaiga Samoa a o lo o usufono pea lau Palemene e tusa ai o lo matou valaauina.

O lenei itula ou te tulai atu ona e puupuu lava se sao o Salega ona e taua lenei mataupu. O lea ua malamalama saunoaga a le Palemia e tusa ai o le Teuteuga o le Faavae. Mai lava ina ua ou taulimaina le Tulafono Tau Faaofi lenei, sa mafaufau totoa ma faitau i vaega uma ma mafaufau i le Alii i lona Mana e limataitaiina ai se upu e tataua ona fai ina ia mautinoa e moni le agaga e lagolago pe le lagolagoina ai foi lenei Teuteuga. O lo o faafogafoga mai lou itumalo, ae e le gata i lea o le lautele o le atunuu.

I le taotoga lava ia i le Toe Teuteuina o le Tulafono Tau Faaofi, e tusa ai ma le filifiliina o Le Ao o le Malo, ou te faafetai atu i lau Afioga i le Palemia ona e moni lava ua siisii le tai ia tatou faamatalaga i lenei taeao, a o lenei foi ua amata atu le afiafi, ae sala ina sii le gagana. E sala foi ina felafaoi o tatou

manatu ona e taua ona o le Faavae. E moni lava o se vaega na o le Toe Teuteu, a o le Faavae lava ia i le taotoga mai na faataoto mai e o tatou tuua. Ou te talitonu o lo o silafia e le Palemia ma le Kapeneta e le i faigofie lona tapenaina. Afai foi la ua liuilu le tofa ma le faautautaga i lenei vaitau ina ia Toe Teuteu nai vaega ia ina ia talafeagai ma le suiga lea ua i ai e tusa ai o faiga faaupufai, ae ou te talitonu o lalo lava ia o le Faavae sa faataoto mai, o lea lava e afeifei ai i totonu. Ona o le silasila mamao a toeaia na fauina le Faavae, na faapea ai atonu e oo i se taimi ae tulai mai se Vaega Faaupufai, tatou te galulue lava ina ia mautinoa ua tofua saou uma le atunuu i le filifiliina o Le Ao o le Malo.

Ua sausauna foi isi sui usufono e faapea o le filifilia lava o Le Ao o le Malo e le faigofie mo i tatou uma, ae ona o lea ua tatou agai i aga faatemokarasi, o ai lava le Vaega Faaupufai o le a tulai mai o le a faafoeina lea Paeaiga ma lea Paeaiga, e pei o i latou na o lea e agai i ai le agaga o le Tulafono Tau Faaofi latou te filifilia le Ao o le Malo. Ona lagona ai lava lea o lou faanoanoa ona sa ia te au foi le lagona e tatau ona i ai se saou, ae e moni lava ua sausauna le Palemia e uma ona aumai lea iinei i le Palemene, ae na ona aumai lava ae e le toe mafai aua o le Teuteuga lea ua i ai, e le toe i ai lava ma se avanoa o le Vaega e Agaia le Malo. O a ni lauga e fai a o lea ua uma ona taoto? A o le agaga ia o lou sui usufono ia mautinoa aua e sau aso ae alu aso. Pe felafuai foi ma siisii le tai i lona sua i lea vaitau ma lea vaitau, ae ia mautinoa o lea tatou te tofua saou uma i ai.

Ona ou agai saou lava lea i le Tulafono i le Teuteuga ona o lea e foliga mai o le Vaega Faaupufai e toatele o i latou e faia. O lau matau e ao ona mautinoa ua maioio mai po o le a tonu le uiga o le toatele, aua e mafai i se taimi o muamua ona manumalo mai se Vaega Faaupufai i le fuainumera lea e i ai e 47. A faapea e vaelua, e mafai ona maua le 25 ae 24 se Vaega e Agaia le Malo. O fuainumera na o le 25, 24, 26 ma le 23 seia oo lava i isi vaega na e i lalo ifo, o se fuainumera ou te tilotilo totoa i ai, e fevaevaeai ai le atunuu. E le maua uma ai lagona iinei ae, sa ou faapea o le a taoto mai o le a aumai se fuainumera i le toatele, po o le a le toatele. A faapea e 60% e matagofie tele aua o le mea e tatau ona fai, po o se fuainumera foi po o le 2/3 ona faigofie lea ma e le toe fesiligia ai foi. A o lou popolega lena aua e tupu, ina nei te i ua uma ifo ae tasi lava le palota, ona faapefea lea? A o lea e taoto mai i le Tulafono Tau Faaofi, o lona uiga o le a ave uma lava le malosia lea ae faapefea le toatele lea aua e tasi lava le fuainumera? E fevaevaeai ai lagona o le atunuu ma e le amiotonu. A o le Teuteuga a faapea o le finagalo lena ona agai lea i ai ina ia faamaioio mai po o le a tonu lava le toatele lea e i ai ona mautinoa lea ua maua tonu le agaga lea e i ai o le Teuteuga o le Tulafono Tau Faaofi. Lau Afioga i le Fofoga Fetalai, ona pau lea o sau tuualalo i le Palemia i le tulaga lea o le Teuteuga o le Tulafono Tau Faaofi mo le filifilia o Le Ao o le Malo.

Ona ou oo mai lea i le Tulafono lea e tusa ai foi o Faiga Palota aemaise lava sui usufono o le Au Palota Taitoatasi, lea ua i lumamea nei le Tulafono e Toe Teuteu ai le Faavae. E moni lava ua sauna manino le Minisita e ala i le Tulafono Tau Faaofi e le tatau ona toe lauga i ai, a o le fesili ou te fia fesili atu ai i le Minisita. Afai o le a pasia nei ae aua ne i tatou toe lauga i ai e pei o lea ua uma ona lauga i ai, o lona uiga e le tatau foi la ona toe talanoaina le Tulafono lea e faataoto mai. E pei o le mea lena o lea sa ou popole i ai, po o fea e malosia, o le Faavae po o le Tulafono lea e loma mai. O lea e i ai le

Komiti a le Palemene aua afai o le a pasia nei i inei, o lona uiga e le tatau la ona faaauau aua o lona uiga o le mea lea o le a i ai.

O lou popolega lena aemaise o lea e fai a tatou felafolafoaiga ina ia mautinoa lelei ma manino le tulaga lena. A o le taotoga o le Tulafono Tau Faaofi o lea ua uma ona tatou talanoa i ai. O le vaega mulimuli lena e i ai aemaise le Teuteuga o le Tulafono Tau Faaofi e tusa ai o le Nofoa o le Maota, se i tulou lava lau Afioga i le Fofoga Fetalai vaeane lou gutu ma le afi, a o le Nofoa lava ia, o i inei e tatau ona faafoefoe ai.

E faafetai foi ia te oe i lou toa i le faafoeina o le Maota i le tele o Paeaiga aemaise o lenei Paeaiga ua agai mai i ona tulaga, o i ina e iloa ai le tautai matapalapala aua o lo o ia te oe lava le agaga lena e faafoe ai le Maota. Ae faafetai pe afai e te manatu mai i le matou Itu. A tetele atu foi se tala a le matou Taitai po o le matou Itu, o le matou galuega lea e fai ina ia mautinoa ua tulai mai le Faigamalo i se tulaga e tatau ona i ai. O fautuaga ia e avatu aua afai foi o lena ua uma ona i ai, e tatau pea ona toe avatu ia saga lelei atili.

O le Tulafono Tau Faaofi mulimuli o lo o tau Teuteu ai le Faavae e tusa ai o le Komesina o Sulufaiga, o se mea e tatau ona fai. E aoga ma tatau lenei Teuteuga ina ia mautinoa lelei ua malu puipuaia aiatatau a le tatou atunuu, mai lava i tina matutua ma tama matutua seia oo lava i se aupito itiiti. Ia malu i lalo i le Tulafono Tau Faaofi lea ma lona Teuteuina. Ou te faafetai atu i le mataala i lenei itu taua ina ia mautinoa ua laugatasia i tatou uma i lalo o Tulafono e fau atu i inei i le Maota.

Lau Afioga i le Fofoga Fetalai, o se sao puupuu lea i le Faavae ma le Teuteuga o le Tulafono Tau Faaofi ua aumai i lenei afiafi, ae ia faamanuina mai le Atua i toega o le tatou Fonotaga.

**FOFOGA FETALAI:** Malo, malie lau Afioga i le Taitai o le Itu Agai toe tasi le avanoa lea ona tuu atu loa lea.

Tulai mai le sui usufono mo Vaisigano Nu 2.

**Tofa MOTUOPUAA UIFAGASA AISOLI VAAI (Vaisigano Nu.2):** Faafetai i lau Afioga i le Fofoga Fetalai mo le avanoa. Atonu o se manatu foi e puupuu ona o lea ua uma ona faaleo atu e le toatele o lenei Itu ni manatu sa i ai ma ni manatu sa talatalanoa i ai.

Ona pau lava se manatu puupuu o lenei itumalo e na o se fautuaga lava i le Malo po o e foi o le a tulai mai latou te faatinoina lenei Tulafono po o lenei Teuteuga i le Faavae. Pau lava lea o sou manatu i lenei afiafi, o le filifilia lea o Le Ao o le Malo. Lau Afioga i le Fofoga Fetalai, o Samoa o le atunuu ua uma ona tofi, e moni lava o tatou ua tatou o faatemokarasi, ae tatou te le o temokarasi atoatoa ona e i ai le tatou tu ma le aganuu. O le uiga o lau tala, o le temokarasi e oo lava i le tamaitiiti ua 21 tausaga ua mafai ona palota. E mafai foi ona sau i totonu o le Palemene, ae a lea, e leai na o tatou ua mafai ona fai suafa matai e mafai ona omai. O le tatou tu lena ma le aganuu e faaauau.

Fai mai le upu o le pese lea e masani ai, ua tofia e le Atua Samoa ina ia pulea e matai. E eseese foi o tatou matai ona e i ai matai ua silisili atu i lo le tele o matai o tatou lea e i inei. Ia manatua foi o Samoa a faalupe, o lena tou te iloa le Usoga a Pule ma Tumua, le paia i Aiga ma a latou Tama, o Tama foi ma o latou Aiga, Ituau ma Alataua, Aiga i le Tai ma le Vaa o Fonoti. E faapena pe a faalupe Samoa ma o le mamalu foi lena o le Palemene lenei

tatou te tausisi i ai. E pei na o se fautuaga lena i le Malo po o ai o le a tulai mai e faatinoina le Tulafono, ia tausisi i lena. E eseese o tatou matai, silasila i tofiga ua uma ona fai. Silasila foi o Samoa o le ao mamala. O le a le uiga o lea upu o Samoa ua ao, ua ao i le Tala Lelei, ae sau ai lava ma mala i tua pe a sese le filifiliga. Ia manuia le Fono.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Faafetai mo le avanoa ua tuuina mai ou te tulai atu ai ma le faaaloalo. O le Teuteuga o le Faavae i lou lea talitonuga, e le o se mea e tupu soo. O lou talitonuga e tataua ona saunoa uma i ai sui usufono. Aisea, ona o le taua o le Tulafono lenei. A outou silasila i ai i sui usufono o itumalo taitasi sa i ai i le fausia o le Faavae, e le i soona faia faaiuga ma liuliu i ai le tofa ma le faautautaga loloto. O le suiga lea ua aumai nei, masalo o le taimi muamua lea ua sui ai e lima tulaga o suiga o le Faavae. E le o se mea faigofie lea mea. O le mea e masani ai e tasi le suiga, a o le a sa tatou matai i le suiga lea ua aumai nei? Lima suiga o le Faavae. O le mea lea lau Afioga i le Fofoga Fetalai lau Afioga i le Palemia, e le o se tamai mea le mea lea, e le o se tamai mea, o le mea tele le mea lea, pe po lava le aso lenei ma alu lenei vaiaso, e tataua lava ona silasila totoa i suiga ia e omai, o lea ua saunoa lenei vaega, o Samoa o le aomamala, e mafua aisea? Pe le o i totonu o le Faavae Le Ao o le Malo, ae o lea tatou te iloa i le tu ma le agaifanua, le tatou vatapuia ma Tama Aiga, lea tatou te sosolo ai. Aua ou te fai atu, e sese loa le tofiga o Le o le Malo, o i ina e vevesi ai le atunuu. Aisea? O le talitonuga e fanau loa le Samoa iloa le faasinomaga o tofiga nei. Ae o le a le mea lea ua tupu mai? E tataua ona filifili le sui usufono i lana filifiliga saoloto ae le o le aumai faa-Pati, leaga foi o lea o le a omai e aumai le faaiuga i le Pati, ae le fuafua mai i le aiatatau i le tagata agavaa e tataua ona tutusa ma tu ma aga.

**FOFOGA FETALAI:** O lea ua maua lou finagalo le Taitai o le Itu Agai, o lea ua maua lou finagalo, se i tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le matua tele o le sese o le mea e aumai nei, o le mea o le faaoloataua o le Palemene lenei. E pau lava le mea lea e avatu i le Teuteuga, o le Teuteuga ina ia tatou see ese ma le mea lea sa sau ai, o le mea lea sa sau ai, e na o le toalua lava tagata, na o le pau lava le mea e mafai ona e faatu, saina e le isi ona ave lea, e mafai lava la e le toalua ona ave ni sui se toalua a uma ona saina uma i le sui e naunau ai le isi, ia ona toe saina foi lea o le isi pepa i le sui e naunau i ai le isi, o le ala lena na ala ai ona avatu e mafai ona faatu ni sui se 49 i i, e le mamalu. Ma e o le agaga lea...o le mea lea ou te faatauaina, o le mea lea e leaga ai le talanoa atu o matou nei ua uma ona faitau i lavelave i i, ae talanoa ma tagata e le o faitau ai, e le o faitau ai ma mafaufau loloto i le loloto o uiga o upu ia, o le loloto o uiga o upu ia e i totonu o le Faavae, sa fai i le taimi lena e leai ni vaega, e mafai ai ona nofonono lava le toalua faatu ni a la sui, e pei ona ou fai atu, e mafai lava e se toalua i le suiga lea faapea, ia ta malilie e ta te saina le ta pepa lea e ave lau tama, ia ona e saina foi lea ave lau tama. Lau Afioga o ni mea le mamalu tele ia, ae mafai ona fai i lalo o aiaiga o le Faavae sa sau ai i le

amataga, ae na ala foi ona fai e talafeagai i lena taimi, aua foi e leai ni vaega sa i ai, a o lea la ua tatou i ai i inei i le taimi lenei, ua fai faiga vaega, o le mataupu muamua lava lea na totogo ae i le faaiuga na fai mo le fautuaina o le Palemene lenei, ina ua tuumalo le Malietoa. A o le fesili, e fia ni sui e ave? ia ae saili atu, e mafai ona tele lava ni sui e ave, e faale mamalu lea mea. O lea la na saili ai e le vaega lenei le tasi, ae ou sau i i le Palemene, e lua isi fautuaga ia ua i ai, o lona uiga la ua tolu. I le tatou agai atu i le lumanai, o lea e i ai le avanoa e mafai ai ona faatutu ni sui se 49 i totonu o le faaupuga lea e i ai, e pau lava lea, a o le mea ua toso i ai ma faafefe, oka, o le matua tele o lenei lapisi e aumai, o le matua lapisi o lapisi, a o le faigofie ia o le Teuteuga lea e avatu ina ia mamalu ma faatino ia tofiga o Le Ao Mamalu o le Malo, o le mea e fulisia i ai le vaega o lea e tu ai le Malo, ia ona aumai loa lea i totonu i i, aumai lea i totonu i i, e le o tatou o ni Hitila, a aumai a, afai foi e aumai le fautuaga, e a pe a fautua ia e toe tolopo toe tilotilo i ai, e leai lava mea e le mafai ona faia i lalo o le la. A o uiga ia e aumai nei, o le matua sese i Sini o mea o manatu ia e aumai nei e lau Afioga i le Taitai o le Itu Agai. Vaai ua umi o e toso, toso lava toso i o i Sini, a o le faigofie ia o le Teuteuga ma le faamatalaga na avatu analeila, o le isi Teuteuga, o le sui o le igoa pulenuu i sui o le nuu, ona o lea e faaoga i totonu o le Faavae le upu pulenuu. Ua ta le iloa i nei mau lafoga e aumai nei, o suiga o le Faavae ina ia tuu i ai le Ombudsman, ia o lea foi ua uma ona saunoa le toatele e taua tele, e taua tele le manatu faatu o le Malo. O le Teuteuga foi i le tulaga o le filifilia o le tatou Fofoga Fetalai, o le a le mea o le a aafia ai fua le tutoatasi o le Fofoga Fetalai? O le a le mea o le a aafia ai fua i filifiliga e fai? E filifili lava e tatou. E filifili e tatou pe tofia e tatou, a o le mea lea e fai, o le vaega aua o le mea lava lena o lea e tupu, talu lava ona tulai mai le HRPP i le 1982 ma manumalo pea i le umia o.....ia o i lava o lo o i ai le Fofoga Fetalai. Pau lava le mea lau Afioga i le Fofoga Fetalai, lea ua amatamata mai ai lava e faafaigofie ai nai lo le mea lea sa.....o lea la o lo o outou molimau i le filifiliga o lau Afioga. Ia e auauai atu i o, ou te le iloa pe lua ea itula na faatino ai lena mea? Ae o le faigofie ia e le atoa se minute e faatu ai se lafo ma pasia.

Lau Afioga i le Fofoga Fetalai, o le mea lena o lea e avatu, o le faafaigofieina, e pau lava le mea e agai i ai le vaega lenei e faafaigofie mea faigata, aua le faalavelaveina mea e le fenumiai, ae soia tatou te o pea i auala tuai fenumiai, ae tatou o i auala fou e faatino ai a tatou galuega, ia ona tele ai foi lea o galuega e fai, i le manino ma le tulaga o le faigofie ona fai. A o nei ituaiga lauga na fai i lenei taeao, oka, oka, oka, oka, oka, ua aumai lena ma lenei, ua pei lava o le a pau mai le lagi ma le lalolagi, a o le faigofie ia o manatu e faavae ai Teuteuga nei e avatu o le Tulafono.

**Afioga Hon Palusalua Faapo II:** Ua a, ua maea lau Afioga?

**FOFOGA FETALAI:** Silasila foi lau Afioga i le Taitai o le Itu Agai, o le folasaga o lau lauga lea sa e saunoa ai analeila e tuga, e tele suiga, o le ala foi lena na e faafofoga mai, se i taumafai pea le Palemia e auauai uma atu suiga ia e te atugalua i ai, a o lea ua maua lou avanoa, ia saunoa laia.

**Afioga Hon Palusalua Faapo II:** Ia ae saunoa la i le Palemia, se i tuu mai se avanoa lau Afioga.

**FOFOGA FETALAI:** Ou te tuu atu ia le avanoa i lau Afioga pe a e onosai e faasolosolo, a malamalama lava, e leai se vevesi.

**Afioga Hon Palusalue Faapo II:** Lau Afioga i le Fofoga Fetalai, leaga o lea e saunoa le Afioga i le Palemia o lapisi mea ia e avatu ma faigofie mea ia e.....

**FOFOGA FETALAI:** Se Palu, ou te ofo i lou toe amanaia o felafolafoaiga.

**Afioga Hon Palusalue Faapo II:** Leaga o lea e faafogafoga mai le atunuu.

**FOFOGA FETALAI:** E le fou i le atunuu upu o felafolafoaiga. Aua e te faataua mea vaivai ae agai sao i lou manatu.

**Afioga Hon Palusalue Faapo II:** Lau Afioga i le Fofoga Fetalai, ia o lena la, mea vaivai lea e saunoa i ai, ae o lea ou te fai atu, o le filifiliga o Le Ao o le Malo, e le o se mea faigofie, o le mea e filifili i le loto fuatiaifo o le sui usufono pe a filifili i totonu o le Palemene, lea ua saunoa atu lenei sui usufono, a faapefea pe a 24 i le 25? Ae saunoa atu i e 24 e tasi le latou sui ae 1 se tagata e palota mai i ina? E tutusa lava ma lau saunoaga lea e fai mai e 49 sui faatutu? Silasila la i le lavelave o le a oo i ai?

**FOFOGA FETALAI:** Ia o lea o le a tali atu.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le mea e fia faasao. O lona uiga la o le mea lea e te agaga i ai, o le vaega e toatele i le Maota aua ne i filifilia e latou ae filifilia e le vaega e toaitiiti. O le mea lena o lea na e sau ai nei, lea na e sau ai nei lava? O lea foi la na e agai i le tulaga e 24, 25 ai, na o le vevesi le mea e maua. Ua e vaai la i le sao o le mea lea na ou fai atu ai? E le manao le vaega lenei e vevesi, ae faigofie lava, afai lava e 25, tuu i ai i le 25 e fai e latou o latou lea e fulisia i ai le Maota e aumai le fautuaga, aumai le fautuaga i inei, a o lea la ua maua lelei lava i le mea lea ua e aumaia, e te le...a 24 loa 25 aua ne i filifilia e i latou o tu i le Malo, ma o lea ua e ..... mai e oo loa i i.....pe a alu ai i le mea tuai, o le mea lena o lea e musu le Malo e fai. Se e tiga lava ona e taomi i lalo le tamai moa ae ioio ae lava, i au lava iuga ae na sau ia te oe, o la ua nana, nana, nana, i le mea lea e te manao ai e faavevesi, lea ua iu lava ina e tautala mai i ai, lea ua e saunoa manino mai ai, e te manao e faavevesi, pe a oo i le taimi o le 24, 25, ia vaai i ai i le mea lilo lea sa tatanu i lalo a o lea ua iu lava ina sau i luga?

**Afioga Hon Palusalue Faapo II:** Lau Afioga o le mea e fia faasao, e le o se faavevesi, a o le mea e ono tupu, faatu mai la outou sui, faatu atu le matou sui.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Palu, lea ua e aumaia nei lava, e te manao e faavevesi.

**Afioga Hon Palusalue Faapo II:** Leai o oe lena e te manao e faavevesi.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Leai, o le mea lea e avatu i le Tulafono.....

**Afioga Hon Palusalue Faapo II:** O lea e lelei lava le mea o lo o i ai nei, e mamalu.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le mea e maua ai le filemu, aua ne i soona vevesi le atunuu.

**FOFOGA FETALAI:** Malie lau Afioga i le.....O lea tatou te talanoa i le tulaga aloaia o le fulisia, o le Temokarasi moni lena, o le agaga lena o lea e faataatia mai ai le aiaiga lenei o le suiga o le Faavae, o lea foi tatou te i luga o le tatou consultation lea tatou te agai e fai, o lea e matua talafeagai le fetuunaiga o manatu ma lagona, ae ou te talitonu, ia silasila totoa o lea foi ua aumai fautuaga a sui usufono mamalu e uiga i le mea lea e i ai le atugaluga a lau Afioga i le Taitai o le Itu Agai i le 24, 25, o lea ua taatia i le agatonu, e le i faia le fonu a le tatou Komiti, ae le o se mea o le a tulai mai ai se feteenaiga ma se isi finauga tele, o lea tatou te.....o fea e fulisia i ai, o le Temokarasi moni lena. Ma o lea e faamalulu atu i le Taitai o le Itu Agai, ua manino ma malamalama lea vala, see ese i le isi mea faasolo le tatou Fonu.

**Afioga Hon Palusalue Faapo II:** E pau lava lau fautuaga lau Afioga i le Fofoga Fetalai, o le mea lea o lea e taumafai atu ai, o le mea mamalu ma le mea e filemu ai le atunuu, aua e leai se mea e mafaia e le itu toaititi ae omai le itu ua manumalo mai ma se sui e ono tupu ai le vevesi, e tusa ai ma le aga ma le tatou aganuu. Ave le faamuamua i Tama Aiga, o le mea lena o lea ou te fai atu ai, aua o le taimi nei, i le taimi nei i le talanoaina o le mataupu lenei, ia ou te le tau fai atu, vaeatu lava Lana Afioga Mamalu, O Le Ao o le Malo, e le lelei i le faalogo mai o Lana Afioga Mamalu, O Le Ao o le Malo le mea lea tatou te talanoaina. Aisea? Na o le laau lava e tu ae oia. O le mea lena o lea ou te fai atu ai lau Afioga i le Fofoga Fetalai, ae ui o lea, o le a ou see ese lava, ae na ona ou faamanatu atu faapena, aua e tatou te puipui i a tatou Tama na, tatou te puipui i Tama Aiga.....

**FOFOGA FETALAI:** Ia Palusalue, e tautala ma le ava, sei fai atu lau faamatalaga lea, malie alaala mai i lalo, malie alaala mai i lalo le Taitai o le Itu Agai! Sa ou manatu tele i le tulaga lea ina ne i meaane ua tatou manatu i nisi manatu e sili atu nai i lo i le mea o lo o taatia ai le finagalo o le tagata ia ma le vaega faaupufai ma le Maota. E le o i ai Tuivalea i lea itu o le Maota ini atugaluga na lea e te i ai, ua uma foi ona tatou malamalama lelei i le mea lena e te tau saunoa mai i ai, leai, e le faapena le Tualumaga o le.....o outou lava manatunatuga o le tagata lava ia, ae o lo o taatia i le agatonu le finagalo ma le tofa, o i ai se mea ua see ese ai ma tulaga o le tatou Faavae ma le tatou va nonofo? Ina ne i outou mau i le tulaga lena, o lou lava lena finagalo, leai e le faapena. Ua uma foi ona outou atugaluga i le tulaga o le filifiliga o le atunuu, aua e iloa Tupu, ua iloa Tama, ua iloa Aiga, ae le o se tulaga leaga o lena o le a amata ona faamataali mai le tulaga na faapea o se fauuga le mea lea e fai, talofa, ia aua ne i o tatou manatu, o le ala tonu lava lea na ou maumau iumaea ai leaga o lea o le a see le tatou mataupu i nisi mea e momoe momoe feala



mai, ia e le o le faamoemoe lea. O le agaga lena o lea na ou taofiofi atu ai, e le o le agaga lena o lea e aumai le Tulafono, ia se i vaai o lea o le a alu alu lava le filifiliga o Le Ao o le Malo, ia silasila foi i lau tala na ou fai atu muamua, e le o lape le vaai a au nei o le Fofoga Fetalai i le mataupu lea, e tasi lava le mea lea na ou augani atu ai nei, sui le faiga lea, ia aua ne i 49 sui e faatutu mo le filifiliga o Le Ao o le Malo, e tasi lava, e tasi i le tulaga maopoopo ma o le mea lena e te silafia, a ou fai atu nei la o le a le finagalo o Le Ao o le Malo, aua ne i fai se palota, na a? o lea na oo tonu lava i ai le mataupu. E faamalie atu i le Taitai o le Malo aemaise foi o le Afioga i le Taitai o le Itu Agai, e le o agaga ea lena o lea e avatu nei? E le o le mafuaaga tonu lena o lea e taumafai atu ai nei? Ia aua ne i tatou o salalau, pe tatou te o le mautinoa, pe faalou le maga le tatou agai e filifili Le Ao o le Malo. O lea ua tatou i ai i le vaitaimi o Vaega Faaupufai, tatou o laia e oto le lauavamua, o mea maopoopo na mo le lumanai, aua tatou te le iloa le finagalo... A tatou o nei i le tulaga lautele, talofa, e fai o le toso o le aulapauta, umi tualumaga ae le iloa pe tua ma ni a. Ae a tatou o i nuu potopoto, e taape a nuu potopoto. O le ala lena o lou toe taumafai atu, leaga o le a amata, e pei na ala ona fai le Tulafono Tau Faaofi ona o nisi faufauga a lea Itu o le Maota. E leai Palusalua, e le o le agaga lena o lea ou te....

**Afioga Hon Palusalua Faapo II:** Lau Afioga e le o sese lau tala na fai atu.

**FOFOGA FETALAI:** Leaga o lea ou te avatua iu o tala ia e aumai.

**Afioga Palusalua Faapo II:** E le i fai atu au i se fautuaga faapena.

**FOFOGA FETALAI:** Malie Palusalua o lea ou te tautala.

**Afioga Hon Palusalua Faapo II:** E le o se faufauga lea ou te fai atu ai.

**FOFOGA FETALAI:** O lea ua e saunoa na o Tama a Aiga e filifili. Aua tou te manatu o lea ou te mau iumaea i upu ma tala ia tou te fai maia. Malilie sui usufono o lea na ou fai atu, e omiomi le tatou mataupu i totonu i le filifiliga lea na ala ai ona aumai e le Malo. O le suiga, a o lea o le a toso toso lava ese le mea o le a tatou o i ai.

Tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

**Afioga Hon Leaupepe Toleafoa Apulu Faafisi:** Faafetai lava mo le avanoa. Lau Afioga i le Fofoga Fetalai, o mataupu foi faapenei e faigofie, ae mau foi e faalele ae mau foi e maitau, o lo o maitau mai le tapuaiga a Samoa. Ona la o lea ua oo le saunoaga a le Taitai o le Itu Agai ma taua ma sau i le va le suafa mamalu o Tama a Aiga, o le atunuu lena e nofo magalafu e iloga malala ola o Samoa. E iloga lava tolotolo, e iloga foi tumutumu mauga. Ae tatou te taufai iloa lava lauga i fafo i le faafofoga mai a le atunuu, ioe, ae tau popo manu i totonu o le tatou Palemene ona o le manatu ina ia aua ne i maua mai e tua ma toso i se agaga faauigalua, ae leaga o lea ua e taua Tama a Aiga. Ia, o fea sa i ai le manatu lena talu ai nei? O lea ua ou fesili atu, aua leaga o le manatu lena o lea sa fesiligia talu ai nei ina ua filifili Le Ao o le Malo. O fea sa tulai mai ai? E tasi lava le sui na aumai, na o le Afioga i le Tui Atua Tupua

Tamasese Efi. O le manatu lena o lea foi o le a toe faaaliali mai e faatupu ai le....

Ae na ona ou fautua atu i lau Afioga i le Taitai o le Itu Agai aua e le o sou tiute lea vaeatu le galuega paia ma le galuega faigata a le Fofoga Fetalai. O le faamatalaina ma le faapupulaga a le Malo, o le tatou faamalamalamaga lena, ae le faapea o le a e finau ona faapea mai lea o le Afioga i le Palemia, ia tuu ia lau faamalamalamaga, ae sao o lau faamalamalamaga lena, leaga o lea ua e taua mea ia. O lea la ua ou fai atu, sa tupu lena mea? E faamalie atu i lau Afioga i le sui usufono mamalu, ae faigofie lava le mataupu pe a tatou o i le agaga mama. Amuia e loto mama latou te iloa atu le Atua. Faafetai.

**FOFOGA FETALAI:** Tulai mai le Taitai o le Itu Agai, see ese ma le mataupu lea ua manino ma malamalama. Alofa mai o lea e taumafai atu.

**Afioga Hon PALUSALUE FAAPO II:** Ia o lea o le a ou see ese, ae o lau tuualalo lava, o lea e manaia le mea lea e i ai nei, e mamalu ma filemu ai le atunuu. O le a ou see ese.

I le tulaga lau Afioga i le Fofoga Fetalai i le tofiaina o lau Afioga, ia tailo, tailo i le tofiga lea ua faamoemoe e sui ai le Faavae. Aua o lea e feoloolo i le taimi lenei, e ui lava ina e faaauau i le la Itu i le tele o taimi, ae o isi foi taimi e te faaauau mai ai.

**FOFOGA FETALAI:** Aua e te faaita au ona leaga loa lea. O le a avea lou tuu avanoa tele atu, o lea lava ou te ava tele atu. Ae aua le avatua le faaaloalo, ua tele tele lou le amanaia o le alofa lea e avatu. See ese i se isi mataupu, aua e te toe tautala i le Fofoga Fetalai.

**Afioga Hon PALUSALUE FAAPO:** Ia ua uma lau lauga. Ia manuia le Fono.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, masalo ua tatau ma onomea ona ou tulai atu e avatu sau upu faafetai. O au nei sa le manatu o le a tele ni lauga i le Tulafono Tau Faaofi lenei, ona o lenei, o lea na saunoa le Minisita mo Faamasinoga ma Pulega Tau Faamasinoga, ua uma ona tatou pasia le Tulafono Tau Faaofi o Faiga Palota. Ae pei ua avea le mulimuli mai o le Tulafono Tau Faaofi o Teuteuga o le Faavae (Nu.2) 2014 e aloaia ai le Tulafono lena i vaega o le Tulafono lena e aloaia ai le faatuina aloaia o le itumalo faaalaalafaga o le itumalo Tu Taulaga peiseai ua maualafia ai le toe lagalaga o finagalo. Ae ou te avatu le faafetai ona ua avea foi fesili e lagalaga ua mafai ai ona maua foi le avanoa e faalautele atu ai le Tulafono Tau Faaofi.

A outou silasila i le Schedule 2 o le tatou Tulafono Faavae, o le tele ia o le vaega lena e i ai e tatau ona toe teuteu, o le tulaga lava lea i le faataoto mai ai o Faiga Palota e aofia ai Le Ao o Le Malo ona o lenei lau Afioga i le Fofoga Fetalai, sa agavaa i le taimi e leai ai ni faiga vaega. Aua foi o le tulaga lena, o le manatu o tatou Taitai i na tausaga, e leaga lea mea o Faiga Vaega e fefulituaai ai, ona faatulaga loa lea o le Faiga Palota, e pei lava o le sailiga o

se Peresetene o se Au Lakapi e avanoa uma ai lava sui e faatu ni sui faatutu mo le tulaga aupito taua o le Faalapotopotoga. Nei la, o la e tele lava le avanoa faapena e tupu ai le vevesi. O le faatulai atu la e le tatou Malo o mafauauga ia mo le agai i le lumanai, ina ia aloaia ai le tulaga o upufai o Malo, lea ua aeae ai nei ma tiu ai le tatou Malo. O le tulaga lena lau Afioga, e ui lava ina oooo lava i tulaga uiga ese tulaga o saunoaga, ae manino lava le agaga o le tatou Malo, ina ia faafaigofie ma mamalu le tulaga o le filifiliga, tofiga o Le Ao Mamalu o le tatou Malo, ma alu pea i ala o mea e tusa ai o filifiliga o mea nei o Ao o Malo i la foi atunuu. E faatino lava i auala faigofie, o le Vaega o lo o fulisia i ai le pulega Malo, o i latou na e aumaia le fautuaga mo le sui e ono faia i ai le tofiga, ae fai lava e le tatou Palemene le tofiga. E le faia i tua e fai lava aloaia i totonu o le Palemene.

O le tulaga lena lau Afioga, ua lagalaga fua, o lea e i i Aiga, o lea e i i Aiga, Aiga Sa Malietoa, Aiga Sa Tupua. O au nei lau Afioga i le Fofoga Fetalai, e fa o i goa matai i totonu o Aiga, Sa Malietoa, Sa Fenunuiavao, Sa Tuala, Salevalasi. Ou te matai ai. E fa Aiga? E i ai se isi o outou? E leai se isi. E taua tele i aiga mea nei o Tama.

Lau Afioga i le Fofoga Fetalai, o le tulaga taua lena leaga ua tupu mea ia, e le faapea e le i tupu. Na tupu i le filifiliga muamua o le Afioga ia Tupua, lea na ou fai atu ai, ou te savalivali mai e aumai le filifiliga ua tasi moemoe le Vaega lenei i le tulaga ave mamalu le fautuaga, ae ou sau ua lua isi pepa ia ua taatitia atu i i. Ae feoloolo la le mea talu ai sa na o le tasi. Ae o au lava na ou sau ou valaau i le Taitai o le Itu Agai. Ae masalo ana ou le valaau i ai, masalo e ese atu le pepa i i ese foi lana ia fasipepa, a o mea ia lau Afioga o lea e naunau i ai le taofi o le Vaega lenei ia fai mamalu a tatou faaiuga. Na pau lava lena, ae toe momoli atu ai le agaga o le faafetai ona ua avea le Tulafono Tau Faaofi lenei ma mea ua maualafia ai le toe lagalaga e isi o le Tulafono ua uma ona pasia ae ua maua ai foi ma isi faamalamalamaga fou ina ia faaleleia atili ai le tulaga o tatou Faiga Palota. Ia manuia le tatou Fono.

**FOFOGA FETALAI:** Malo faafetai i le saunoaga faamalamalama a lau Afioga i le Palemia.

*Na faamaonia le lafo ma faitauina le Tulafono Tau Faaofi o Teuteuga o le Faavae (Nu.2) 2014 i lona faitauga faalua.*

**FOFOGA FETALAI:** E tusa ai ma le Tulafono Tumau o le a tuuina atu le Tulafono Tau Faaofi o Teuteuga o le Faavae (Nu.2) 2014 i le Komiti o Galuega, Tulafono Tumau, Maota Fono ma Mataupu Tau Faiga Palota mo le iloilo ina ma toe lipoti mai i le Fono Aoao pe a tuanai le 90 aso talu ona tuuina atu lenei Tulafono Tau Faaofi.

## ILOILOGA O LIPOTI A KOMITI FILIFILIA

**P.P.2014/2015 NU.57, LIPOTI A LE KOMITI SUESUE FAAPITOA A LE PALEMENE E TUSA AI MA LE FAATONUGA A LE FOFOGA FETALAI O LE ASO 21 IUNI 2013 E UIGA I FAAMAUMAUGA NA TAUAAOINA E LE SUI USUFONO MO GAGAEMAUGA NU.2 E FAAMAONIA AI LANA TUUAIGA E FAASAGA I LE**

**MATAGALUEGA MO TUPE MAUA O LE ASO 20 IUNI 2013 –  
ILOILOGA**

**FOFOGA FETALAI:** Tulai mai lau Afioga i le Taitaifono o le Komiti Suesue Faapitoa Faa-Palemene.

**Afioga TAEFU LEMI (Taitaifono o le Komiti Faapitoa Faa-Palemene):** Lau Afioga i le Fofoga Fetalai, ou te tulai atu ma le faaaloalo e faatu le lafo, *Ina ia faautagia e lenei Fono Aoao le Lipoti a le Komiti Suesue Faapitoa Faa-Palemene o lo o tuuina atu ai ana Sailiiliga, Fautuaga ma Iugafono.*

*Faaluaina e se tasi o sui usufono mo le Palota Taitoatasi, Afioga Maualaivao Pat Ah Him, se tasi o sui usufono mo Falealili, Tofa Tusa Misi Tupuola, le sui usufono mo Vaa o Fonoti, sui usufono mo Aiga i le Tai, se tasi o sui usufono mo Salega, Afioga Afualo Wood Uti Salele, se tasi o sui usufono mo Vaimauga Sisifo, Tofa Lenatai Victor Faafoi Tamapua ma le sui usufono mo Alataua Sisifo.*

**Afioga TAEFU LEMI:** Faafetai i lau Afioga i le Fofoga Fetalai. Ia o le tatalo a le Komiti, silasila pea ma faitau le tatou Lipoti, e faigofie ona malamalama i ai i tatou Fautuaga ma Iugafono ae o le a ou faitauina e faapea:

**“FAUTUAGA:**

I le maea ai o ana Iloiloga ma Sailiiliga i le mataupu e pei ona faataatia mai e le Fono Aoao, e fautuaina ai e le Komiti le Malo e faapea:

- (i) **Toe silasila i le faagasologa o galuega:** Ia toe faatulaga nei le faagasologa o galuega a le Mataluegaina ia maioio lelei galuega ma lona faatinoga, aemaise o i latou e faatinoina. Ina ia faataatia ai ma **faiga faavae e vaia ma siaki lelei ai le faatinoga** mo le vave toe faaleleia o ni vaega e moomia le faaleleia. Review system an processes for monitoring and improvement, transparency and accountability. O le faataitaiga, o le kiliaina o faamomoli po o personal effects, le faaogaina o le risiti tulagalua po o le sub receipt, ma le aoina o seleni i faleteuolua, **(Internal Controls).**
  
- (ii) **Ia lava le aufaigaluega:** Ina ia silasila lelei i le aufaigaluega moomia ma faatumuina ni avanoa o i ai. Ia feutagai ma le Matagaluega o Tupe ma le Komisi o Tagata Faigaluega a le Malo, i ni avanoa fou e faavaeina, aua le faaleleia o le auaunaga. E ono faaopoopo nisi seleni e aoina, i le lelei faataatia o le faatinoga o galuega, aemaise le lava o le aufaigaluega e faatinoina. Ia faamalosi ma faaleleia atili le vaega fou o le Suesuega i le maea o le Kiliaina o Oloa po o le Post Clearance Audit. **O le toagaogao o le aufaigaluega e ono faatupuia ai faafitauli e**

**feagai pea ma le Matagaluega e pei ona taua i nisi o fautuaga o mulimuli mai.**

(iii) **Galulue faatasi ma Kamupani Teu Oloa, Freight Station po o Freight Carriers:** Ina ia toe sasaa le fafao e ala i le galulue vavalalata ai o Kamupani teu oloa. Ia faia ni polokalame faaleaoaoga e faamalamalama ai vaega nei;

- Matafaioi ma tiute tauave (legal obligations) o Kamupani teu oloa,
- Faamalamalama lelei ai le ASYCUDA World, aemaise o vaega ua mafai ona faamatuu atu i Kamupani teu oloa,
- Faamalamalama ai uiga, ma le faatumuina o pepa eseese a le Matagaluega, e pei o le BS4, IM4, Menifesi ma isi.

E fautuaina foi le Matagaluega ina ia **faamatuu atu foi i kamupani teu oloa, le faautautaga i vaega ua tatau ma talafeagai ai.** Ina ia paleni pea le silasila a le Komiti, e manatu ai, o le tele o faamaumauga o totoe i le ASYCUDA o le fua foi lea o le faimeatuu o kamupani teu oloa i le lē faatinoina o pepa moomia mo le faalisitiina aloaia ma kiliaina le ASYCUDA.

(iv) **Faamatuu i tua le resitalaina o menifesi:** Ia silasila i le polokalame fou o le ASYCUDA World, ma le mafai ona faamatuuina atu atoa, o le resitalaina o le menifesi i Kamupani Vaa, e aunoa ma le toe siakiina e le Matagaluega. E manatu le Komiti o le a fesoasoani tele lea i le faafaigofieina o faafetauaiga (trade facilitation) aemaise o le vave faamatuu atu o faamomoli a le mamalu o le atunuu.

(v) **Ia ō lua le tomai, faamaoni ma le faautauta:** Ia faia lelei aoaoga mo le aufaigaluega ina ia malamalama lelei i le **fuafuaina o tiute** o so o se oloa po o faamomoli. Ia faataua i aoaoga ma so o se feiloaiga faa-le-aufaigaluega, **le faamaoni i le fuafuaina o tiute ma le aoina o seleni.** Ia faaleleia le tomai ma le silafia lautele o le aufaigaluega ina ia mafai ona galulue i isi vaega o le auaunaga (**staff rotation across sections**).

(vi) **Ia maioio lelei tiute tauave:** Ia tausisia e le aufaigaluega le tuu mavaevae o galuega e pei ona faataatia ai, aemaise lava i le vaega o faafetauaiga (Trade) ma le Puipuiga (Border), ina ia foia ai le fai toatasi e se tasi o galuega ma aveesea ai le siaki masani moomia mo galuega (**separation and segregation of duties**). Ia fesui ai le aufaigaluega galulue (**saff rotation within the same section**) i kamupani teu oloa eseese, faapea pisinisi tetele o lo o mafai ona faatino ai galuega a le Matagaluega, ina ia **maua pea le siaki faaauau, ma tuu ititiia ai ni faiga faa-alamatua** e ono tulai mai.

- (vii) **Mataituina Tulafono ma faiga faavae:** Ia silasila i tulafono autu ma tulafono faatonotonu o lo o faagaoioia ai le Matagaluega ina ia ogatasi ma suiga i le lalolagi faapea foi faiga faavae fou a le Malo. Ina ia mulimulitaia ma tausisia aiaiga ma faiga faavae a le Matagaluega. O lo o matauina le faaulufale mai o oloa faapisinisi i le atunuu e faaaogaina ai faamomoli (personal effects), po o le faaulufale mai o isi oloa i totonu o pusa o isi oloa, o se faiga faasolitulafono (**fale declaration**).
- (viii) **Toe silasila i Faamomoli (personal Effects):** Ia silasila le Matagaluega i se faiga lelei e kilia ai **faamomoli**, (personal effects);
- Ina ia aveesea ai le malosiaga ma le faitalia o lo o tuuina atu i le aufaigaluega, aemaise le faalagolago malosi i le faamaoni.
  - Aveesea ai foi le ono galulue faatasi (**collude**) o le aufaigaluega a le Matagaluega ma kamupani teu oloa,
  - O le a tuutiitia ai le faaaogaina o le Tusi lisiti tulagalua (sub receipt), lea o lo o ave ma faafitauli i le lelei faagasolo ai o galuega a le Matagaluega.
- (ix) **Ia mulimulitaia e le aufaigaluega taiala:** Ia faamalosia ma tausisia tulafono a le Matagaluega, e pei o le faamatuu muamua i tua o oloa po o faamomoli (pre release) a o lei faia le kilia. E na o le Ofisa Sili o le Matagaluega e i ai le malosiaga e faia ai lenei faaiuga. Ua matauina e le Komiti le faia e nisi o le aufaigaluega, e ese mai le Ofisa Sili o lenei faaiuga, ma ua tatau ona faamutaina. O lo o i ai foi le lafoga i le faaauau pea ona faia e le aufaigaluega o pepa kilia oloa, peitai o se auaunaga ua faamatuu i tua.
- (x) **Pulea ma le malu puipuia o seleni o lo o aoina:** Ia faalisitiina tupe i taimi e aoina ai, ma tuuina i le Faletupe i le aso e sosoo ai, ina ia tausisia ai aiaiga faatausitusi, aemaise o taiala ma faiga faavae, e limataitaiina ai le aoina ma le faamatuuina atu o seleni a le Malo. Ia ave le faamuamua a le Matagaluega i seleni ua aoina, ma lona malu puipuia, ae tapena mulimuli faamaumaga moomia mo le ASYCUDA. O se faiga o le a lē toe lokaina ai seleni i le sefe mo se taimi umi, ma tofotofoina ai le faamaoni o le aufaigaluega.
- (xi) **Ofisa o Lafoga:** Ina ia silasila totoa le Malo i le lelei faafoe ai o auaunaga a le Matagaluega, i le faiga tuufaatasi o tiute ma lafoga o i ai nei talu mai le 2003. E le faaitiitia le faataua ua ave e atunuu o le lalolagi i puipuiga o tuaoi, po o le border protection/border control. Ma ua talafeagai ona ave i ai le faamuamua a le Matagaluega i lea vaega o le auaunaga. Ua faailoa i lenei lipoti tulaga e ao ona faaleleia ai, ma e le itiiti

se galuega, a o le taimi e faaleleia ai. Peitai o lo o vaeluaina le taimi o le Ofisa Sili faapea le Pulega, i nei auaunaga e lua. E manatu le Komiti, e itiiti lava se fesootaiga i galuega faatino ma ua alagatatau ona toe silasila i le faatulagana o nei auaunaga aua le lelei alualu i luma. Se i vagana ai le totogi o le Ofisa Sili ma nisi o Auaunaga lautele, e manatu le Komiti o se seleni itiiti lea, faatusa i le siitia o le auaunaga, ma le lelei ausia o faatinoga, aemaise ai le tuuina atu o le faamuamua ma le fataua i le vaega o **puipuiga o tuaoi (border control)**. Ua matauina e le Komiti ua aveesea tofiga o Sui Ofisa Sili (Deputy Chief Executive Officer) mai nei auaunaga e lua, ma ua faaopoopo i le faigata o i ai nei, aemaise o le eseese o nofoaga o lo o faamautu ai auaunaga nei e lua.

- (xii) **Pili tuua po o Faamaumuaga totoe.** I le faamaea ai o suesuega a le Komiti, o lo o totoe ai le **6,599** pili po o faamaumuaga e lei kiliaina ma e fautuaina ai e le Komiti le Malo ina ia faaauuina pea ona tulimataia le galuega o feagai ai ma le Matagaluega ina ia mautinoa ua kilia uma pili totoe po o faamaumuaga tuua sa i ai i le aso **Faraile 13 Iuni 2014**, aso mulimuli o iloiloga a le Komiti. O le Pisinisi sa silasila i ai le Komiti e avea ma mau e fesoasoani i lana faaiuga, o lo o tele pea isi pili totoe po o faamaumuaga tuua o lo o totoe i le lisi.

## **5 FAAIUGA A LE KOMITI**

- I le maea ai o ana iloiloga o **faamaumuaga** na tauaooina e le sui mamalu i le Maota;
- I le maea ai o ana iloiloga o **molimau** tuufofoga mai **felloaiga** sa faia ma sui o le Matagaluega, faapea sui o kamupani teu oloa, aemaise foi i latou e ana oloa ma faamomoli;
- I le maea ai o ana iloiloga o **Tali tusitusia** a le Matagaluega i faamatalaga faaopoopo na tapā e le Komiti mo ana iloiloga;
- I le tulimataia ai o le galuega sa feagai ai ma le Matagaluega i le kiliaina o faamaumuaga totoe i le ASYCUDA, aemaise o le taunuuga ua i ai nei;

O lea ua faamalieina ai le Komiti i le lava saunia ma le atoatoa o lana tapenaga, e faia ai lana faaiuga i le mataupu, e pei ona poloaina ai e le Maota.

Ua faia ai le faaiuga a le Komiti e faapea:

### **5.1 I le vaega muamua o le Taiala mo Iloiloga;**

- (i) *‘Pe faamaonia e le Komiti, o Pepa ua faataatia i luma o le Laulau-a-Fono e le Sui Usufono mo Gagaemauga Numera 2; Tofa LEVAOPOLO Talatonu e faamaonia ai;... e lē o faamaoni le*

*aufaigaluega a le Matagaluega mo Tupe Maua i le aoina o tupe.*

**Faaiuga: 'Ua faamaonia e le Komiti le tuuaiga a le Sui Mamalu.'**

### **5.1.1 Faavae o le Faaiuga a le Komiti**

I le taunuu ai o le Komiti i lana faaiuga, na faaaogaina ai e le Komiti mau po o faamaumauga nei:

- (i) **Faamatuu i tua oloa e aunoa ma le faia o le kilia:** O le ata po o le kopi o le pepa lafo oloa, **Exhibit 19**; o le Airway Bill (AWB) Numera **856 AKL 18661565**; House Bill Numera **UO25488**, mo se oloa na taunuu mai i le aso **26 Novema 2011**. O lo o i luga o lenei pepa kiliva oloa (BOL), tusitusiga a se tasi o le Aufaigaluega a le Matagaluega, e faitauina faapea *'please release'* faatasi ma lana *'saini'* ma le *'aso'*. O sailiiliga a le Komiti na mautinoa ai, **o le faaupuga lava lea ma le saini, na faamatuu ai e le kamupani teu oloa, le oloa i tua**. Peitai e lei kiliaina ma totogiina le tiute e oo mai i le taimi o suesuega a le Komiti. O le feiloaiga ma le Ofisa Sili na fesiligia ai e le Komiti i le mataupu lenei, peitai o le feiloaiga mulimuli ane ma le Alii Ofisa Autu (Principal) e ana le tusitusiga, na ia tautino ai, o ia lava e ana le tusitusiga ma le saini. Sa ia faailoa i le Komiti, sa i ai lona faamoemoe e faia mulimuli le kilia, peitai ua paū lea vaega ia te ia. O le maea ai o le feiloaiga a le Komiti ma le Tamaitai Ofisa Sili, sa saunoa atu ai le Ofisa Sili ia te ia e uiga i lenei mataupu, ma faia ai loa pepa i le taimi lava lea, e kilia ma totogi ai le oloa. O lona uiga, o faamaumauga na tuuina mai e le Sui Usufono ma suesuega a le Komiti na faatoa faia ai le kilia ma totogi le tiute aofai e tusa ma le **\$726.58**, i le aso **5 Iulai 2013, Numera o le risiti R 16936**. O lenei oloa na taunuu mai i le atunuu i le aso **26 Novema 2011**, e tusa lea ma le **sefuluiva (19) masina talu ai**.

Ina ua fesiligia i lona malosiaga e faamatuuina ai oloa (authority to release), ao le i faia le kilia, (pre-release). Na ia saunoa ai e leai se malosiaga o ia te ia, se i vgana le Ofisa Sili. Sa ioeina foi e le Alii Ofisa, o le vaega o le Puipuiga (Border Controls) latou te faamatuuina i tua oloa, ae le o le vaega o faafetauaiga lea o lo o gafa ma ia. O tuutuuga taua nei e lua, e lei mulimulitaia e le Alii Ofisa. E manatu le Komiti atonu o se ata lafoia lea o nisi o faiga faaalatua o tulai mai pea, mai lea taimi i lea taimi i totonu o le Matagaluega, ma e tatau ona lioilo i ai.

- (ii) Na molimau i luma o le Komiti se tasi o Kamupani faatau totoga o taavale, (spare parts), o le tusi atu a le Matagaluega i



le aso 2 Setema 2013, sa faia ai ana suesuega i le lisi na tuuina atu, ma iloa ai e lei totogiina nisi o oloa o lo o aumai i le lisi. Na ia faaalua foi, o le taimi lava lea na oo atu ai i le Matagaluega ma faia le kilia ma totogi loa le tiute o oloa nei:-

- Rec # 23826 - \$594.00
- Rec # 23827 - \$303.10
- Rec # 23828 - \$388.23,
- Rec # 23829 - \$705.80
- Rec # 23830 - \$149.38
- Rec # 23831 - \$160.56
- Rec # 23832 - \$359.25,
- Rec # 23833 - \$247.15
- Rec # 23834 - \$335.59
- Rec # 23835 - \$174.60

O suesuega a le Komiti na ia faaalua manino ai, o oloa na ia totogiina, o oloa lava sa faamatuu muamua atu (pre-release) e se tasi o le afaigaluega a le Matagaluega. Peitai ua aoga le tusi atu o le Matagaluega, na toe manatua ai ma agai atu ai loa e totogi. O iloilogaga a le Komiti na iloa ai o faamaumauga na tauaaoina e le sui mamalu i le Maota, o lo o aofia ai ma faamaumauga e uiga i oloa nei faatoa totogiina, e le Kamupani faatau totogi taavale. Silasila i le **Exhibit 23**, o lo o tuuina atu ai faamaumauga o lenei mataupu.

- (iii) O le asiasiga a le Komiti i le Matagaluega, sa tapa ai e le Komiti e tatalaina le sefe tupe (vault). Na molimauina e le Komiti seleni ua tuutagapepaina ma tusi ai le aso, ma teuina i le sefe. O suesuega maeaea a le Komiti na silafia ai le umi o i ai nei seleni i le sefe. E oo atu i le 6 masina le umi o i ai nisi o nei tagapepa o seleni i le sefe. O se taimi umi lenei taimi ma atagia ai le faatamala tele o le Matagaluega. Ua le mulimulitaia e le Matagaluega aiaiga ma puipuiga faatausitusi, i le pulea ma le malu puipuia o seleni, aemaise foi o aiaiga o le Tulafono o le Pulega o Tupe a le Malo, Public Finance Management Act 2001.
- (iv) I faamaumauga o lo o totoe i le ASYCUDA, lea ua taunuu i le aofaiga e 6,599, faamaumauga totoe, e aunoa ma ni faamaoniga e iloa ai pe sa kilia ma totogi le tiute. O lo o tuuina atu i le **vaega 2.7** i luga ni mafuaaga, ua leai ai ni faamaoniga mo nei faamaumauga. Peitai e manatu le Komiti e lilifa atu i le puipui 10, '(x)' le mafuaaga o le totoe ai pea o nei faamaumauga i le ASYCUDA:

E faitauina le puipui 10 e faapea... '(x)' **Faamatuuina faasolitulafono** - *Pe afai ua faamatuu atu e kamupani teu oloa (po o le Matagaluega foi), nei oloa ma faamomoli i tua,*

*e aunoa ma le kiliaina e tusa ai ma ala o tulafono. O se faiga faasolitulafono lenei faiga.*

Peitai e le i maea suesuega a le Matagaluega, e le i maoti foi mafuaaga o le totee ai o nei faamaumauga e 6,599, peitai e manatu le Komiti o le tiute ma le matafaioi lava lea a le Matagaluega, o le faailoa ma faamaonia mai i le Komiti, le sese ma le lē sao o le taofi. (The onus is on the Ministry to prove the Committee wrong).

O vaega taua nei e fa (4), o vaega autu foi ia ma molimau tautino, ua faavae ai le faaiuga a le Komiti e pei ona taunuu i ai.

### **5.1.2 Faamanino nisi o mataupu e fesootai ma le Faaiuga**

Lau Afioga i le Fofoga Fetalai, o nai nisi lava nei o vala o le Faaiuga e ao ina manino.

A o soalaupule e le Komiti lana faaiuga o lenei mataupu, na silasila ai le Komiti i vaega taua nei:

- (i) **Aufaigaluega:** Sa silasila le Komiti po o faamalieina le upu ‘aufaigaluega’ e pei ona agai tonu i ai le tuuaiga a le sui mamalu.

O le mau **muamua (i)** ua faavae ai le faaiuga a le Komiti, e faasino i le Alii Ofisa Autu, po o le Principal Officer, o ia o se sui e **toatasi o le Aufaigaluega.**

O le mau lona **lua (ii)** o le faaiuga a le Komiti, e faasino i **nisi o le aufaigaluega** o lo o gafa ma le faamatuuina atu o oloa, faapea foi le aufaigaluega o lo o galulue i faleteuoloo, ma o lo o i ai i le taimi tonu e faamatuu atu ai oloa i ē ana oloa.

O le mau lona **tolu (iii)** o le faaiuga a le Komiti, e faasino i **nisi o le Aufaigaluega** o lo o gafa ma le vaai o seleni a le Matagaluega, faapea foi le Aufaigaluega o lo o galulue i tua ma faaaogaina le tusi lisiti tulagalua, ma faamaopoopoina pepa kilia oloa e i ai le BS\$ ma le IM4.

O le mau lona **fa (iv)** o le faaiuga a le Komiti e faasino i se vaega **toatele o le Aufaigaluega**, po o le **Aufaigaluega atoa** foi, o i latou uma o lo o faisao i le **faatamala tuufaatasi** (collective responsibility) ua mafua ai ona lē atoatoa faamaumauga a le Matagaluega ma totee ai le **6,599**, o se aofaiga tele e aunoa ma ni faamaoniga e kilia ai.

E manatu le Komiti lau Afioga i le Fofoga Fetalai, o lo o o gatasi aulape o faavae ai lana faaiuga ma le faamalamalamaga o le upu ‘aufaigaluega’ e pei ona tuuina atu i le **vaega 1.7** o le lipoti.

- (ii) E ese mai i tuuaiga autu na agai tonu i ai suesuega, e manatu le Komiti e ao ona faamanino nisi o lafoga po o saunoaga a

le sui mamalu sa faapea ‘**o faamaumauga na ia tauaaoina, o lisi ia o oloa e le i kiliaina, ma e le i aoina e le Matagaluega tupe.**’

O lenei lafoga po o le saunoaga a le sui mamalu, na saunoa tetee i ai le Matagaluega e ala i le Ofisa Sili na saunoa e faapea; ‘**o oloa o lo o i faamaumauga nei, ua uma lava ona kilia ma totogi tiute,** peitai e i ai mafuaaga o lo o tumau ai pea ia faamaumauga i le ASYCUDA.’ Na silasila le Komiti i taofi maumaututu na saunoa manino i ai le sui mamalu faapea foi le Matagaluega, e uiga i faamaumauga na tauaaoina i totonu o le Maota. Sa feteenai ia saunoaga e pei ona faamaonia i sailiiliga a le Komiti:

- E tusa ai ma lafoga a le sui mamalu, o sailiiliga a le Komiti na iloa ai o se vaega tele o nei faamaumauga, e lē mo ni oloa e le i kiliaina pe le i totogiina tiute. O lo o faamaonia lea mau ina ua kiliaina le **21,967** o faamaumauga lea na faatinoina ia **Aokuso 2013**, e aunoa ma se tupe a le Matagaluega na maua mai ai. O lona uiga e le faamaonia lea vaega o le saunoaga a le sui mamalu. Peitai pe a tusa ai ma le mau muamua ma le lua, o lana faaiuga, e i ai se vaega o faamaumauga na tauaaoina e le sui mamalu, ua faamaonia e le Komiti, e le i kiliaina ma totogi tiute. (Exhibit 19 and Exhibit 23).
- E tusa ai o le saunoaga tetee a le Matagaluega, o sailiiliga a le Komiti na iloa ai, e i ai nisi o faamaumauga e le i kiliaina ma totogiina tiute. O faamaoniga o lea mau, o lo o auina atu i le vaega muamua, (Exhibit 19) ma le vaega lua, (Exhibit 23) o lo o faavae ai le faaiuga a le Komiti, faapea ai ma le 6,599 o faamaumauga o totoe nei, lea o le a manino ai po o a oloa ua kilia ma totogiina tiute, a o a foi oloa e le i kiliaina ma le i totogiina tiute.

Lau Afioga i le Fofoga Fetalai, e le o faamalieina le Komiti i le tonu atoatoa o saunoaga a le sui mamalu, faapea foi le saunoaga a le Matagaluega, ma manatu ai le Komiti ua tuuitiitia se faataua e ave i nei saunoaga, i le faiga o lana faaiuga. Peitai e fagatonu pea le malama e tusa o le taiala o ana iloiloga ma saili i faamaumauga na tauaaoina e le sui mamalu, pe faamaonia ai ‘e le o faamaoni le aufaigaluega a le Matagaluega mo Tupe Maua i le aoina o tupe.’

## **5.2 I le vaega lua o le Taiala mo Iloiloga;**

Lau Afioga i le Fofoga Fetalai e faapea:

- (iii) *Fautuaga e limataitaiina ai le faatautaia e le Fono Aoao Faitulafono o mataupu faapenei, e tuuaia ai tagatanuu aemaise o le aufaigaluega a le Malo, e ni sui usufono.*

Na soalaupule e le Komiti lenei vaega o taiala mo ana iloiloga, ma silasila ai le Komiti i nisi o faiga e ono limataitaina ai le Fono Aoaofaitulafono i iloiloga faapenei, e tuuaia ai tagatanuu aemaise o le aufaigaluega a le Malo e ni sui usufono. Sa talanoaina e le Komiti le faiga o lo o faaogaina soo e le Malo (Executive) i le filifilia lea o Komisi Suesue (Commission of Inquiry) e silasila i ni mataupu talafeagai e tulai mai i lea taimi i lea taimi. O se faiga e tutoatasi mai le Palemene ma e lē fesiligia le tutoatasi o lana silasila i se mataupu e tuuina atu i ai. O Komisi Suesue o lo o faaogaina e le Malo, e tofia lava e le Malo, ma e lipoti atu foi i le Malo.

Peitai sa silasila le Komiti i taiala na tofia ai, ma faiga o lo o faafoe ai ana iloiloga, o se uluai **Komiti Suesue Faapitoa Faapalemene** ua faavaeina. Sa tofia e le Fofoga Fetalai, ma o lo o fili mai sui o Vaega Faaupufai o lo o i le Palemene. O le faiga lea ina ia mautinoa ai le tutoatasi o le silasila a le Komiti, ma lē faapito ai manū ia tasi, i se sui mamalu se toatasi, po o se vaega faaupufai e tasi. O le mataupu e pei ona iloiloaina, o le mataupu Faapalemene ma sa iloiloaina i taiala ma puipuiga Faapalemene.

I le maea ai o le lauliliuina o le tofa, na manatu ai le Komiti e fautuaina le Fono Aoaofaitulafono e faapea;

- (i) ia faaogaina pea **Komiti Suesue Faapitoa Faapalemene** i mataupu faapenei e tulai mai i le lumanai;
- (ii) ia silasila le Fofoga Fetalai i sui filifilia o Komiti Suesue Faapitoa Faapalemene faapenei, ina ia maua le silafia talafeagai e tusa o le mataupu o iloiloaina, faapea foi sui e galulue punouai aua le faatinoina o iloiloga a le Komiti.

### **5.3 I le vaega tolu o le Taiala mo Iloiloga;**

- (iii) *Fautuaga e fua i ai se faaiuga a le Fono Aoaofaitulafono i le sui usufono, pe afai e le mafai e faamaumauga ua tuuina mai e le sui usufono ona faamaonia ana tuuaiga.*

E uiga i le vaega tolu (3) o taiala o iloiloga, e manatu le Komiti ua manino lana faaiuga i **vaega 5** i luga. Talu ai ua **faamaonia e le Komiti tuuaiga** a le sui mamalu, o lea e manatu ai le Komiti, ua le manaomia sana fautuaga, e tusa o lea vaega o le taiala o iloiloga.

Peitai o lo o i ai lava le Komiti o Tulaga Aloaia ma Amio Tauloa e mafai ona tuuina i ai so o se mataupu faapenei e tuuaia ai tagatanuu aemaise o le aufaigaluega a le Malo e ni sui usufono, pe afai ua maea ona suesueina ma ua lē faamaonia lenei tuuaiga.

O lo o i ai foi taiala ua faataatia mai e Tulafono Tumau a le Palemene, e avanoa ai le Fofoga Fetalai e faia lana faaiuga i so se mataupu e tulai mai.

## **6. IUGAFONO:**

Ua fautuaina e le Komiti le Fono Aoao, Ina ia talia ma faautagia lana Lipoti.

7. **UPU FAAIU – UPU FAAFETAI**

- E fia faaleoina le faafetai tele a le Komiti i le Fofoga Fetalai ma le Palemene e tusa o le faatuatuaga na tuuina mai, latou te lauliliuina ai lenei mataupu.
- E momoli le faafetai i le Ofisa Sili o Pulega ma le Matagaluega mo Tupe Maua e tusa o le lagolago sa tuuina mai, a o faagasolo le iloiloga o lenei mataupu. E le i faigofie le tauaveina o outou faiva ma tiute masani, ma tuuina mai foi outou taimi mo le Komiti ma ana iloiloga.
- E faafetaia foi le lagolagosua a kamupani teu oloa i outou taimi taua sa tuuina mai mo le Komiti, e faatalanoaina ai lenei mataupu ma asiasia foi a outou kamupani.
- E fia faamauina foi le faafetai i nisi e ana oloa ma faamomoli na auina mai i le atunuu (Consignees) ma o lo o aofia i faamaumauga tuua o lo o totoe nei, i outou taimi na faaavanoaina mai mo le Komiti.
- E leai se faiva e asa ma se maumau, lau Afioga i le Fofoga Fetalai, matou te faamalulu atu ai i nisi ua aafia finagalo ona o le galuega sa feagai ma le Komiti.

Lau Afioga i le Fofoga Fetalai, ona o le Taitaifono sa faaauauina galuega, e fia faamauina foi lau faafetai tele i le Afioga i le Minisita le Afioga ia Lautafi Fio Selafi Purcell, e tusa ai o le amatalia ai o lenei galuega ia ma faaauauina mai.

E momoli le faafetai i sui usufono o lenei Komiti i le Afioga ia Tialavea Fea Tionisio Seigafolava, Afioga Afualo Wood Uti Salele, Tofa Tuisa Tasi Patea ma le Susuga Papalii Lio Faavaivaiomanu Taeu Masipau, manuia le Fono.

**FOFOGA FETALAI:** Malo, faafetai saunoa i lau Afioga i le Taitaifono o le tatou Komiti Faapitoa Faapalemene. Ia ou te manatu ua faafofoga ma le manino le tatou Palemene i lenei Lipoti Aloaia ua tuuina mai. Ona o lea ua tatou taunuu i le tatou taimi malolo, o le a fai se tatou malologa masani, tatou foi mai ona tatou soalaupule lea i felafolafoaiga o lenei Lipoti.

Ou te faasilasila atu o le a faataatia ese Tualumaga a le Fono Aoao Faitulafono mo lana malologa masani o le afiafi.

*Na faataatia ese Tualumaga a le Fono Aoao Faitulafono mo lana malologa masani i le itula e 4:48 i le afiafi ma toe faaauau i le itula e 5:20 i le afiafi.*

**FOFOGA FETALAI:** Ou te faasilasila atu ua toe amataina nei Tualumaga a le Fono Aoao Faitulafono.

Ia e faamalo atu i lenei vaega o le afiafi, e talitonu o lea ua faasolo pea le fetu a le tamaloa i lona nofoaga, ae i ai le talitonuga ua maua lo outou faasiliga malosi e ala i le tatou malologa na tatou i ai nei.

E faia le tatou malologa ua maea ona tolaulau e le Komiti Faapitoa Faapalemene lana Lipoti Aloaia, ia sa faatonuina ai e le tatou Maota Fono ina ia tuuina mai se faamatalaga auiliili e ala i le Lafo Faatu na faamaninoina le faamaoniga o faamatalaga ia na saunoa i ai le sui usufono mo Gagaemauga Nu. 2.

E faaleoina le agaga faafetai, e momoli atu le faafetai tele a le Komiti e tusa ai foi ma la outou Lipoti. I tulaga aloaia e manatu ona o le faatulai mai o lenei mataupu na mafua ai ona filifilia le Komiti Faapitoa lenei, ina ia tulituliloaina pea a tatou faiga faavae aemaise o le faamaoniga o faamatalaga e tuuina mai i le Maota e ala i lafoga ma saunoaga a sui usufono mamalu. O lea ua maea ai ona taulimaina e le Maota i lenei aso i le tolaulauina atoa e le Komiti Faapitoa Faapalemene lenei, e ala i le latou Lipoti ua tuuina mai, atoa ma mau e faamaonia ai le latou faamatalaga ma mea ua tuuina mai ina ia manino le Maota.

E momoli atu ai le faafetai tele i le paia ma le mamalu o sui usufono, ia sa tofia aloaia e le tatou Maota Fono nei ona ua faataunuuna la outou Lipoti ma la outou Komiti i le tulaga aloaia. E manatu ua atoa lelei le 12 masina talu ona faatino la outou galuega. O le agaga ma le faamoemoe ia le tilotilo masae pe vaai faatamala ia pe tilotilo masei le tatou Palemene, o le agaga ma le tulaga sa faatulai ai ma lenei Lipoti ina ia taatia i le agatonu ma ia i ai se aoga le faamaoniga o tuleiga ma saunoaga e saunoa i ai Afioga i sui usufono, aemaise foi o le faalauleleiina o Matagaluega taitasi, o aoga lava mea uma. Ma e manatu ua fesoasoani foi i tulaga o va faafeagai ai o Matagaluega, o Faauluuluga o Matagaluega, Afioga i le Minisita, ma fesoasoani i le Taitai o le Malo ma le Kapeneta. Ia o le agaga lena o le Komiti Faapalemene, ina ia mafai ona fesoasoani ai, timata ma fautuaai, o a ni tulaga sa maua ua faamaonia ai ni tulaga o ni faaletonu, ia o auga na o aute o le faamoemoe, ia lafo atu, aumaī, avatū, tuu atu e le Malo, faafofoga ma le manino le Afioga i le Minisita o le Matagaluega e a ia le suesuega na faatinoina ona o le tuuaiga a le sui usufono mamalu, ia ou te talitonu o le taatia lena i le agatonu o le tatou faamoemoe. O le agaga e afua atu i le Palemene lenei le saililiga o mea tonu ma le faamaoni, ia atoa ai foi ma le fesoasoani. O le fesoasoani alofa moni lena e tatou te toe timata ai le upega ma fautua i Matagaluega, e vaai lelei ni mea o lape ai le auaunaga mo le lumanai. E le faaititia ai le faafetai atu i le tatou Komiti, aemaise ai foi i latou uma o e sa taiulu ma taiao i le faamoemoe o lenei Lipoti ua tulai mai, ma e manatu ua manino ma malamalama. O le atoaga atoa o le tali a le Komiti ma le Lipoti, o lena ua i luma o le Laulau a Fono o lo outou paia ma lo outou mamalu, ae na o ni nai vaega sa tolaulauina ona ua uma foi ona faataatia foi aulape o tatou Tulafono Tumau e pei ona i ai.

O lea le paia e o le Maota ou te manatu ua manino ma malamalama le folasaga a le Komiti i lenei aso, ma e ou te talitonu, e vaai foi ma le alofa i taualumaga o le galuega. O le tulaga i le sui usufono mamalu na tuuaia lau Afioga Levaopolo, o auga na o le faamoemoe. O lea ua maitau nei, o lau Afioga le isi sui usufono mataala lea e i ai nei i le tatou Maota. Faafetai atu mo tulaga uma, e le taia i fale le tulaga o le faamoemoe ma lou tulai mai e molimoli mai le mau sa tauave ma tautino, o lea ua faamaonia ua i ai ai o lupe

o taulafoga, ona o le faamoemoe o le alofa moni lena i le tatou atunuu ma le faamoemoe o lenei Matagaluega, ona e talitonu o le Matagaluega o Tupe Maua, o le tatou faalagolagomaga lea. Afai foi ne i sipa le lamaga ma faaletonu se auunaga i nisi o taimi, atonu o le aoga lena o le tatou Komiti Faa-Palemene, e toe valuvalusia aa o le fau ia i latou o faatinoina le galuega ina ia vaavaai totoa, toe silasila ma toe tagatagai aua e a Ulu tafega ae selefutia ai Vaisigano. E a le uga foi e tausili ae tigaina ai le atigi, tulou Samoa ma le faafofogaaga, e le faigofie le afu liligi o le atunuu i ona tulaga masani. O lea ua ou talia ai ma le aloaia i lou lagona o au o le Fofoga Fetalai le galuega faatino a le tatou Komiti i lenei aso ma ia aoga mo le faasologa o le tatou galuega i le lumanai.

Ia, tulai maia lau Afioga i le sui usufono na mafua ai lenei mataupu. Tulai mai le sui usufono mo Gagaemauga Nu.2.

**Tofa LEVAOPOLO TALATONU:** Ou te manatu o lea ua e saunoa i tulaga uma e tusa ai ma le mataupu lau Afioga i le Fofoga Fetalai ma e i ai foi le talitonuga o le a le toe oo i ai se upu a le sui usufono nei. Na pau lava le tulaga ua ou tulai ai ma le faaaloalo lau Afioga i le Fofoga Fetalai, e momoli tele atu le faafetai tele i sui usufono mamalu o le Komiti Faa-Palemene sa latou fitaituga i lenei galuega tele. Ma o le mea moni lava lau Afioga i le Fofoga, e to lava lou pulou i sui usufono o le Komiti, aemaise lava sui usufono o le Itu Agai. E mafua sau faamatalaga, o lea faatoa ou maua lava lea o se faamatalaga i totonu o le Palemene sa i ai lava se tulaga foi lea o le tauanau, ae sa matua mau lava le toovae ma le tofa foi ma le faautaga i le faaeteete foi i tulaga o taulumaga o sailiiliga a le Komiti Faa-Palemene. Ma e momoli atu le agaga faafetai.

I le tulaga foi o le mataupu pei ona tuuina atu, e leai lava se agaga o lou sui usufono ou te faaleaga i le tatou Malo ma le latou taumafaiga po o se isi foi o le aufaigaluega. O le agaga atoa lau Afioga i le Fofoga Fetalai, ia tatou galulue faatasi i le tulaga o le atiaaina o le tatou Malo, silasila i ni vaega o faaletonu, o le matou matafaioi lea o le taulogologo ma faamanatu atu. Aua e talitonu lava, o la e tele lava tiute tauave o a outou Afioga i Minisita o le Kapeneta ma lau Afioga i le Palemia, e i ai foi mea e misi ai la outou silasila, a o la matou matafaioi lea. O le a foi se faamatalaga po o se leo foi sa paopapa i lena foi tausaga ua mavae, e faamalulu atu i lau Afioga i le Fofoga Fetalai ma le mamalu o le tatou Maota.

E pei o se tulaga lea ua ou tulai atu ai ma le agaga faaaloalo, ae faafetai tele lava mo le avanoa.

**FOFOGA FETALAI:** Malo faafetai. Ia, se i tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ou te tulai atu e le masani ona tulai mai tulaga faapenei, o Lipoti lava latou o Lipoti. O Komiti foi e galulue mo le Palemene lenei, o Komiti e tofia atu i inei, ona tuu atu lea o Lipoti i ai latou te galulue ai, o outou o le aufaigaluega, o Komiti galue a le Palemene lenei. A uma la outou galuega ona outou faapea ifo lea, o outou o tagata le aoga, ave le viiga i le Atua. Aisea? Aua foi o mea ia na tofia ai outou e fai, o lea ua outou faia. E le faapea foi la e toe tau selu atu, leaga o la outou galuega

lena e tatau ona fai. E aumai la outou Lipoti i totonu o le Palemene lenei e silafia ai foi e le Palemene lenei le faatinoga a lea Matagaluega ma lea Matagaluega. Afai e faaletonu, o le tulaga lena, ona faaoga lea o fautuaga ia ua aumai e galulue ai i latou o le aufaigaluega a le tatou Malo. O uiga ia o faatinoga o pulega a le tafatolu, o iinei i le Palemene ma le tatou Malo, e fesiaki. E siaki e le Palemene galuega o lo o faatino e le Executive. E le faapea foi o i ai se atoatoa. O le mafuaaga lena na ala ai ona tofia Suetusi e lipoti sao mai iinei i le Palemene, o le latou galuega lea e fai. Ae faapena uma lava Malo, e le faapea e la pea aso, e i ai foi aso e lape ai le faatinoga. A oo la ina aumaia Lipoti ma aumai ai fautuaga faapea, o mea ia e tatau ona fai e vaavaai i ai le Minisita faapea foi ma le aufaigaluega, aua ne i toe tupu tulaga ia, aemaise lava le Vaega lenei. Ou te fiafia tele i le vaega lea na tau mai, e ono masina o loka i totonu o le sefe tupe ia. Ana ou Minisita ai i i, ua tatau ona faatea le tagata e vaia mea ia, leaga o mea ia e le tatau ona tupu, ae aliali mai ai le faatamala o le Ofisa lea, sa tatau ona vaai i mea ia ae le faia, ona o le Matagaluega lenei e koletai ai tupe, e tele lava le faaososoga i tagata faigaluega. O le mea la lena e taua ai le Lipoti lea ua aumai. Ma o le tulaga e le faapea o ni tulaga e aveane ai le taua o Lipoti nei. Ana faapea foi o se isi Komiti e tofia i ai, o le mea lava e aumai, o le Lipoti lava lea e aumai. Ina ne i te i ua mitavale ai le Komiti ma faapea, o matou lava lea ua i ai le poto silisili. O le mea lena na ou fai atu ai, ia outou nonofo lelei i lalo ma ave le faafetai i le Atua ma outou faapea ifo, o tatou o auauna le aoga. O le mea lea na tofia ai outou e le Palemene, ia fai lelei le tou galuega ma lipoti mai. O lena ua avatu le faafetai a le Afioga i le Fofoga Fetalai, o lena foi ua avatu lau faafetai, o au o le Faauluuluga o le Malo. E le tau tali foi le Minisita. O le tali atu lea lau Afioga i le Fofoga Fetalai e tusa ai o le Lipoti matagofie lea ua tatou pasiaina nei.

**FOFOGA FETALAI:** Malo. E manatu ua fetai fola pei o lea upu. O lea foi ua tatou talanoa ua i alo, ua manino ma malamalama foi le tulaga ua faatulai mai, ou te talitonu ua taatia i lagatonu le mataupu lenei. O tulaga foi i nisi mataupu e fia faailoa atili, o lea o le a lafo atu i le tatou Malo e pei o tulaga masani ona tuuina atu lea i aao o i latou o lo o faia le fautuaga i le Matagaluega atoa ai ma ni mea fia faaleleia. A o lea ua tatou faalogo ma le manino i le saunoaga a le Palemia, ou te lagona ua atoa tagi ai i i tulaga o mataupu faapenei.

Tulai mai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga faafetai lava. Leai o le fesili tuusao i lau Afioga pe mafai foi ona fai ni fautuaga i le Lipoti na aumai pe leai. Ma lou faaaloalo lava.

**FOFOGA FETALAI:** Ia, ia te au ma lou lagona ailoga i se a e toe... o lea ua saunoa manino le na mafua ai le Lipoti, ua na talia aloaia le tulaga o le faamoemoe, ua na talia tusitusiga, e le o toe i ai nisi mea o toe faailoa, o lena ua i o outou aao uma le tala atoa o le Lipoti. Masalo o taeao fou sau i le nusipepa, e le toe i ai nisi mea e toe natia o lea ua manino. Ae a tatou toe toso le aulapauta, o lea ua saunoa le Malo, tali le Malo e aoga mea uma ua tulai mai i lenei Lipoti, ma e taua. O le mea lea ou te talitonu ai, ne i meaane ua tatou toe taavili foi i lenei taimi atoa oo atu foi taeao, o le mea lava e tasi. Ae



ou te manatu malilie sui usufono i totonu o le tatou Maota. Ma ou te talitonu, lafo pea i totonu o le 90 aso i tulaga masani ona tali mai loa lea o le tatou Malo, e pei o le mea lea e faasolo ai nei a tatou Lipoti mo le taimi nei.

Tulai mai lau Afioga i le Taitai o le Itu Agai.

**Afioga Hon Palusalue Faapo II:** Faafetai lava i lau folasaga manino aua ua ta le iloa le mea a fai, a faatali i le Tali a le Malo e leai ni felafolafoaiga, a faatali foi i le Lipoti a le Komiti, e i ai lou talitonuga e tataua ona tatala le avanoa lau Afioga i le Fofoga Fetalai, aua na pau lenei o le taimi e mafai ai ona saunoa aga... leaga e matuia le mataupu lenei, leaga na tau ai le mamalu o le sui usufono o lenei Itu. E i ai la lou talitonuga lau Afioga i le Fofoga Fetalai, e tataua ona tatala le avanoa se i sausaunoa leaga o le mea e tupu i le sui usufono mo Gagaifomauga Nu.2, o matou uma lava lea.

O le mea lea lau Afioga i le Fofoga Fetalai, e tatalo atu e tatala mai le avanoa ona faatali ai lea o le Tali a le Malo. Ma lou faaaloalo lava.

**FOFOGA FETALAI:** Ia, se i tulai mai le sui usufono mo Gagaifomauga Nu.2.

**Tofa Sooalo Mene (Gagaifomauga Nu.2):** Faamolemole lau Afioga i le Fofoga Fetalai, o se mea e fia faasao leaga o ia e faafogafoga mai si ou itumalo. O Gagaifomauga Nu.2 lea sa taua e le Afioga i le Taitai o le Itu Agai.

**FOFOGA FETALAI:** O le Gagaemauga Nu.2 le faasaoga o le saunoaga a le Taitai o le Itu Agai.

**Afioga Hon Palusalue Faapo II:** Ou te ofo, lona uiga e faaletonu fofoga o le sui usufono mamalu. O Gagaemauga Nu.2 lea na ou fai atu ai, ioe. Masalo se i toe agai e siaki ou fofoga....

**FOFOGA FETALAI:** Palusalue, o lea ua e faafogafoga i le tali manino a le Afioga i le sui usufono mo Gagaemauga Nu.2, ou te manatu o le aua lenei o aute i le aso lenei, leaga o ia le tagata lea sa tuuaia i le tatou mataupu lenei. O lea foi ua matua tali manino le sui usufono aua o ia e ona le mataupu. Ua malie lona finagalo, faafetai foi i le Komiti faafetai foi i le Malo, o lea foi ua toe faafetai mai ia te au i le tulaga o le tatou talanoaga lenei.

Lau Afioga i le Taitai o le Itu Agai, e ava tele atu i le tulaga o tatou mea faapenei. A i ai ni ou alofa, silasila oe o lea lava e savali le tatou taimi, a o lea e tuliaupu le tatou galuega. O fea o i ai lou finagalo, o lea ua saunoa Levaopolo, ua le i ai le Sui Taitai, ae avea ia o ia e fai ma Sui Taitai mo lenei taimi o lea ua gasegase le Sui Taitai, ua tali le sui usufono mo Gagaemauga Nu.2 o ia tonu lea. Aua tatou te faaataata a lafoga, ana sau nei le Lipoti e faaletonu, ua tatou faamavae ma le sui usufono. A o lea ua tali manino Levaopolo, o Levaopolo moni lava lenei, a o lea foi ua e tulai mai e tau elieli le mea e atili ai ona tatou vevesi. Ia, ui i lea, faafetai atu i le amanaia ma le lavapapale mai foi o le paia ma le mamalu o le tatou Maota. Ou te manatu ua taatia i lagatonu lenei mataupu. Lafo atu ia i le Malo, ua faafogafoga mai foi lau Afioga i le Minisita mo Tupe Maua, e le o ni ai avea o le tatou Matagaluega, o le toe timata o le upega ma tuu atu i ou tafatafa, e le mama i lea Itu o le

Maota le silasila aua le taumafai atu i mea masani ma le faaleleia atili o le tatou Matagaluega nei.

*Na faamaonia le Lipoti.*

**FOFOGA FETALAI:** E tusa ai ma le Tulafono 54, e ao i le Malo ona tuuina mai i le Fono Aoao se Pepa e Tali atu ai i Fautuaga na tuuina mai i le Komiti mo le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

## LAFO MO LE TOLOPOINA

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ua ou tulai atu e faatu se lafo, ona o lea ua maitau ua leva foi ona faaaaogagase le tatou Maota nei, o lea foi e le o toe mamao toe usu le isi a tatou Fonotaga, o a nisi Lipoti e totoe ona faaaauai ai lea, ae saili malosi. E i ai foi le naunau galue, e i ai foi le naunau e tatau ona silasila totoa le Palemene lenei i le soifua maloloina. Ne i aveane lo tatou galue, o lea ua ou popole tele, ua tasi lea ua fai i te i ua fai foi toe fai atu ma se isi. A o le agaga lenei ua ou tulai atu ai e faatu le lafo, *E tolopo le tatou Fono nei ona toe ae ai lea i le aso e pei ona taupoina.*

*Faaluaina e le Sui Palemia, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo.*

**FOFOGA FETALAI:** Ou te talitonu o le a tatou maea e tasi e tusa ai ma le finagalo autasi o le Maota ua tatou i ai i lenei vaega o le afiafi. E momoli atu le agaga faafetai tele i le paia ma le mamalu maualuga o le tatou Maota Fono ona o le lavapapale ma le agaga faamaopoopo e ala i le tatou galuega i lenei aso. O lea ua tatou taunuu i le tatou galuega o lenei Fonotaga, e momoli atu le agaga faafetai tele i le paia ma le mamalu o sui usufono uma o le Palemene, ua taunuu i le taunuuga sa tatou manatunatu ma mafaufau i ai. O lo o i ai pea nisi o a tatou galuega tuua ae manatu foi e aua nei tatou naunau i le ia ae tatou manatunatu i le upega, ua manatu foi le Fofoga Fetalai ina ia aua ne i i ai se mea e faaletonu i le faasologa o a tatou galuega ae ui o lea e le uma le fai aso o le Alii. E momoli atu ai le faafetai tele i le paia ma le mamalu o le Maota i lenei vaega o le aso ona o lo outou onosai mai aemaise o le tauavagameaina o le tatou galuega mai le la vaiaso ua tuanai atu e oo mai i le aso.

O le a tatou alo i le tatou malologa masani e pei ona i ai le tatou Fonotaga, talosia i le alofa o le Atua ma taitaiina mai lo outou soifua manuia ma lo tatou ola vaivai i tualumaga o le tatou aso Fono o le a sosoo ai pe a tatou toe talii mai.

E momoli atu le faafetai tele i le tapuaiga a Samoa i ona tulaga faalupe, Samoa, faafetai tatalo, faafetai le onosai, faafetai le faapalepale, faafetai i lo

outou manatu ao usuia le Fono a le Palemene o lenei ua tau i manu mea uma talu la outou tapuaiga.

O le aufai Tatalo leleoa a le atunuu ia mana pea le upu, o le faamoemoega o i matou lava o auauna le aoga a ia fai so matou ai aua le faaauuina o lo matou valaauina aua le tautuaina o Samoa i ona Upufai o Malo.

E faamalulu atu foi i le tatou Palemene, Samoa ma lau faafofoga i se upu ua laa vale pe le tau tamalii i la outou faafofoga i le taumafai atu a le Fofoga Fetalai, e i ai lava le agaga o le tatou Vaa e fau tele, e aumaī avatū, o taimi foi o tai loloto ma tai o taafiliga ma le sousoua o galu fatiā ma galu fatio'o e matua atu i ina. Afai foi o i ai se faamatalaga ua laa vale i la outou faafofoga, faafoi mai i le tamaloa Sasina. E i ai le agaga ma le faamoemoe, e le o se faaiu aupule po o se manatu fia taualoa pe fia maualuga, e leai, e le o le agaga lena. O le auga atoa o le faamoemoe na auina mai ai Au e lou itumalo, le paia o Aiga Sa Tupua, Aiga Sa Malietoa ma le Faletolu, aemaise le Tofa i Aiga ma Saeseese, e tasi lava le faafitiga o alega e omai e tautua Samoa. Faafetai i lou itumalo mo le tapuaiga, lea ua outou faafofoga mai e ui ina ou le faaleoina ni manatu ma ni lagona e ala i le Tala o le Tupe, ua silafia e le Atua mea uma i le agaga alolofa o Afioga i Minisita ma faatino galuega mo lo tatou itumalo.

Manuteleina lau faasausauga Samoa i tulaga uma o le a tatou feagai ai, ia ulimasao nisi o galuega aemaise o nisi o fonotaga o le a tatou feagai ai nei i le masina o Iulai, o le a usuia ai le Fonotaga Faapitoa a Fofoga Fetalai uma o le Vasa Pasefika, o le a avatu ai nisi o tusi valaaulia i le paia ma le mamalu o le Palemene ina ia tatou auai faatasi i nei Fonotaga taua a o loloma ai le Fonotaga aloaia a le tatou SIDS. Ia le paia ma le mamalu o le Maota, tatou tutu faatasi, e le o se fonotaga na o se Vaega Faaupufai po o le na o se vaega o le atunuu, o le fonotaga a le Palemene ma Samoa atoa. O moomooga alofa na e lafo atu i le paia ma le mamalu o le tatou Palemene ina ia tausia lo outou soifua manuia ma lo outou soifua maua i le lagi e mama ma le soifua manuia.

A o le i faaiuina le tatou Fonotaga ou te tatalo atu i le sui usufono mo Faasaleleaga Nu. 3, o le tama matua e te faaiuina mai le tatou mafutaga i se tatalo ona tatou malolo ai lea.

*Na tolopo Taulumaga a le Fono Aoao i le itula e 5:49 i le aoauli seia aulia le itula e 9:00 i le taeao o le Aso Lua, 19 Aokuso 2014.*